

Luoi Atuuc Jethu

Wet nom

Luoi Atuuc Jethu, athör buoth athör Wël Jethu cï Luka göt. Wet ril yen get Luka athör kënë, ee lön bï nyuooth te cï Wëi Nhialic kœc ke kœŋ Jethu buooth kuony thïn, ku bïk Wet Puoth Yam rienke thiäi piny Jeruthalem ku Judia yic ëbën, ku Thamaria ku jøl a pinyhom ëbën aya. (1-8) Yeen, anyiköl ë cäth kœc cï gam, cïmën wäär jœk yen rot kam kœc Itharel agut te bï yen jäl a gam tënë kœc pinyhom ëbën. Ee wïc raan gät athör bï kœc ye kueen ñic ku detkë yic aya, lön kœc cï gam aacie kœc ke man kœc Roma mac baai, ku lön nadë, gam kœc cï gam ë te ye kœc Itharel yanhden theek thïn yen ë jøl thääp.

Alëu bï luoi Atuuc Jethu tek yic ë diäk, ku bï nyooth te cï Wet Puoth Yam ye lueel rin Jethu thiëi piny thïn, ku jœk akuut kœc cï gam kecök. Luoi Atuuc acï tek yic këlä, (1) Cäth kœc cï gam, jœk Jeruthalem la nhial Jethu cœk ciëen, (2) Wet Puoth Yam acï yet wuöt kœk yiic pan Palethtinia, (3) Ku ler tueŋ aya lœŋ wärdit Adekdiæt agut bï yet Roma.

Këdiit cï tic Luoi Atuuc Jethu yic, ee luoi Wëi Nhialic cï ben kek riel kœc cï gam gup Jeruthalem aköl Yan Ayum cïn yic luou, ku ler tueŋ ke tiit ke. Ku yïk akut kœc cï gam kek kœcken diit riel, käjuëc cï röt looi yiic cï lueel athör yic. Wet kœc cï gam tueŋ acï göt käk cï lek kœc yiic, ku käk cï röt looi cï göt athör Luoi Atuuc Jethu yic, aa riel ë wet kënë nyuooth pïr kœc cï gam yic, ku jøl amet ë rot akut kœc cï gam yic aya.

Käk tö thïn

Guiër kœc ñic käk cï röt looi 1:1-26

Lœŋ cï Jethu lueel ciëen ku athönde 1:1-14

Raan cï kuany nyin Judath 1:15-26

Kë cï nyooth Jeruthalem 2:1-8:3

Kë cï nyooth Judia ku Thamaria 8:4-12:25

Luoi Paulo 13:1-28:31

Atuc tueŋ 13:1-14:28

Amat nom gen Jeruthalem 15:1-35

Atuc ë rou 15:36-18:22

Atuc ë diäk 18:23-21:16

Paulo acï mac Jeruthalem ku Cetharia ku Roma 21:17-28:31

1¹⁻² Tënë Thiöpiluth athördien tueŋ yic, yen acï get käk cï Jethu looi, ku käk cï piöc tewäär jœk yen luocide cœk, agut aköl jœt ye nhial. Tewën këc Jethu guo yäth nhial, ëcï wet than piny ë riel cï Wëi Nhialic yiëk ye, tënë kœc cï lœc bïk atuöccke. ³ Nïn thiärñuan thuonde cœk ciëen, Jethu ëcï rot nyuooth arak juëc tënë atuöccke, ku bik ñic, ke cïn diu, lön nadë ke yeen aŋot pïr. Yeen ëcï atuöccke tiŋ ku jieem ke ke käk bäany Nhialic. ⁴ Ku nawën cä atuöccke kenhïim mat tetök, ke thœn ëlä, “Duökkë jiël Jeruthalem. Tietkë Wëi Nhialic cï Wä thœn bï tuœc we, wäär ca lek we. ⁵ Joon acï kœc muœc nhïim ë pïu, ku nïn lik, Wëi Nhialic bï we muœc nhïim abi tuœc we.”

Jethu acï yäth nhial

⁶ Nawën cï Jethu rœm kek atuöccke, ke thiëckë, “Beny, ba kœc Itharel cœl aa ben mac ëmën?”

⁷ Go Jethu bæer ëlä, “Aköl le yen kë bï looi, ku käk bï looi, aaye Wä guiir rielde, ku acïn këdun thïn bäk ñic ye nen bï kek röt looi. ⁸ Ku na la Wëi Nhialic ben, ka bï we yiëk riel, ku wek aabi jam rienkie Jeruthalem ku Judia, ku Thamaria, ku jøl a pinyhom ëbën.” ⁹ Wën cï yen jam këya, ke jœt nhial, ku ë deei kek, ku kum luät bik cï ben tiŋ.

¹⁰ Ku jœlkë lïith ke döt nhial, ku Jethu ke jiël. Teen nyin yic ke röör karou cï ruk aleth yer bö, ku këeckë atuuc löm, ¹¹ ku luelkë, “Kœc Galilia, yeŋö ye wek köc ke we döt nhial? Yen Jethu, cï nyaai tënë we ku yeth nhial, abi la dhuk tecit te cï wek ye tieŋ thïn ke la nhial.”

Mathayo aci kuany nyin Judath

¹² Kaam wën, ka atuuc Jethu jiël gön Olip nom thiääk kek geu ke cīt kilomīter tōk, ku dhukkē geeu Jeruthalem. ¹³ Keek aaci jāl yet geeu ku lek yön yen ciēṅ kek thīn. Atuuc Jethu, aake yī Pīter ku Joon, ku Jemith ku Andria, ku Pilipo, ku Thomath, ku Bartholomeo, ku Matheo, ku Jemith wën Alpawuth, ku Thaimon, raan man kōc thāi bik panden mac, ku jōl a Judath wën Jemith. ¹⁴ Keek aake ye lac rōm ku rōökkē ke ya akut, kek diäär kōk ku Maria man Jethu ku wāmāthakēn.

¹⁵ Nīn lik cōk, ke kōc cī gam cīt raan buōt ku thiār-rou ēbēn, aake cī kenhīim mat. Go Pīter rot jōt ku jīem, ¹⁶ “Wāmāthkie, wet cī gōt athōr Wēl Nhialic yic abī rot dhiel tieṅ. Wēi Nhialic ēci wet lek Debit kē bī rot looi akōldā tēnē Judath, raan bī Jethu nyuōth kōc dōm ye. ¹⁷ Judath ē ye raan akuōtda, ku yeen ēci Jethu kuany bī la abañ luoi bī looi luōide yic.”

^{18–19} (Wēū cī Judath riōp luoi rēc cī looi, aaci yen ke dom ṽōc, dom yen reet yen yeyic thīn ku thou. Kēnē, aaci kōc ke ciēṅ Jeruthalem piṅ ēbēn, ku jōlkē dom kēnē aa cōl thuōṅden, rin cōl Akeldama, ku wetde yic “Ee Dom Riēm.”)

²⁰ “Ku aci gōt athōr Waak Nhialic yic ēlä,
‘Bī yönde yic cien kē tō thīn, ku cīn raan ciēṅ thīn.’

“Ku ēci gōt aya kēlä,
‘Bī raan det nyiende löök yic luoi yic.’

^{21–22} “Kēya, raan adhil rot māt ṽo, ku bī ṅic cīmēnda lōn cī Jethu Bānyda rot jōt raṅ yic. Raan buk māt yoyiic adhil a raan tōṅ akuōtda. Ku ē raan ṅic kāṅ tēṽon jōk Joon luōiden miōc nom cōk, ku jōl a tēwäär ye yok cath kek Jethu agut akōl jiël yen tēnē ṽo bī yāth nhial.”

²³ Ku jōlkē kōc karou gut rin, Jothep ku ē ṅic aya ke cōl Barthabath (ē cōl Juthtuth aya), ku Mathayo. ²⁴ Ku rōökkē ēlä, “Beny, yīn aṅic kē tō raan ēbēn puōu, kēya, nyuōth ṽo raan tōṅ nhar kamken karou, ²⁵ ku bī luui ke ya atuuc nyin Judath wäär cī nyāāṅ piny, ku ler tēnē yen ye tēde.” ²⁶ Ku jōlkē cuet gek, ku bik raan tōk kuany kam ē kōckā karou. Ku raan yen cik ben lōc ē ye Mathayo, ku jōl met akut atuuc kathiäär ku tōk yic.

Ben Wēi Nhialic

2 ¹ Na la akōl Yan Ayum cīn yic luōu ben, ka atuuc Jethu kuut kenhīim yön tōk. ² Kam wën ke pek wei arōōl det piṅkē nhial, ku yen arōōl kēnē ē cīt arōōl yomdit ril. Ku jōl arōōl yön awēn rēer kek thīn thiōōṅ yic. ³ Ku tiṅkē lōk mac cīt liep ke tek rot piny, ku raan tōk kamken ē ye kē cīt liem mac nyuc yenhom. ⁴ Keek ēbēn, aake cī Wēi Nhialic löōny kegup ku jīemkē thok kōk, rin cī Wēi Nhialic ke yiēk riel ku bik jam thok kōk cie thuokken.

⁵ Kōc juēc Itharel ke ciēṅ wuōt kōk yiic pinynhom, kōc ke ye Nhialic door aake rēer Jeruthalem ē nīnkā. ⁶ Wēn cī kek arōōl piṅ, go kōc juēc rōt kuōōt. Kōc ke cī rōt kuōōt aake cī gāi, kē ye atuuc Jethu jam thuokken. ⁷ Wēn cī kek gāi apeidit gokē jam ke cī kerōt jōt apei, “Keek kōc jam kēlä aa kōc Galilia! ⁸ Ye kēdē, bik aa jam thuokkua? ⁹ Yook ēbēn yok aa kōc wuōt kōk cīmēn Parthia, Mede ku Elam, ku jōl aa Methopotamia, Judia, ku Kapadokia, ku Pontuth ku Athia. ¹⁰ Ku jōl aa Prigia ku Pampilia. Ku jōl a Ijip ku beei kōk pan Libia thiääk kek Thirene. Ku kōc kōk yoyiic aa kōc wun cōl Roma. ¹¹ Kōc kōk aa kuat Itharel. Ku kōc cie kōc Itharel cī yāthken waar bik yanh Itharel gam. Ku kōc kōk yoyiic aa kōc pan Kret ku pan Arab. Ku ē yen ṅot ye yok ke piṅ ke jam thuokkua, ke luel kādīt cī Nhialic looi.” ¹² Aake cī gāi, ku muumkē nhīim kē bik luel, gokē rōt aa thiēec kamken, “Yēṅō ye nyuōth yen kēnē?”

¹³ Go kōc kōk atuuc Jethu bui, ku luelkē ēlä, “Kōckā aaci wīeet mōu!”

Jam Pīter tēnē kōc Itharel

¹⁴ Tenē, ke Pīter kam atuuc Jethu kathiäär ku tōk jōt rot, ku kēec ku jōl jam ke cī yerōl jōt tēnē kōc Itharel awēn cī rōt kuōōt, “Wek wārkie, wāmāthkie Itharel, ku jōl aa wek kōc ciēṅ gen Jeruthalem, piṅkē wetdie apath, ku ba we lek kē cī rot looi. ¹⁵ Kōc yakē luel ka cī muōl mōu, aa kēc wīeet, tēcīt tē ye wek ye tak thīn, akōl akēc tōōṅ, aṅot ye riel. ¹⁶ Ku wet cī Juel raan kāk Nhialic tiṅ luel wäär akīn,

¹⁷ ‘Acī Nhialic luel, lōn kē bī looi akōl le nīn thōk akīn,

Yen abī Weikie tuōc kōc ēbēn.

Wātkun ku nyierkun aabi kē bī rot looi akōldā lek kōc.

Riēnythii kun aabi nyuōth, ku rōörkun dīt aabi nyuāāth arak juēc aya.

¹⁸ Ee yeen, agut aluakkie röör ku diäär, ninkui bi ben.

Yen abi weikie tuöc koc e ninkä, ku keek aabi käk bi röt looi aa lek koc.

¹⁹ Yen abi kädit jäṅ göi looi nhial, ku käjuéc jäṅ göi aaba looi pinyhom.

Pinyhom abi thiāṅ riem, ku mac, ku jol a tol dittet.

²⁰ Aköl abi nüip nyin, ku peei abi thieth cimën riem

ee kaam kéc aköldit puoth ben Bányda guo yëet.

²¹ Ku raan bi Nhialic rök ku bi ye kony abi poth bi cii la pan mac.'

²² "Pieṅkë wëlkä, wek wämäthkien cöl Itharel! Jethu raan pan Nadharet e ye raan ci riel Bányda nyuöth ke cïn diu käkken dit jäṅ göi ci Nhialic looi rienke. Ee kë ṅieckë kek we, rin aaci röt looi kamkun. ²³ Cït te ci Nhialic ye guieer thïn, Jethu e bi thön we, ku bäk nöc cimën ci wek ye puöl ku bi koc rec la gup adumuööm nöc, ku pieetkë tim ci riüu köu. ²⁴ Ku yeen aci Nhialic cöl aben pïr thou yic, wën ci yen Jethu nyaai rielde thou yic, rin ecii rot köṅ lëu yen lön bi Jethu teem thou yic.

²⁵ "Aṅicku lön ecii rot bi lëu rin ecï Debit lueel ëlä,

'Yen ee Nhialic tiṅ ṅanhom akölrïëc ëbën,

ku yen athiök kek yen, ku yen acin kë bä diir.

²⁶ Rin ee wet kënë, yen amit puöu.

Ku wël ya lueel aa wël raan mit puöu.

Ku cök amën bi yen thou, ke yen abi thiök ke ya ṅöth kë bi Nhialic luöi yen,

²⁷ rin Nhialic acii guäpdie bi puöl bi rëer kam koc ci thou,

ku Nhialic acii ya bi puöl ba dhiäth raṅ yic yen raande.

²⁸ Yin Nhialic, yin acä nyuöth dhël pïr akölrïëc ëbën,

ku jol aa reerdu kek yen, abä cöl amit puöu.'

²⁹ "Wämäthkie, wek aaba dhiel lek kë ṅieck rin wädan dit ci wëlkä lueel. Yen Debit aci thou ku thiäk, ku raṅde kin aa deei yok, agut ci ya aköl. ³⁰ Yen Benyṅaknhom wäär pïr yen e ye raan kṅṅ tiṅ, käk bi röt looi aköldä, ku lëc ke koc, ku e ṅieck kë ci Nhialic lueel ke bi luöi ye. Nhialic ecï yepuöu tōṅ lön nadë ke bi raan töc kuantde yic, looi keye beny cimënde. ³¹ Debit ecï kë bi Nhialic looi tiṅ, go jäl jam lön bi Raan ci loc ku doc rot jot raṅ yic wën ci yen ye lueel ëlä, 'Yen e këc nyääṅ kam koc ci thou, guäpde e këc dhiäth raṅ yic.'

³² "Nhialic ecï Jethu jöt bei raṅ yic bi ben pïr, ku yen ku atuuc köc Jethu acuk tiṅ yen yiny ci rot looi.

³³ Jethu aci jat nhial ku nyuuc köṅ cuëc Wun, ku e yen aci yok tuöc Wëi Nhialic, cït tewäär ci Nhialic ye lueel thïn. Ku kë cäk tiṅ ku pieṅkë emën e ye kën ci Nhialic lueel ka bi tuöc yen aci lööny yogup. ³⁴ Acie Debit yen ci la nhial, ee ci lueel,

'Ee ci Nhialic lek Bánydie, "Nyuc e ten köṅdien cuëc,

³⁵ agut aköl bi yen koc man yün cöl aloi nhïim, ku bik yicök."'

³⁶ "Wek koc pan Itharel ëbën, dhielkë ṅieck alanden lön nadë ke Jethu yen cäk piäat tim ci riüu köu, yen aci Nhialic looi bi ya yen Beny, ku ye Raan ci loc ku doc."

³⁷ Wën ci koc ci röt kuööt wet Pïter piṅ, gokë ya tak yic ke dieer kë bik looi, ku thiëckë Pïter ku atuuc köc Jethu, "Buk ṅö looi wämäthakua?"

³⁸ Go Pïter beer, "Dhuökkë wepuöth ciëen adumuöömku yic, ku calkë röt aa muoc nhïim bäk aa koc Jethu Kritho, ku bi Nhialic adumuöömku päl piny, ku wek aabi Nhialic muoc weike, ku bi lööny wegup. ³⁹ Kënë yen ci Nhialic yepuöu tōṅ, ka bi yiëc we ku miethkun, ku koc beei köc mec, ku koc ëbën ye Bányda Nhialic cöl bik aa kacke."

⁴⁰ Pïter aci koc lek ku jiëem kenhïim ëlä, "Kuonykë röt ku bäk liu awuöc yic, awuöc yen bi tem koc rec akölë!" ⁴¹ Koc juëc e koc awën yic aaci kë ci Pïter lek ke gam, ku cölkë röt amuoc nhïim, ku e cït tenë raan tiim kadiäk kek aaci ben muoc nhïim aköl kënë, ku metkë akuötten yic.

⁴² Keek aaci rëer bi atuuc Jethu ke piöc, ku yekë atuuc Jethu kony käk yekë looi yic ku miethkë tetök, ku yekë röm ku röökkë tetök.

Te ci koc ci wet Jethu gam pïr thïn kamken

⁴³ Käjuéc jäṅ göi aaci Nhialic cöl aa looi atuuc Jethu, ku yen aci koc juëc cöl ariöc. ⁴⁴ Koc ci gam ëbën aaci rëer bik ceṅ tetök, ku yekë röt kony kedhie bik kṅṅ aa weer kamken. ⁴⁵ Aaci käk tö ke ke beei yic aa yaac wei, ku yekë wëü tek röt, ku raan töc e ye yiëc wëü bi käkken wic lëu. ⁴⁶ Kek koc ci wet Jethu gam aake ye röm akölaköl luëc Nhialic koc Itharel yic, ku yekë röm bääiken yic ku miethkë ke cii müith beth ku rëerke

ke mit puõth, ⁴⁷ ku yekë Nhialic leec ku lec kòc kòk ke aya. Ku ye Nhialic akuõtden juak yic akòlakòl kòc kek cì Nhialic còl aa poth kèrac yic.

Raan aduany acì kony

3 ¹ Yòn akäl tók, tääñ akòl, te ye kòc röök, Pìter ku jòl a Joon aake cì la kal luañ Nhialic ye kòc Itharel röök thìn bïk la röök. ² Wën cì kek yet kal còl Kal Dhëñ thok, ke yök mony cì dhiëth ke ye aduany. Yen mony kënë ë ye cool te jòt ye kal thok, ku bï kòc la kal luañ Nhialic ya lim wëü. ³ Nawën tiñ Pìter ku Joon ke la kal yic goke lim. ⁴ Gokë dõt nyin ku lëk Pìter ye, “Daai ë yook!” ⁵ Goke dõt, ku ye yök yepuõu ciet la kè bï yök tënë ke.

⁶ Go Pìter lek ye, “Yen acin wëü ba yiëk yì, ku yin aba yiëk kè tó kek ya, ‘Yin aya yöök, rin Jethu raan Nadharet, jòt rot ku ba cath!’ ” ⁷ Ku ðòm kõñ cuëc, ku kony bï rot jòt. Kaam wën ke còk ku kuiëc monytui go guo riel, ⁸ ku puur rot nhial ku keec còkke ku cieth. Ku ler kal luañ Nhialic ke keek ke cath ke thuëet nhial, ke lec Nhialic. ⁹ Ku kòc tó luañ Nhialic ëbën ë cik tiñ ke cath, ke lec Nhialic, ¹⁰ ku wën cì kek ye ñic ke mony dhie nyuc kal còl Kal Dhëñ thok ku lìm, gokë gäi apeidit ku nyamkë kethook, ku yekë röt thiëc kè cì rot looi tënë ye.

Jam Pìter luañ Nhialic

¹¹ Wën cì mony aduany Pìter ku Joon kuak yiëth, go kòc ke tó kal luañ Nhialic yic gäi ëbën, ku riñkë tewën rëer kek thìn kät còk, Kän Tholomon kal luañ Nhialic yic. ¹² Nawën tiñ Pìter kòc, ke lueel, “Wek kòc Itharel, yeñö ye wek gäi kè cì rot looi, ku yakë liith yo? Yakë tak lòn nadë ke ye rielda ku piathda yöpec yen kony yok mony kënë bï cath? ¹³ Nhialic wärkuan dît Abaram, ku Ithäk, ku Jakop yen acì riel yiëk aluonyde Jethu. Ku yen aa cäk gam tënë kòc kek ke mac baai, ku wek aaci jai bï Pilato cii lony còk alòn wic yen ye bï lony. ¹⁴ Yen Jethu ë ye raan Nhialic ku ë ye raan path, ku wek aaci kuc ye, ku lekkë Pilato bï wetdun gam bï raan yen cì kòc nök lony, ku ye Jethu yen nek. ¹⁵ Ku ë këya, wek aaci raan nök raan yen dhël pìr nyooth, ku yeen acì Nhialic jòt rañ yic bï pìr ku acuk tiñ ke cì rot looi. ¹⁶ Ee rielde yen Jethu, yen acì mony aduany còl acath. Kè cäk tiñ, ku ñieckë ë loi ku wet cì yok Jethu gam, ee wet cì yok wet Jethu gam yen acì ye còl apuol, agut te cieth yen wenhüm cìt ëmën.

¹⁷ “Ku ëmën wek wämäthkie, anjeckë yen kè cäk looi kek we ku banykun cì wek Jethu nök, ee luoikë ke kuöckë. ¹⁸ Eci Nhialic lek kòc käk Nhialic tiñ theer lòn bï raan luäk kòc gum, ku yen acì rot dhiëel thìn ke ye yic këya. ¹⁹ Ke yeen, pälkë luoi käreec, ku ye wet Nhialic yen gamkë, ku bï Nhialic adumuõöm cäk looi päl piny, ²⁰ ku na luoikë këya, ka aköldä ke Nhialic abï we yiëk riel Weike, ku abï we tuõc Jethu yen cì lóc tënë we ku bï we kony. ²¹ Jethu abï rëer pan Nhialic agut akòl bï kån ëbën ben waar piiny bik aa yam, cìt te cì Nhialic ye lueel thìn theer wäär tënë kocken kække tiñ.

²² “Yeen ëci Mothith lueel ëlä, ‘Nhialicdun abï we tuõc raan kån tiñ, cìmën cì yen ya tuõc we, ku yeen abï ya raan kuatdun. ²³ Ku wek aadhil këriëc ëbën bï lek we gam. Ku raan cii wël raan kån tiñ bï gam, acii bï mat kòc Nhialic yiic.’ ²⁴ Ku kòc kån tiñ, la kè cik lueel agut cì Thamel, ku kòc cì lök ben yecök aaci kè loi rot ë ninkä lueel. ²⁵ Käk cì Nhialic lueel ka bï luoi we, käk cì kòc kån tiñ lek we aa kakkun. Ku week dhielkë röt mat thìn, ku bäk kè cì Nhialic lek wärkun dît ka bï yiëk ke tek wedhie. Cìmën yòn cì yen ye lek Abaram ëlä, ‘Ku kuatdu yic yen abï yèn kòc pinyhom döc.’ ²⁶ Ke yen Nhialic acì raan bï këde ben looi lóc, còl Jethu ku tuuc tueñ, ku bï we döc, ku bï we còl awel wepuõth wei luoi käreec yiic.”

Pìter ku Joon aaci yäth luk yic

4 ¹ Tewën jieem Pìter tënë kòc ku Joon ke kääc yelõöm, ke kòc kòk käk Nhialic, ku beny apuruuk yòn Nhialic tiit, ku jòl aa kòcdit kòk, kòc akut Thaduthi bö. ² Keek aake cii puõth mit wet ye Pìter ku Joon kòc piõc lòn nadë ke Jethu acì rot jòt kam kòc cì thou. Kënë aye nyuõth lòn nadë raan cì thou alëu bï ben pìr. ³ Gokë ke ðòm ku lek ke mac agut yòn nhiäk, rin cì akòl cuol. ⁴ Ku kòc juëc cì wet Pìter piñ aaci gam, ku juakkë röt bïk ciet tiim kadhiëc.

⁵ Nawën akòl deetë ke bany Itharel ku kòcdit baai, ku jòl aa kòc piõc löön, kuut kenhüm Jeruthalem. ⁶ Keek aacä amat jäl looi kek raandit käk Nhialic còl Anath, ku jòl aa Kaipa, ku Joon, ku Alekdhänder, ku kòc kòk many Anath thok. ⁷ Keek aaci Pìter ku Joon còl aabi kenhüm, ku jolkë ke thiëc, “Ee luoikë këde ku bï raan aduany cath? Ye riel nõ yen tó kek we ku ye rin ña yen looi wek ye?”

⁸ Go Piter ke cī guōp thiān riel Wēi Nhialic, dhuōk ke, “Wek bāny ku kōcdit baai. ⁹ Na yakē yo thiēec yakōl kēpuōth cī looi tēnē raan aduany ku te cī ye kuōny thīn, ¹⁰ ka dhielkē njic, ku adhil kōc Itharel njic ēbēn, lōn raan kāac wenhūim ke cī pial, ee riel Jethu raan Nadharet wāār cāk piāāt tim cī riū kōu, ku jot Nhialic rañ yic. ¹¹ Jethu ē yen raan cī wetde gōt athōr theer wēl Nhialic yic ēlā, ‘Mēn yen cī wek kuc wek atēēt loi yōt, yen aci ben yōk ke ye mēn ril apeidit.’

¹² “Ee yen Jethu yen abī kōc cōl apoth la pan mac, ee yen raan tōōn yen cī Nhialic yiēk riel pinynhom ku bī yo kony.”

¹³ Go bāny luk jāl gāi wēn cī kek Piter ku Joon tiñ te cī kek puōth ril thīn, ku keek aake ye kōc ē path kēc piōc. Yeen aciñ njic lōn nadē ke keek aake ye cath kek Jethu. ¹⁴ Ku aciñ kē cik lueel, rin cī kek raan aduany wēn cī kony tiñ ke kāac kek Piter ku Joon. ¹⁵ Go bāny Piter ku Joon yōōk bik la ayeer yōōt ku lökkē jāam yic kepec. ¹⁶ Ku jōlkē rōt jāl thiēec kamken, “Ye kēn nō buk luōi ē kōckā? Raan ēbēn Jeruthalem añic kē cī rot looi, kēdit jāñ gōi cīt ē kēn cik looi, ku aciñ lēu buk jai. ¹⁷ Ku rin buk cīi pāl, bī kē cī rot looi thiēi baai yic, ke keek abuk yōōk bik cīi ben jam tēnē raan det rin Jethu.”

¹⁸ Ku jōlkē Piter ku Joon caal yōt ku lēkkē ke, cōk alōn ben nō yiēndē, ke duōkkē ben jam, duōkkē kōc ben piōc rin Jethu. ¹⁹ Go Piter ku Joon dhuōk ke, “Week nhūim aleukē bāk guō luk te ye Nhialic tieñ ye lōn bī ya wetdun yen buk gam, ku lōn ye yen wet Nhialic. ²⁰ Yook acuk lēu buk kōōc, buk cīi ben jam rin Jethu, rin cī yok kākken cī looi tiñ, ku piñku wēl cī lueel.” ²¹ Go bāny luk ke thōn apei bik cīi ben jam rin Jethu, ku lonykē ke bik jāl. Ee cī bāny luk tiñ lōn ril yen yic, bik ke tem awuōc, rin kōc aake tō kelōm ku aake ye kiu, ku aake lec Nhialic wet kēpuōth cī rot looi.

²² Mony aduany yen cik cōl apuōl ē ye raandit, ruōnke aake ye thiārñuan ku te kac.

Kōc cī gam aci rōōk bik cīi riōc

²³ Nyin yic tewēn cī ke lony, ke Piter ku Joon dhuk tēnē kōc akuōtden, ku lēkkē ke kā cī kōcdit kāk Nhialic ku kōcdit baai lek ke. ²⁴ Nawēn piñkē ē wēlkā, ke rōōk Nhialic puōu ēbēn ēlā, “Beny, yīn Aciēñ nhial ku piny ku wēr ku kāk pīr thīn ēbēn! ²⁵ Yīn aci Weiku tooc bī Wādan dit theer Debit, raan ye aluōnydu wetdu lek kōc, ku ēcī lueel ēlā,

‘Yeñō cī kōc cie kōc Itharel puōth riāāk apei kēlā,
yeñō cī kōc kekōōth wel bik kārec aa looi tēnē Nhialic?’

²⁶ Bānydit ē pinynhom aake cī rōt guiir, ku mat kōc ke mec bei kenhūim,
bik kērac luōi Nhialic ku jōl a Raan cī lōc ku dōc,
raan bī Nhialic tuōōc piny.’

²⁷ “Ku yeen ē ye yic, Antipāth Yērot ku Pilato aake cī mat kedhie Jeruthalem ē ten kek kōc cie kōc Itharel, ku jōl aa kōc Itharel rin Jethu aluāñdun cīn guōp acuōl, ku yeen ē yen ca looi ke ye Raan cī lōc ku dōc. ²⁸ Keek aake cī kenhūim mat, ku bik kākku ke ca tak riēdu theer, ka bī rōt looi, bik ke looi. ²⁹ Ku yeen ēmēn beny, tiñ ke aci yok cuek thook, kony yok, yok aluakku, ku buk wetdu aa lek kōc ke cīn riōōc. ³⁰ Kony yo, tar yīcin riel kōñdu, buk kōc aa kony ku yiēk yo riel buk kādit kōc gōi aa looi rin aluāñdun cīn guōp acuōl Jethu.”

³¹ Wēn cī kek jāl thōk rōōk, ke la kē yiēek ten awēn met kek thīn. Keek aake cī Wēi Nhialic ben kegup, ku jōlkē guō jōōk bik wet Nhialic piōōc tēnē kōc ke cīn riōōc.

³² Akut kōc cī gam ēcī mat ē tōk. Ee cīn raan tōōn ye luel kamken lōn nadē kāk tō kek ye aa kākke yetōk, ku aake kāk rēer ke ke rōm. ³³ Atuuc Jethu aake cī Nhialic yiēk riēdit, ku bik aa lueel ke cīi riōc lōn cī Jethu Bānyda rot jot rañ yic. Ku keek aya, aake cī Nhialic dōc apeidit. ^{34–35} Ē cīn raan tōñ nōñ akuōtden yic. Kōc ke la dum kamken ku yōōt aake cik yaac, ku bīikē wēū cik kek kāñ yaac, ku yekē ke gām atuuc Jethu. Ku wēū aake yekē tek rōt cīt kēwic raan tōk kamken.

^{36–37} Ku kēya, Jothep raan dhiēnh Lebī, dhiēth pan Thaipruth, ku yeen ē ye atuuc Jethu cōl, ke cōl Barnaba (ku wetde yic “Ee raan kōc riēl puōth”) ecī duōmde yaac wei aya, ku bīi wēū ēbēn ku gem ke atuuc Jethu.

Anyikōl Ananiath kek Thapira

5 ¹ Mony cōl Ananiath ē tō thīn ku jōl a tieñde Thapira. Keek aake cī abek kākken baai yaac wei. ² Ku yen Ananiath ecī wet mat yic kek tieñde ku bik wēū abek thiaan, ku yīkkē atuuc Jethu abek. ³ Go Piter Ananiath jāl thiēec ēlā, “Yīn Ananiath, ē rin nō cōl yīn rot alēu jōñrac, ku ba Wēi Nhialic ben lek lueth, ku yīn amuk abek wēū kek cī yīn ke kākku yaac wei? ⁴ Tewāār kēc yīn kāk paandu yaac, aake ye kākku, ku wēū cī yīn ke yaac aa kākku aya. Ye rin nō tek yīn kē cīt kēnē ba looi? Yīn aacie yok ca wēēñ, ee Nhialic

yen aca wëñj!”⁵ Kaam wën piñ Ananiath ye, ke wieek piny ku thou. Ku kóc ke cī ye piñ aaci ben riöc. ⁶ Go riënythii ke rëer yööt guäpde kuöth ku jötkë, ku lek thiök.

⁷ Kaam wën looi kënë rot, ke tiñ Ananiath bö yön wën tö Pīter thīn, ku ë kuc kë cī rot looi. ⁸ Go Pīter thiëc ëlä, “Lek ya yic, ye kakkä kek wëü ëbën cī wek kån yaac wek muonydu?” Go Thapira beer, “Ee teden, aa kek wëü ëbën.”

⁹ Go Pīter lek Thapira ëlä, “Yeñö tek wek ye wek muonydu bāk Wëi Nhialic them? Yeñö looi wek këcīt kënë, ca kóc bö kã piñ cök? Aa kóc ke cī muonydu la thiök, ku ëmën aya aabi jöt bik yi la thiök.” ¹⁰ Kaam wën, ke Thapira wieek piny ku thou nyin yic. Go riënythii ben yöt, ku tiñkë ke cī thou, gokë jöt ku lek thiök muonyde lööm. ¹¹ Kóc ke tö yön Nhialic ku kóc kök cī kë cī rot looi piñ, aaci ben riöc apeidit.

Käkdīt jāñ göi cī röt looi

¹² Käkdīt jāñ göi apeī aake cī atuuc Jethu aa looi kam kóc. Kóc ke cī wet Jethu gam aake ye mat ke ya akut Kän Tholomon cök. ¹³ Ee cīn raan tök kam kóc cie kóc akuötten cī ye tak bi met keyiic, cök aa lön ye kóc juëc ke leec. ¹⁴ Ku kóc juëc apeidit, yööm röör ku diäär ke cī wet Jethu gam, aake ye röt mat akuötten yic. ¹⁵ Wet kãpuöth ye kóc Jethu looi, aake cī kóc tuany cöl aaye kóc ruäai ke ke jat dhöl yiic, ke cī täac biök yiic, ku bi Pīter ke döc te cieth yen. Na cie këya, ku cök a atiemde ke kum ke piny ku bik pial. ¹⁶ Ku kóc juëc bæi thiäak kek Jeruthalem yiic, aaci kocken tuany ku kocken kök la gup jakrec ben aa bæi, ku aaci ke ben aa kony.

Atuuc Jethu aaci gum

¹⁷ Tewën, ke raandit kāk Nhialic, ku kocken rëer ke ye, ku jöl aa kóc ye buöth tö akut Thaduthi yic, aake cii puöth mit tënë atuuc Jethu. Gokë tak ku bik kërac looi tënë ke. ¹⁸ Ku dömkë atuuc Jethu ku riitkë ke yön ye kóc mac thīn. ¹⁹ Ku ë weer kënë, ka atuny Nhialic bö ku tuërkë ke bei yööt, ku wet kenhīm ayeer, ku lëk ke ëlä, ²⁰ “Lakkë luañ Nhialic, ku bāk kóc la piöc wet pīr yam cī Jethu lek we.” ²¹ Go atuuc Jethu wet cī lek ke piñ, ku lek luañ Nhialic durdur yic, ku jökkë piöc wet Nhialic. Go raandit kāk Nhialic kek kacke, kōcīt baai Itharel cöl ku bik ben luk yic, ku bik mat. Ku jölkë thok tuöc tënë apuruuk tit yön mec, ku bik atuuc Jethu kueeth luk yic. ²² Tewën yeet kóc wën cī tooc, ke keek akëc atuuc Jethu la yök yöt, gokë dhuk ku lek thok lek bäny luk ëlä, ²³ “Wën yeet yok, yok aaci yöt yök ke riet thook ku kóc tit ke kääc yethok. Nawën ñanyku thok ka cīn raan tööñ cuk yök alonñthīn.” ²⁴ Nawën piñ beny apuruuk luañ Nhialic tiit ku jöl aa kōcīt kāk Nhialic, gokë gäi kë cī rot luöi atuuc Jethu. ²⁵ Kaam wën, ke raan bö yöt ku lëk ke ëlä, “Pieñkë këdieen, kóc kek ke cäk riet yöt, aa rëer luañ Nhialic ëmën, ku aa piöc kóc wet Jethu!” ²⁶ Teen, go beny apuruuk la kek apuruuk bik ke diëc, ku biikë ke luk yic. Keek akëc atuuc Jethu kuaath, wet riöc kek ciet ke bi kóc ke nhīar atuuc Jethu biöök aleel.

²⁷ Tewën cī apuruuk atuuc Jethu jäl bæi luk yic, go raandit kāk Nhialic ke thiëc ëlä, ²⁸ “Wek aa we cī thōn apeidit ku bāk kóc cii ben piöc wet Jethu. Tieñkë kë cäk looi! Cī wek kóc piöc ëbën Jeruthalem, ku week awieckë ku bi aa yok ye gök lön nadë ka yok aa cöl Jethu anäk.”

²⁹ Go Pīter kek atuuc Jethu wet raandit kāk Nhialic dhuk nhom ëlä, “Yook, ee Nhialic yetök yen alëuku buk theek, ku aacie kóc ë path. ³⁰ Wek aaci Jethu nök, ku piätkë tim cī riü kōu, ku yeen aci Nhialic wärkuan dīt jöt thou yic. ³¹ Jethu aci Nhialic jöt bei rañ yic, ku le nyuöc kōñden cuëc ku looi ye beny, ku ë raan bi kóc kuöny bei käreec yiic. Ku yeen abi kóc Itharel päl kaam, ku bik kenhīm waar bik cii ben luui käreec, ku bi Nhialic adumuöömken päl piny. ³² Yok aaci kāk cī Nhialic looi tiñ, ku Wëi Nhialic aya, yen cī Nhialic tuöc kocken wetde gam, ee kāk cī Nhialic looi nyuöth kóc.”

³³ Tewën piñ bäny luk wet cī atuuc Jethu lek ke, gokë puöth riäak apeidit, ku wickë bik ke nök. ³⁴ Go raan tök kam bäny, Gamaliel, raan akut Parathi. Ku yeen ë ye raan piöc lööñ. Ku ë ye raan theek kóc Itharel apeidit, rot jöt luk yic ku lëk apuruuk ku bik atuuc Jethu kuaath ayeer luk yic. ³⁵ Ku jöl bäny luk lök jääm nhīm ëlä, “Wek kóc wuönda Itharel, takkë wenhīm apath kë wieckë bāk luöi ë kōckä. ³⁶ Wäär ë run thiökkä yiic raan cöl Theudath ëci tuöl, ku nyooth rot ke ya aciëñ dīt ril tör, abi raan buot kañuan röt mät ye. Yen Theudath aci ben nök, ku kóc ke cī wetde gam aaci ben thiäi, ku ë yen thök wetde. ³⁷ Raan cöl Judath ku ë ye raan wun cöl Galilia, ëci ben tuöl aya ruöñ yon kueen kóc, ku yeen ëci kóc rac nhīm agut bi raan tedīt wetde gam, ku yekë buöth cök. Yeen aya aci ben nök, ku weer kocken wäär ye buöth. ³⁸ Ku ëmën alek we, añueen bi cien këreec luöikë tënë ke. Añueen bāk ke puöl! Na yekë loikë, kë cī raan tak bi looi, ka ñuot bi guo yäi. ³⁹ Ku na ye Nhialic yen cī ke yiëk riel, ka cäk bi lëu. Rin wek aabi röt yök ke ye Nhialic yen thär kek we. Go bäny luk wet Gamaliel gam.”

⁴⁰ Ku cöolkē atuuc Jethu yöt, ku tēmkē ke awuöc bi ke that, ku thönkē kenhüim bik cii ben jam rin Jethu. Ku jölkē ke lony. ⁴¹ Teen atuuc Jethu aaci jal jäl luk yic ke ci puöth la yum wet ci Nhialic ke col agum, rin ci ke that wet Jethu. ⁴² Ku yekē koc piöoc wet Puöth Yam Jethu Kritho akölaköl luanj Nhialic koc Itharel, ku bäaiken yiic aya.

Koc kadhrou ē koc kony luoi aaci kuany

6 ¹ Tewen ci akuen koc biöth rot juak, akeek eci rot looi kamken, koc Itharel kek ke cieng Jeruthalem, ku koc Itharel jam thoŋ Girik. Koc Itharel jam thoŋ Girik ē yekē lueel lon nadē ke leerken aake cie kueec nhüim, rin cii ke ye muoc te tek wēu ye tek lēer akölaköl. ² Go atuuc Jethu kathiaar ku rou koc ci gam ebēn col ku lēkkē ke elä, “Yeen acie yic tēnē yo buk luoi piöoc wet Nhialic puöl ku ye wēu kek yeku tek. ³ Ke yen, wek wämäthkua, kuanykē koc kadhrou weyiic, koc path la gup riel Wēi Nhialic njic käng. Ku keek abuk col aaye wēu muk, ku yekē ke tek. ⁴ Ku yok aabi yonhüim yiēk röök ku jol a piöoc wet Nhialic.”

⁵ Koc ke ci gam aake ci puöth miet wet ci atuuc Jethu lek ke, ku kuanykē koc. Koc ke cik kuany aake yi Ithipin, raan la gam la guöp Wēi Nhialic, ku jol aa Pilipo, ku Prokoruth, ku Nikanora, ku Timon, ku Parmena, ku Nikola, ku yeen eci raan Itharel, ee ye raan pan col Antiök ci yanhde puöl ku gem yanh koc Itharel. ⁶ Ku jol koc ci kuany yäth tēnē atuuc Jethu, gökē röök rienken ku tæukē kecin kenhüim bik ke döc.

⁷ Ku piöoc wet Nhialic eci la tueŋ ke juak rot. Akuen koc biöth Jeruthalem ē yic juak akölaköl, ku akuendit apei koc käk Nhialic aci ben gam.

Bäny Itharel aaci Ithipin döm

⁸ Ithipin eci Nhialic döc bi col aril apei, go kädit jäng göi apeidit looi kam koc. ⁹ Ku koc abek akut amat ten koc Itharel aake cie wetde ye gam, ku keek aake njic lon ye ke col koc läau nhüim, wet ye kek koc aa loony ci puöl. Ku yen akut kēnē, ee la yic koc wun col Thirene ku Alekdhandria ku Cilicia ku Athia, ee cik jock bik aa teer kek Ithipin. ¹⁰ Ku yen Ithipin eci Wēi Nhialic yiēk riel njic yen ke wēl apei, na lueel wet, ka cin raan lēu ye bi wetde dhöl yic. ¹¹ Gokē koc kök riop, ku bik aa lek koc Itharel elä, “Yok aaci Ithipin piŋ ke jiēm Mothith ku Nhialic gup!” ¹² Tewen ci koc ci riop aa jam këya, teen ke keek aaci koc Itharel, ku kocken dit, ku jol aa koc piöoc lööŋ rac nhüim. Ku döm koc Itharel Ithipin ku yethkē luk yic. ¹³ Ku bükē koc kök bik Ithipin ben cak thok ku luelkē elä, “Mony kēnē, col Ithipin ē luanjan Itharel ku lööŋkuan Mothith dhöl yiic. ¹⁴ Acuk piŋ ke ye lueel lon nadē ke Jethu raan pan Nadharet abi luanjan Itharel thuör piny, ku weer cieŋdan theer Mothith yic.” ¹⁵ Go koc ke ci nyuc luk yic ebēn Ithipin jäl dot apei, ku tiŋkē ke cit nyin atuny Nhialic.

Jam Ithipin

7 ¹ Ku jol raandit käk Nhialic Ithipin thiēc elä, “Yekē yith kek käk ci köckä yi gaany?” ² Go Ithipin dhuk ku lueel, “Wek wärkie ku wämäthkie, piŋkē wetdie! Nhialic Madhol yen ye leec raan ebēn, eci rot nyuöth wadan dit Abaram yon not cieng yen pan Methopotamia, wäär kec yen guo kök bi la ceŋ pan Yaran. ³ Ku yen Abaram eci Nhialic yöök elä, ‘Nyään paandu ku kacku piny ku lor piny ba nyooth tēnē yi.’ ⁴ Go Abaram wunden nyään piny ku ler bi la ceŋ gen Yaran. Na wäär ci wun Abaram thou, go Nhialic Abaram yöök bi ben ceŋ ē wun yen cieng wek thin emen. ⁵ Acin aban piny cii Nhialic yiēk Abaram, ku eci thon lon bi yen Abaram gam ē piny kēnē bi ya pienyde kek mithken bi lök dhiēth aköldä. Tewäär yen lek Nhialic Abaram ē wet kēnē, ke Abaram ē cin mith ci dhiēth. ⁶ Nhialic ē cä Abaram yöök elä, ‘Miethku aabi ceŋ wun thäi kök run buot kaŋuan. Ku keek aabi ya aloony koc ē wun bi kek ceŋ thin, ku aabi ya jöör apeidit. ⁷ Ku yen abi koc kek bik aa luöi mac, ku na la run juēc thök, ke keek aabi jäl ye wun kēnē. Ku aabi ben bik yen ben door ē ten.’ ⁸ Ku ē teen aci Nhialic lek Abaram bi miethke aa noot, ku yen ē kin ye nyuöth lon ci kek döör. Ku Abaram aci wunden Ithäk ben noot nin kadhrou cök ciēn wäär dhiēth ye. Ku not Ithäk Jakop, ku not Jakop wätke kathiaar ku rou. Aa kek wärken dit kuat Itharel emen.”

⁹ “Weet Jakop aake man menhden col Jothep. Gokē yaac ku bi a lony pan Ijip. Ku Nhialic ē nhier Jothep. ¹⁰ Go Jothep kony bi puut bei karec yiic. Na la Jothep yäth benyŋaknhom Ijip nom, ke yik Nhialic riel bi käng njic ku ye raan path. Go benyŋaknhom ruök bi ya yen beny pan Ijip. Ku looi aya bi a yen tö tueŋ käk paande yiic. ¹¹ Ku cok eci tuöl pan Ijip ebēn ku jol a Kanaan. Ku yen ceŋ kēnē eci koc ban apei. Ee ril yic ku bi wärkuan dit mieth yök. ¹² Nawen le Jakop piŋ lon tö rap Ijip, go wätke kek wärkuan dit emen tooc ku bik la. ¹³ Na ben wärkuan dit ben dhuk cäth yic rou, go Jothep rot tet ke lon ē yen menhden ku jol benyŋaknhom

Ijip manyde ñic aya. ¹⁴ Ku tuc thok wun Jakop, ku bi lek wun kek manyden ebën kathiärdhorou ku dhiëc bik ben Ijip. ¹⁵ Go Jakop jäl la, ku ë yen te ci Jakop ku wärkuan dīt ben la thou thīn. ¹⁶ Gup wärkuan dīt aake ci ben la thiök te cöl Cikem, ku te ci ke thiök thīn, ee ye piny ʒɔɔc Abaram wëu tënë thāi cöl Yāmor.

¹⁷ “Na la nin thiök, nin kek ke ci Nhialic ke Abaram yöök lön nadë ka la këpuoθh bi luoi ye, ke akuën kockuan ke tö Ijip ëci ye yic juak apei. ¹⁸ Ku ëci rot looi bi beny det kuc Jothep pan Ijip mac. ¹⁹ Ku yen beny kënë ë ye wärkuan dīt wëñ ku kuc ke ciëñ. Ku ye ke cöl acuet miethken roor ku bi mīth thou. ²⁰ Ku teen ë yen ë dhiëeth Mothith, ku yen ë ye manh adheñ tënë Nhialic, ku muk baai pei kadiäk. ²¹ Ku nawën la cuat wīr, go nyen benyñaknhom la kuany ku muk ku looi ye manhde. ²² Mothith aci piöc tecit te ñic koc Ijip kññ thīn, agut abi ya raandit tet ku ye raan ñic kññ apeidit jam yith, ku jöl a luoi aya.

²³ “Na la run Mothith yet thiärñuan, go yenhom tak ku bi wämäthakën Itharel la tiñ te ciëñ kek thīn. ²⁴ Tewën ci yen wämäthakën la tiñ, go raan tök keyiic yök ke nek raan Ijip, go menhden näk kony, ku guur raande agut te nek yen raan awën thär kek raande. ²⁵ (Ee ci Mothith tak lön nadë ka bi kacke deet yic, lön bi Nhialic ye looi bi ke wëer bei loony yic. Ku akëckë deet.) ²⁶ Nayon nhiäk ke yök koc Itharel karou ke thär, go la ku dok ke. Ku jöl ke yöök ëlä, ‘Pieñkë këdie wek röörkä. Wek aa koc ruäai. Yenö kuc wek ceñ kamkun?’

²⁷ “Go raan tön wën ci raan tiaam Mothith piek wei, ku thiëc ëlä, ‘Yeña ci looi ba ya banyda. Ku ye beny det lëu ba luñda luk? ²⁸ Wic ba ya nöc cimen wäraköl nek yin ke raan Ijip?’ ²⁹ Tewën piñ Mothith ë wet kënë, go kat ku le ceñ Midian. Ku aci ben la dhiëth dhäk karou ë teen.

³⁰ “Wën ci Mothith ceñ ruöñ thiärñuan Midian, go atuny Nhialic rot nyuöth ye. Ku atuny nhial ëci Mothith tiñ kecit bun dep roor liet tethiäk kek gon Thina. ³¹ Go Mothith gai kë ci tiñ, ku cot rot but lööm ku bi tiñ apath. Go röl Nhialic piñ ke ye luel, ³² ‘Ee yen Nhialic ye wärkuön dīt door. Nhialic Abaram, ku Ithäk, ku Jakop.’ Go Mothith riöc arek bi lath ku ci këwën ben dot. ³³ Go Nhialic Mothith yöök, ‘Dek war bei, rin te keec yin thīn, ee te thek. ³⁴ Yen aci terec guum kackie thīn pan Ijip tiñ. Yen aci dhienden piñ. Ku yen aci ben ku ba ke ben kony. Bäär emën, ba yi tuoc Ijip.’ ”

³⁵ Ithipin aci la tueñ ke jam luk yic ëlä, “Mothith ëci koc Itharel kuc bik wetde ci piñ. Ee cik thiëc ëlä, ‘Yeña looi yi ba ya banyda ku ye luökkua luk?’ Yen Mothith ë yen ci Nhialic tooc ku bi ya beny, ku ye raan kony Itharel. Ku yen abi atuny Nhialic ci rot nyuöth ye bun dep yic, kony luode yic. ³⁶ Yen Mothith aci koc Itharel wet nhīm bei Ijip ke loi käk jññ göi pan Ijip, ku wäär teem wär aruöör, ku jöl a wäär rëer kek ror liet run kathiärñuan. ³⁷ Mothith ëci koc Itharel yöök, ‘Nhialic abi we tuoc raan bi we ben piöc wetde, raan käk Nhialic tiñ cimen ci yen ya tuoc we. Ku yen raan bi tuoc we abi ya raan kuatdun.’ ³⁸ Mothith ë yen reer kek koc Itharel ke ciëñ ror liet. Ee reer kek wärkuan dīt. Ku jöl a atuny nhial yen ci jam tënë ye gon Thina. Ee yen ye Nhialic yöök ku bi wetden pir akölriëc ebën ben lek koc.

³⁹ “Ku wärkuan dīt aake ci kuc ku bik wet Mothith ci piñ, keek aakëc luui wetde. Ku wickë bik dhuk Ijip. ⁴⁰ Gokë Aron yöök, ‘Thäth yo jak bi ke aa ket tueñ koc wat yonhīm te cieth yok. Akucku yen kë ci rot looi tënë Mothith yen wäär wët yo bei Ijip.’ ⁴¹ Keek aaci milän thööth ke ye jññ cit manh weñ, ku loikë yai bi kek yanhden cik looi aa door. Ku yekë jal näk. ⁴² Teen Nhialic aci yeköu ben wel ke. Ku pel ke bik aa kuel tö nhial kek yekë door, cimen ci ye göt athör koc käk Nhialic tiñ yic ëlä,

‘Wek koc Itharel! Ee cie yen, yen yakë näk yok.

Yon tö wek ror liet run kathiärñuan.

⁴³ Ee ye duël jññdun cöl Molok yakë ket.

Ku jöl atim ciëer, jññdun cöl Repan cäk guañ.

Aa kek ke jakkun cäk ke looi, bäk keek aa door.

Ke wek aaba tuoc wei, bäk yet Babilon köu ciëen.’

⁴⁴ “Wärkuan dīt aake la Duël yen ye nyuöth lön nadë ke Nhialic areer ke ke ror liet. Duël aci yik tecit te ci Nhialic ye lek Mothith thīn, ci looi tecit te ci ye nyuöth Mothith thīn. ⁴⁵ Ku yen duël kënë ëci wärkuan dīt aa thön miethken wätheer, agut te bi Jocua ye ë piny cuk ben rum tënë koc ke la ye. Wäär ye Nhialic ke cuop wei te bi yok. Ku jöl duël rëer agut wäär ye Debit benyñaknhom. ⁴⁶ Debit ë nhieer Nhialic. Ku ëci Nhialic thiëc ku bi puöl bi luak yik, luañ bi Nhialic Wundit Jakop ceñ thīn. ⁴⁷ Ku ë Tholomon yen aci luak ben buth.

⁴⁸ “Ku yen Nhialic Madhöl acie ceñ yööt yiic yööt ke yik. Cimen ye koc käk Nhialic tiñ ye luel ëlä,

⁴⁹ ‘Aci Nhialic luel, ke nhial yen tö thönydie thīn,

7:13Cäk 45:1, 16 7:14Cäk 45:9-10, 17-18; 46:27 7:15Cäk 46:1-7; 49:33 7:16Cäk 23:3-16; 33:19; 50:7-13; Joc 24:32
7:17-18B.bei 1:7-8 7:19B.bei 1:10-11, 22 7:20B.bei 2:2 7:21B.bei 2:3-10 7:23-29B.bei 2:11-15
7:29B.bei 18:3-4 7:30-34B.bei 3:1-10 7:35B.bei 2:14 7:36B.bei 7:5; 14:21; Kn 14:33 7:37L.rou 8:15, 18
7:38B.bei 19:1-20:17; L.rou 5:1-33 7:40B.bei 32:1 7:41B.bei 32:2-6 7:42-43Amo 5:25-27 7:44B.bei 25:9, 40
7:45Joc 3:14-17 7:462Tha 7:1-16; 1Läk 17:1-14 7:471Bñ 6:1-38; 2Läk 3:1-17

ku piny yen aye yen yacök tääu thïn.

Ye yön yindë yen bäk yik tënë yen?

Ye tenen yen lëu bi yen löŋ thïn!

⁵⁰ Cie yen ya looi kakkä ebën!

⁵¹ “Teril wek nhïim thïn! Wek aaci kuc bäk wet Nhialic cï piŋ, rin thönj wek puöth kek koc kéc Nhialic gam cïmën wärkun dit theer. Wek aaci kuc bäk wet cï Wëi Nhialic lek we cï gam.

⁵² “Le raan käk Nhialic tiŋ cï wärkuön dit puöl ke këckë nök? Wärkuön dit aaci koc cï Nhialic tooc nök, koc ke cie ya lueel lön raan bi kë wïc Nhialic bi looi, abi ben. Ku emën yen acäk gaany ku acäk col anäk.

⁵³ Aa wek cï lööŋ Nhialic thön, lööŋ kek ke cï atuny nhial thön wärkuön dit. Ku keek aa këckë ke gam!”

Ithipin aci biöök aleel

⁵⁴ Tewën piŋ bäny luk wël Ithipin, gokë puöth riääk apeidit ku kackë kethook tënë ye. ⁵⁵ Ku yen Ithipin eci Wëi Nhialic thönj guöp, go yenyin wel nhial ku deei, ku tiŋ riel diit Nhialic, ku tiŋ Jethu aya ke kääc Nhialic lööm köŋ cuëc.

⁵⁶ Go Ithipin bäny luk yöök jalkë tiŋ, “Yen aci nhial tiŋ ke liep yethok, ku yen aci Manh Raan tiŋ ke kääc Nhialic lööm köŋ cuëc.”

⁵⁷ Go bäny luk keyith kum ku reelkë apeï. Ku riŋkë Ithipin guöp, ⁵⁸ Ku yethkë ayeer geeu ku lek biöök aleel agut te thou yen. Koc kek ke näk ye aake cä alethken nyän riënythii col Thawul ku bi ke lök tiit. ⁵⁹ Keek aaci Ithipin jäl biöök aleel, ku Ithipin ë ye Nhialic col, “Bänydie Jethu, lor weikie!” ⁶⁰ Ithipin eci yenhiol guöt piny ku lueel ke cie röl jöt apeidit, “Nhialic! Duk ke gäk këreec cik luöi ya!” Wet këne aci lueel, ku thou nyin yic. Nääk cï Ithipin nök eci raan col Thawul gam. Ku mony col Thawul ë tö thïn. Ku yeen eci lön nek Ithipin gam.

Thawul aci koc cï gam col agum

8 ¹ Aköl nek Ithipin, yen aköl jöök yen rot bi koc ke cï wet Jethu gam Jeruthalem gum apeidit. Koc ke cï wet Jethu gam aake cï kat bik röt thiäi wuöt kök yiic, wuöt Judia ku Thamaria, ku atuuc Jethu kek aake cï döŋ Jeruthalem kepec. ² Koc ke cï wet Nhialic gam piänden ebën, aa kek cï Ithipin ben la thiök, ku jolkë dhiau apeï rienke.

³ Ku eci Thawul them bi koc cï wet Jethu gam col agum, rin yeen ë ye la panë ku panë, ke kuany beei yiic ebën, ku ë ye koc cï wet Jethu gam yoc bei yööt yiic, röör ku diäär, ku kueeth ke bi ke la mac.

Wet Puöth Yam aci piöoc Thamaria

⁴ Koc ke cï wet Jethu gam, cï thiëi wuöt kök yiic aake cï la cath wuöt yiic ebën, ku piöockë koc wet Nhialic. ⁵ Pilipo eci cath bi la gen Thamaria ku le koc piöoc thïn wet Jethu Kritho. ⁶ Koc ke cï kenhïim aa kuööt, aake cï kepuöth aa tääu piny ku bik kë lueel Pilipo aa piŋ apath. Keek aaci wet Pilipo aa piŋ ku tiŋkë käk jän göi cï aa looi. ⁷ Koc juëc aaci jakrec aa ben bei kegup ke dhiau apeï, ku koc cï ruai, ku koc kök cï ŋol aaci Pilipo col aa puöl. ⁸ Këya, koc Thamaria aaci puöth ben miet apeidit.

^{9–10} Ku mony col Thaimon ë ciëŋ gen Thamaria, ku yeen eci koc col agei kækken ye looi. Yeen eci rot looi ke ye raandit apeï, ku kuat koc ke ciëŋ geeu ebën aake cï kepuöth tääu piny ku piŋkë wetde. Ku ë cik aa lueel ëlä, “Jöŋ col Rieldit yen aci ben piny cïmën Thaimon.” ¹¹ Ku ë yic, Thaimon eci koc Thamaria col agei tewäär yen kækken kë looi jöŋ tö yeguöp, ku koc aake ye wetde buöth yic ku detkë yic. ¹² Nawën la koc Thamaria wet Pilipo gam, wet piöoc yen koc Wet Puöth Yam rin bäany Nhialic, ku rin Jethu Kritho, go röör ku diäär gam bik röt col aa muoc nhïim. ¹³ Yen Thaimon aya eci wet Nhialic gam, ku col rot amuoc nom, ku jolkë rëer tök kek Pilipo, ku yeen eci ben gäi tewën tiŋ yen käckdit jän göi ye Pilipo looi.

¹⁴ Go atuuc Jethu ke tö Jeruthalem piŋ lön nadë ke koc Thamaria aake cï wet Nhialic yet tënë ke. Gokë Pïter ku Joon tooc bik la tënë ke. ¹⁵ Nawën cï Pïter ku Joon yet Thamaria, gokë röök ku bi Wëi Nhialic lööny koc Thamaria gup. ¹⁶ Koc Thamaria aake cï muoc nhïim rin Jethu Kritho ku Wëi Nhialic ë ŋuot këc lööny kegup. ¹⁷ Go Pïter ku Joon kecin tääu kenhïim go Wëi Nhialic lööny kegup.

¹⁸ Tewën cï Thaimon ye tiŋ ke Wëi Nhialic cï lööny kegup, wën cï Pïter ku Joon, atuuc Jethu, keek döc, go wïc bi Pïter ku Joon gäm wëü, ¹⁹ ku jöl ke yöök, “Yiëkkë ya riel këne aya, rin na le raan daac, ke Wëi Nhialic lööny yeguöp.”

²⁰ Go Pïter wet Thaimon dhuk nom ku lueel, “Aŋueen diet yï ku weeku cuet pan mac ebën, rin ë yin ye tak diet yï yoc mioc Nhialic wëü. ²¹ Yin acie raan akuötda ku acin kën yï mat ke yo, rin piändu acii la cök

tënë Nhialic. ²² Dhuök yipuöu ciëen, ku päl luoi käreec, ku rööck Nhialic ku bi käreec ye tak cimën ë kënë päl piny. ²³ Yen aye tiñ yiguöp lön til yin yo apeidit, ku yiin aci käreec ye ke looi muör.”

²⁴ Go Thaimon Piter ku Joon yöök. “Röökkë tënë Nhialic rienkie, ku bi cien këreec loi rot tënë ya käk cä lueel yiic.”

²⁵ Tewën cì Piter ku Joon kóc Thamaria lek lön ye wet Nhialic ye lek ke yic, gokë dhuk Jeruthalem. Ku tewën dhuk kek, aake ye kóc piöcc Wet Puoth Yam Nhialic ë beei juëc cìk tääk yiic pan Thamaria.

Pilipo ku beny wëü Ithiöpia

²⁶ Atuny Nhialic ëcì Pilipo lek ëlä, “Guir rot ku kueny dhöl yic, dhöl jiël Jeruthalem bi la Gadha.” (Dhöl kën acie ben tääk ëmën.^a) ²⁷ Go Pilipo rot guir ku lööny dhöl. Ku teen, ke yök raan Ithiöpia, raan cì la Jeruthalem bi Nhialic la door. Ku yen mony kënë ëcì roc. Ku ë ye beny wëü muk wëü tiñ cöl Kandake, tiñ ye beny Ithiöpia, ²⁸ ku yen ë dhuk Ithiöpia riän thel mathiän. Tewën cieth yen dhöl yic, ee kuen athör Ithaya raan käk Nhialic tiñ. ²⁹ Ku ëcì Wëi Nhialic lek Pilipo, “Lör ku cath keyi thiäk rot riän thel mathiän.” ³⁰ Go Pilipo jäl riñ tethiäk kek ye ku piñ ke kuën athör Ithaya yic. Go jal thiëc, “Ye deet yic yen kë kuen?”

³¹ Go beny tööu wëü dhuk nom, “Ba jal deet yic këdë, ke cìn raan cie tet yic ya?” Ku yöök Pilipo bi la nhial riäi yic, bi cath kek ye. ³² Kënë yen kuen athör theer wël Nhialic yic akìn,

“Yen ee cìt amäl thel ku bi la teem röl,

acit manh amääl cie dhiau te teem nhiemde wei, ee cìn wet ye lueel.

³³ Yeen ee cì rac guöp, ku kóc aake cii kuc bik yienyde cii gam.

Acìn raan mithken bi döñ bi lök lueel,

bi käreec riëc akölë lök a lueel, rin cii pierde pinynhom guo cöl athök.”

³⁴ Ku jöl beny tööu wëü Pilipo yöök, “Lek ya, Ithaya jieem rin na, jieem rienke aye rin raandä?” ³⁵ Go Pilipo jal jam, ku jöck jamde këthiök awën cì beny tööu wëü kuen athör theer wël Nhialic yic. Ku jöl lek Wël Puoth Yam rin Jethu. ³⁶ Tewën cieth kek dhöl yic, ke yet te töu piu thün, go beny tööu wëü Pilipo jal thiëc, “Piu akik, yenö bä pëen ke ya cì muoc nom?”

^{37–38} Beny tööu wëü pan Ithiöpia aci raan kuath riäi yöök bi riäi cöl akäac, ku jöl Pilipo ku beny wëü la piny ku lek piu yiic, ku muoc Pilipo beny wëü Ithiöpia nom. ³⁹ Nawën cìk jäl ben bei piu yiic, go Wëi Nhialic Pilipo diër piny. Ku beny tööu wëü akëc Pilipo ben tiñ, go lööny dhöl ke dhuk panden, ku yeen ë mit puöu apeì. ⁴⁰ Pilipo aci rot yök ke cì yet gen cöl Adhotuth, ku ler ku piöcc kóc Wël Puoth Nhialic geeth yiic ëbën, gut te yet yen gen cöl Cetharia.

Thawul aci wet Jethu gam

(Luoì 22:6-16; 26:12-18)

9^{1–2} Thawul aci la tueñ ke riëc ye yen kóc buoth Beny riäac lön nek yen ke. Ee cì la tënë raandit käk Nhialic, ku bi ye la yiëk athöör tënë bány akut yanh Itharel reer gen Damathkuth, ku aye athörkä lek kóc Itharel tö Damathkuth, lön na la Thawul kóc cì wet Jethu gam yök, diäär ku röör, ke bi döm, ku kueeth ke Jeruthalem.

³ Tewën cieth Thawul dhöl yic ke la Damathkuth, ku wën cì yen jal thiök kek geu, ke kam thiin wën ke tiñ mac la biliny nhial, ku yer piny ëbën yelööm. ⁴ Ku wiik piny ku piñ raan röl ke jam ku lëk ye, “Thawul, Thawul! Ye rin nö cöl yin ya agum?”

⁵ Go Thawul thiëc ëlä, “Ee yin na Beny?” Go röl wën cì piñ dhuök ye, “Ee yen Jethu, yen raan jör. ⁶ Ku yiin jöt rot ëmën ku lör geuu, ku yin abi lek kë ba dhiel looi.”

⁷ Röör ke cath kek Thawul aake cì köcc, ke bit, ku keek ë cìn raan cìk tiñ, ku aake cì röl raan jam piñ.

⁸ Go Thawul rot jöt, nawën liep yenyin, ke cie piny ye tiñ. Go kóc ke cath kek ye döm cin ku thelkë, ke la Damathkuth. ⁹ Ku jöl rëer nin kadiäk ke cie daai, ku yeen ë ninkä yiic kadiäk ëcie dek piu ku ëcie mith.

¹⁰ Raan cöl Ananiath cì wet Nhialic gam ë reer Damathkuth. Ku ë la kën cì rot nyuöth ye, ku ë ye ten cì Nhialic ye cöl thün, “Ananiath.” Go Ananiath gam ku bëer, “Yen akìn Beny.”

^{11–12} Go Beny lek ye, “Jöt rot, ba la dhöl cöl, ‘Dhöl la cök,’ ku na yet pan raan cöl Judath ke yi thiëc raan cöl Thawul, raan wun Tarthuth. Yen Thawul aröök, ku yeen ala kë cì rot nyuöth ye lön cì yen ke raan käk Nhialic cöl Ananiath tiñ ke bö yöt, bi ye ben döcc, rin bi yen ke piny ben tiñ.”

¹³ Go Ananiath beer, “Beny, kóc juëc aacä lek käreec apeì ye raan kënë luoi kóc cì wetdu gam tö Jeruthalem.

¹⁴ Ku yeen aci ben Damathkuth tenë, ke cì raandit käk Nhialic yiëk riel, ku bi kóc yi door ben döm.”

^a8:26Dhöl kënë acie ben tääk ëmën rin diit lieet thün.

¹⁵ Go Nhialic lek Ananiath, “Lòc yen aca lòc, ku bì ya aluanđie. Yen abì ya còl anjic kòc cie kòc Itharel, ku jòl aa bánydít pinyhom èbèn, ku jòl aa kòc Itharel.” ¹⁶ Ku aba nyuòth ye, yen yen, yen te bì yen guum thìn wetdie.”

¹⁷ Go Ananiath lööny dhöl ku ler yön wèn rëer Thawul thìn, ku jòl dòc. Ku yöök Ananiath èlä, “Yin wämäath Thawul, Jethu yen Wèn Nhialic nom, yen cì rot nyuòth yì dhöl yic wäär bì yin acä tooc. Acä tooc, ku ba yì ben dòc ku ba ben daai, ku bì Wèi Nhialic lööny yìguòp.” ¹⁸ Kaam wèn, ke kacit ku ec rec lööny piny Thawul nyin ku ben piny tiñ. Ku jòt rot bì kööc ku còl rot amuoc nom, ¹⁹ nawèn cì jäl mith, ke ben riel yök. Thawul acì jäl rëer nìn lik Damathkuth kek kòc cì gam.

Thawul acì kòc piöcc Damathkuth

²⁰ Nawèn ke la ten amat kòc Itharel ku jieem rin Jethu. Ee cì kòc aa lek èlä, “Jethu è ye Wèn Nhialic.”

²¹ Kòc ke cì wet lueel Thawul piñ aacì ben gäi, ku yekè röt thiëc kamken, “Cie yen mony kënë wäär tò Jeruthalem, yen kòc cì wet Jethu gam nök? Ku cie yen bìi yen tenè emèn, bì kòc cì wet Jethu gam ben dòm ku kueth ke tenè raandit käk Nhialic?”

²² Ku yen Thawul ècì riel piöcc yic apeidit, rin käk ke ye lueel, aaye nyuòth lòn nadè ke Jethu yen è raan bì Nhialic tooc bì kòc ben luök, aake ye yith kòc rac nhüim, ku è cìn kèn ye kòc Itharel tò Damathkuth ben beer.

²³ Nawèn cì nìn juëc thök, ke kòc Itharel kuut kenhüim ku jolkè te bì kek Thawul næk thìn cät. ²⁴ Ku yen Thawul ècì ben lek kè cì kòc Itharel mat yic, kè bik luöi ye. Aake cì dhöl la ayeer kal geeu yic ben aa tiit thook aköl ku weer, rin na tääk thìn ke næk. ²⁵ Nayon akäl tök ke tæu kacken ye buòth alom yic, ku lueñkè teyör pany köu, ku jolkè luaac piny è wien.

Thawul acì dhuk Jeruthalem

²⁶ Thawul acì ben dhuk Jeruthalem ku them bì rot mat akut yic, akut abiöth. Ku akèc kòc ke cì wet Jethu gam, gam lòn cì Thawul rot wel ku bì ya raanden, ku keek aake ye riöcc è ye. ²⁷ Go Barnaba dòm cin ku yeth tenè atuuc Jethu. Ku jòl tet yic atuuc Jethu yen te cì Thawul Jethu tieñ thìn dhöl yic ke la Damathkuth, ku lòn cì Jethu jam tenè ye. Ku yeen aya ècì tet yic atuuc Jethu, yen te cì Thawul kòc piöcc thìn ke cì riöcc Damathkuth rin Jethu. ²⁸ Ku këya Thawul acì ben rëer ke ke. Ku jòl a cath gen Jeruthalem yic ke piöcc kòc rin Jethu ke cie nyin ye riöcc. ²⁹ Yeen aya acì ya jam ku teer wël kek kòc Itharel jam thon Girik, ku ècì köckä duer ben nök. ³⁰ Nawèn le kòc akuötde yök lòn wic ye bì nök, gokè nyaai ku yethkè te còl Cetharia ku jolkè la tuöcc Tarthuth.

³¹ Ku teen, yen è te cì kòc cì wet Nhialic gam nhüim ben lääu, ku rëerkè ke cìn riöcc geeth yiic èbèn, Judia, ku Galilia ku jòl a Thamaria. Akut kòc ke cì wet Nhialic gam ècì yeyic juak, ku ècì dit rin ye Wèi Nhialic ke kony, rin è kek rëer ke thek beny Jethu.

Piter acì la Lida ku Jopa

³² Piter acì beei juëc tääk yiic, na ye yön akäl tök ke la kòc cì wet Nhialic gam ciëñ pan còl Lida neem.

³³ Go Piter mony còl Ainieth yök Lida, ku yen mony kënë akèc cath run kabet rin cì yen ruai. ³⁴ Go Piter lek Ainieth èlä, “Ainieth, Jethu Kritho acì còl apuol. Jòt rot ku löm biöñdu.” Go Ainieth rot jòt nyin yic. ³⁵ Go kòc ke ciëñ Lida ku Caron Ainieth tiñ ke cath, gokè wet beny Jethu gam.

³⁶ Ku tiñ còl Tabitha cì gam è ciëñ Jopa. (Ku rienke yen tiñ kèn thon Girik è còl Dorkath, ku wetde yic, “Ee löcc.”) Ku è ye kápath looi ku kony kòc nõñ. ³⁷ Ke teen ècì tuany nawèn ke thou. Go guäpde lóok ku töu yön nhial. ³⁸ Pan còl Jopa ècì mec apeì ke Lida. Nawèn piñ kòc akut cì wet Jethu gam lòn rëer Piter Lida, gokè kòc karou tooc bik la lek ye èlä, “Lòc ben tenè yo.” ³⁹ Go Piter rot jal guiir ku lööny dhöl kek röör awèn karou. Nawèn le Jopa, ke yeth yön nhial. Ku guòp ècì diäär lëer gööm piny ke dhiau. Ku yekè aleth cì kòc yen Tabitha yön piir yen jäl aa nyuòth Piter. ⁴⁰ Go Piter kòc còl ala ayeer yööt, ku jòl yenhiol guöt piny bì röök, ku wël yenhom guòp raan ku lueel, “Tabitha, jòt rot!” Go Tabitha ye nyin jäl liep. Nawèn tiñ Piter go yeköu jòt piiny. ⁴¹ Go Piter dòm kök ku kony bì rot jòt. Ku jòl Piter kòc akut cì wet Jethu gam còl, ku jòl aa diäär lëer, ku jòl ke nyuòth Tabitha ke cì piir. ⁴² Thon cì Piter Tabitha còl aben piir acì jäl thiëi Jopa yic èbèn. Ku teen kòc juëc aacì wet beny Jethu ben gam. ⁴³ Ku jòl Piter ceñ nìn juëc pan raan biök duny còl Thaimon.

Kornelio aci Piter caal paande

10¹ Mony cöl Kornelio ë tö gen Cetharia. Ku yen ë ye beny mac apuruk bucot, “Ke ye cöl apuruuk Italia.”² Ku yeen ë ye raan path riöcc Nhialic. Yeen ku kacke aake ye Nhialic door. Ee ye koc Itharel nõn nyin kony, ku ë ye lac röök tënë Nhialic.

³ Nayon akäl tök, töõn aköl, ke kädän bö këcit nyuõth, ku tinj atuny nhial ke bö ku lueel tënë ye, “Kornelio!”

⁴ Go Kornelio atuny nhial dot ke ci riöcc ku lueel, “Ye këne nõ Beny?” Go atuny nhial dhuök ye, “Nhialic aci röökku pinj, ku aci kuõny ye looi tënë koc nõn nyin tinj aya. Ku awic bi ke dhuk nhim.”⁵ Tuoc koc Jopa emen bik mony cöl Thaimon Piter la cöl. ⁶ Yeen arer pan raan duny biök cöl Thaimon, war nom.”⁷ Tewen ci atuny nhial awen luel ë wëlkä jal, ke Kornelio cöl koc karou ken lui baai, ku cöl apurukden tiit baai ë Nhialic door, ⁸ ku lek ke wet ci atuny nhial lueel, ku tooc ke Jopa.

⁹ Nayon aköl deet, ke röör awen nõot dhöl yic, ke ci thiök kek Jopa, ke Piter la yon nhial thok tecit aköl ciel yic bi la röök. ¹⁰ Ku jol cok nõk, ku wic bi mith. Tewen guir mieth ke këcit nyuõth loi rot tënë ye, ¹¹ ku tinj nhial ke ci rot liep, ku luëc kädän rot piny, këdit la tepei, la guök kaJuan, ¹² la yic kuat läai ebën, ku kak wuc keyõth piiny ku diet par nhial. ¹³ Ku pinj rol ke lek ye, “Jot rot Piter, nak lei ku cuet.”

¹⁴ Go Piter lueel, “Acie tede Beny! Yen akec kaJ mith kak cie cam cit kakkä.”

¹⁵ Go rol ben jam tënë ye, “Duk tak lon le yen ke ci path bi cam te ci Nhialic ye lueel ka path.” ¹⁶ Këne aci rol awen ber yic arak diak, nawen ke wien mit, ku dhuk nhial.

¹⁷ Ku gei Piter ke wic Nhialic bi lek ye ë nyuõth këne yic. Ku ë kaam awen ke koc ci Kornelio tooc aaci te reer pan Thaimon thin njic, ka kaac yol thok. ¹⁸ Ku cöotkë ku thiëckë, “Le jal tö baai ten cöl Thaimon Piter?”

¹⁹ Tewen nõt wic Piter ye bi nyuõth deet yic, ke lek Wei Nhialic ye, “Piter, pië yiyic, ala koc kadiak ci ben wic yi.” ²⁰ Guir rot ku lor piny, ku duk wet cieth kek yõn yic ba ci la ke ke, ee yen acöl ke aabö.” ²¹ Go Piter la piny ku lek ke, “Ee yen raan wieckë. Yenõ bi wek?”

²² Gokë beer, “Yok aaci beny apuruuk Kornelio tooc. Yeen ë raan path Nhialic door, ku yeen atheek koc Itharel ebën. Aci atuny Nhialic lek ye bi yi caal paande, rin bi yen wet ba la lek ye pinj.” ²³ Go Piter ke cöl, “Bak nienkë ë weer këne.”

Nawen bak piny ke Piter jiel ke ke, ku cath koc koc ci gam Jopa kek ye aya. ²⁴ Na aköl deet ke yet Cetharia te tiit Kornelio ye thin, kek kacke ku mähken ci cöl. ²⁵ Tewen dööt Piter baai, ke lor Kornelio ku gut yenhiaal piny yenhom. ²⁶ Go Piter cöl ajot rot bi köcc ku lueel, “Yen guöp, yen ë raan ë path.” ²⁷ Ku jol Piter jam kek Kornelio agut te yet kek yõt, ku yök koc juëc ke ci kenhim mat, ²⁸ ku lueel tënë ke, “Anjeckë lon lõndan Itharel ë raan pëen bi ci la beei kuat det yiic, ku ci met ke ke. Ku aci Nhialic nyuõth ya lon acin raan lueel ka la guöp karec. ²⁹ Këya, wen ci yin ya tuoc, yen aci ben ke cin diu, ku awiëc ba njic aya, yenõ tuc yin ya.”

³⁰ Go Kornelio lueel, “Wäär nin kadiak cok yen ya röök yõot ë ten, tecit menë tään aköl, kaam wen ke raan ceJ aleth yer apei bö ku keec yanhom, ³¹ ku lueel, ‘Kornelio! Nhialic aci röökku pinj, ku aci kuõny ye looi tënë koc nõn nyin tinj. ³² Tuoc raan Jopa bi mony cöl Thaimon Piter la cöl. Yeen arer pan raan duny biök cöl Thaimon tö war nom.’ ³³ Guo yi tuoc nyin yic. Ku yin aci këpath looi ba ben. Emen, yok aa reer ten ebën yo deei Nhialic, buk ke ci Nhialic lek yi ba lueel, pinj.”

Lõn Piter

³⁴ Go Piter jal jam ëlä, “Aca deet yic emen lon ë yic, Nhialic acie koc ë poc yiic. ³⁵ Kuat raan ye door ku looi këpath, aye gam. Acin këde kek kuat. ³⁶ Yin anjic wet ci lek koc Itharel, Wet Puoth Yam ci Jethu Beny mac koc ebën beei bi koc döör ke Nhialic. ³⁷ Yin anjic kädit ci röt looi pan Itharel ebën, jock wun Galilia, lõk wei wäär ye Joon lek koc cok ciëen. ³⁸ Yin anjic Jethu raan Nadharet, raan ci Nhialic loc ku cöl Weike abö tënë ye ku gem riel. Jethu ë ye la yon juëc yiic, ku looi këpath tënë koc. Ku kony koc la gup jakrec. ³⁹ Yok aaci këjuëc ci looi gen Jeruthalem ku pan Itharel ebën tinj, ayi ke ci ye piäat tim ci riü kou bi nõk. ⁴⁰ Ku ben Nhialic cöl apir ku jot bei piiny ran yic aköl ye nin diak, ku cöl anyuth rot yo. ⁴¹ Ku acie koc ebën aa yok koc yok ci Nhialic loc buk njic. Yok aaci mith ku dëkku kek ye wäär jon rotde cok ciëen. ⁴² Ku lek yo buk wetde lek koc, ku luelku lon ë yen aci Nhialic loc bi luk looi tënë raan ebën, koc pir ku koc ci thou. ⁴³ Koc ebën, koc kak Nhialic tinj aaci jam rienke, ku luelkë na gam raan wet Jethu, ke Nhialic apel karecke piny rienke.”

Koc cie koc Itharel aaci Wëi Nhialic lööny kegup

⁴⁴Tewën ɲot jieem Piter, ke Wëi Nhialic lööny koc awën piñ gup. ⁴⁵Ku koc Itharel wäär bö Jopa kek Piter aake cī gāi, rin cī kek Nhialic tiñ ke cī miöcde gām koc kuat det cie koc Itharel aya. ⁴⁶Rin aa cik tiñ ke jam thok kök, ku luelkë, “Nhialic adit.” Go Piter jam, ⁴⁷“Kockä aaci Wëi Nhialic ben tēnē ke cīmēnda aya. Nadë, le raan bi ke pēen bi ke cii muoc nhiiim?” ⁴⁸Ku col ke aa muoc nhiiim rin Jethu Kritho. Ku lek Kornelio Piter bi rēer ke ke nin lik.

Piter acä akut Jeruthalem lek kē cī looi

11 ¹Atuuc Jethu ku koc kök cī gam pan Judia yic ebën, ee cik piñ lön nadë ke koc cie koc Itharel aake cī wet Nhialic yet tēnē ke. ²Tewën cī Piter yet Jeruthalem, go koc ke wic ye ku bi koc cie kuat Itharel aa ɲoot ye jām guöp elä, ³“Yin yi ye jāl pan koc cie ɲoot, ku yin yi ye rōm ke ke!” ⁴Go Piter ke tet kēriēc ebën cī rot looi, ⁵“Wäär ē la kēn ca tiñ ke ya rōök gen Jopa. Ee la kēdiit la tēyēi, la guök kañuan, ca tiñ ke luec piny nhial, ku tēu piny ɲalōöm. ⁶Ku jāl luiit yic, guo lääi baai ku lääi roor ku jol aa lääi wuc keyiic, ku diet roor tiñ thīn. ⁷Ku pieñ röl ke ye lek ya, ‘Jot rot Piter, näk lääi ku cuet!’ ⁸Guo lueel, ‘Acie yic, Beny! Acin miith rec ca kañ cam cit kakkä.’ ⁹Guo röl ben piñ nhial. ‘Duk tak lön le yen kē cii path bi cam te cī Nhialic ye lueel ka path.’ ¹⁰Kēnē aci rot looi arak diäk, ku jol kēdiit la tēyēi la guök kañuan awën tō lääi thīn, miit ku dhuk nhial. ¹¹Kaam thiin awën ke rōör kadiäk cī tuöc ya te col Cetharia yēet pan awën rēer yen thīn. ¹²Ku eci Wëi Nhialic lek ya, ba nhom cii thiek ba cath ke ke. Ku jol kockä kadātem akutdan koc cī gam yic ya ruac, jāl Jopa agut Cetharia, ku lok pan Kornelio. ¹³Ku lek Kornelio ɲo lön cī yen atuny nhial tiñ ke kääc yenhom ɲönde ku lek ye, ‘Tuöc raan Jopa tēnē mony col Thaimon Piter bi ben. ¹⁴Yen abi lek wël bi yin ku miethku col apoth kērac yic.’ ¹⁵Nawën jaam, ke Wëi Nhialic lööny kegup cīmēn ɲon tueñ koñ yen lööny ɲogup. ¹⁶Ku jal kēnē cī Beny Jethu lueel ɲon tak, ‘Joon ē ye koc muoc nhiiim ē piu, ku wek aabi muoc nhiiim Wëi Nhialic.’ ¹⁷Acie kē lēu bi baai dhöl lön cī Nhialic kēnē yen cī yiök ɲo, yiök koc cie koc Itharel aya, ku ē yik ɲo wet cī ɲok wet Beny Jethu gam, ke yen ya ɲa, ba them ba Nhialic gël nhom!”

¹⁸Nawën piñkē wël cī Piter lueel, gokē cii ben jām guöp ku leckë Nhialic elä, “Kēn yen ē wic Nhialic aya, ku bi koc cie koc Itharel käreec yekē looi puöl, ku bik met pir akölrēc ebën yic!”

Koc cī gam pan col Antiök

¹⁹Koc ke cī gam aake cī wēer rin cī kek riöc lön nek ke cīmēn wäär cī Ithipin nök. Koc kök ke yiic aaci yet pan col Ponicia ku Thaipruth ku Antiök. Ku keek aake ye koc Itharel kepec kek aake ye lek wet yam Jethu. ²⁰Ku koc kök ke cī gam, ku aake ye koc pan Thaipruth ku Thirene, aake cī la Antiök ku lek Wet Puoth Yam lek koc cie koc Itharel aya. Aa cik aa lek thoñ puoth yam rin Beny Jethu. ²¹Aake cī Nhialic yiök riel. Go koc juēc gam ku yekē Nhialic door.

²²Thoñ cī koc cie koc Itharel gam Antiök aci yet tēnē koc cī gam Jeruthalem. Gokē Barnaba tuöc Antiök. ²³Wën cī yen yet ku tiñ te cī Nhialic koc Antiök daac thīn, ke jol puöu miet ku jiiēm kenhiiim ku bik aa koc path yer puöth, nhiar Nhialic piänden ebën. ²⁴Barnaba ē ye raan path cī Nhialic gam piände ebën, ku ē la guöp Wëi Nhialic. Koc juēc aaci wet Beny ben gam.

²⁵Ku jol Barnaba jāl ku ler pan col Tarthuth ku bi Thawul la wic. ²⁶Nawën le yök, gokē ben Antiök. Ku jolkē rēer Antiök ē ruöön, ku keek aake ye rōm kek koc cī gam, ku aaci akut diit apei ben piöc. Antiök yen ē ten koñ koc cī gam aa col thīn ka Krithiaan.

Barnaba ku Thawul aaci tuöc Jeruthalem

²⁷Ruöön yen rēer Barnaba kek Thawul Antiök, yen ē ten jiël koc kök kāk Nhialic tiñ Jeruthalem ku lek Antiök. ²⁸Raan tök ke yiic col Agabuth eci Wëi Nhialic yiök riel, ku bi lek koc lön le yen cōñdiit bi ben pinyinhom ebën. (Cōñ kēnē aci ben ben ɲon ye Klaudiöth benyñaknhom.) ²⁹Ku abiöth aaci raan tök keyiic ebën la kēnē cī ya tuöc wāmāthaken cī gam ciēñ wun Judia. ³⁰Ku keek aaci wēu kuööt yiic, ku jolkē Barnaba ku Thawul tooc bik ke ɲāth tēnē kocdit akut koc cī gam.

Koc cī gam aaci ɲuöt ke gum apei

12 ¹È runkä cok eci baai kööl agut Judia, go beny Judia col Yērot Agrīpa koc abek koc cī gam yiic col abañ. ²Yeen aci menh Joon col Jemith col atök yeth pal. ³Na le tiñ ke koc Itharel mit puöth kē cī looi, go Piter col adom ku mac, (yen kēnē ē loi rot ɲon ciem Yan Ayum cin yic luou.) ⁴Nawën cī Piter dom ku

mac, ke thön akuut apuruuk kaŋuan bik aa tiit. Ku akuöt tök ë la yic kóc kaŋuan. Ee cï Yërot Agrîpa tak ku bï Pïter yäth luk yic aköl Yan Ayum cïn yic luou cök ciëen. ⁵ Ku Pïter aci jäl rëer mec yic. Ku kóc cï gam aake ye rööc rienke apei tënë Nhialic.

Atuny Nhialic aci Pïter luöny bei yön mec

⁶ Wëer yen bï Yërot Agrîpa ye cöl abii luk yic rial, Pïter ë nin kam apuruuk karou ke tit ye. Ee cï rek cïn arëk karou, ku yön mec ë tit thok apuruuk kek ke lui akölë. ⁷ Tewën nyin yic ka atuny Nhialic bö ku kœec yöt thok ku mer yöt yic. Ku meŋ Pïter kët ku puöc bï rot jöt ku lëk ye, “Lœc rot jöt! Ku ban yïköu!” Nyin yic, ke luöŋ awën cï ye rek lööny wei yecin. ⁸ Ku lueel atuny nhial, “Dut yïyic ku ruök warku.” Go Pïter yeyic duut ku ruk war, ku lëk atuny nhial ye, “Paat alanhdu yïköu ku buöth ya.” ⁹ Go Pïter jäl biaath cök ayeer, Pïter ë këc kën loi rot deet yic, lön nadë ke kë looi atuny nhial ë yic. Eëcï tak ciet ye nyuöth. ¹⁰ Keek aaci jal tëek akuöt tök lööm, akut apuruuk ke tit, ku benkë rëet akut det ye kek rou lööm ku jolkë yet kal thok, kal ye gur thok wëeth cï yethok wel geeu. Go kal yethok ŋaany ë rot ku lek ayeer. Keek aaci jäl la ke cath dhël yic, nawën ka atuny nhial mär.

¹¹ Ku jöl Pïter kë lui rot ye deet yic ku lueel, “Ëmën aca jal ŋic lön ye yen yic kënë awën ya tiŋ këcït nyuöth! Nhialic acä tuöc atuönyde bä ben kuöny bei Yërot Agrîpa cin, ku jöl aa käk ke ye kóc Itharel tiŋ ke bik luöi ya.”

¹² Nawën ŋic lön rëer yen terac, go la pan Maria man Joon Marko. Ku kóc juëc aake cï kenhïim kut thïn ë ke rööc. ¹³ Ku jöl Pïter yöt tœŋ thok ayeer, go nyan aluaak lui baai cöl Roda la bï raan yöt gut thok la tiŋ. ¹⁴ Ku eëcï Pïter ŋic röl, go puöu miet apei, ku go guo kat ke këc yöt liep thok, ku le lek kóc lön yen ke Pïter yen akäac ayeer. ¹⁵ Go kóc awën reer yöt lek ye, “Yïn aci muöl!” Go lek ke lön ë yic yen aci lek ke. Gokë lueel, “Ka atiemde yen aci ben.”

¹⁶ Ku la Pïter tuen ke tœŋ yöt thok, gokë yöt ŋaany thok. Gokë tiŋ ku geikë. ¹⁷ Go Pïter lek ke bik biet, ku jöl tet yic ke yen te cï Nhialic ye beei bei thïn yööt ë mec yic ku lëk ke, “Lekkë Jemith ku wämäthkuan kök yen kë cï rot looi.” Ku jiël bï la tedet. ¹⁸ Na la piny bak, go apuruuk ke tit nhïim la cöt, ku yekë röt thiëec kamken, “Yenjö cï rot looi tënë Pïter?” ¹⁹ Go Yërot Agrîpa apuruuk yöök bik yööp. Ku akëc kë ben yök. Go apuruuk cöl adet thook, ku lëk kóc kóc nöc bï ke nöc. Tewën cï ë kënë rot looi go Yërot Agrîpa jäl Judia, ku ben la ceŋ Cetharia.

Antipäth Yërot aci thou

²⁰ Nawën cï Yërot Agrîpa puöu riäak tënë bäny Tire ku Thidon, gokë la ke ya akut bik la tiŋ. Ku ë cïk kaŋ lëk Blatuth raan käk pan beny tiit bï wetden gam. Ku jolkë la tënë Yërot Agrîpa ku thiëckë bï döör ke ke, rin keek aake ye miith yök wun yen mec Yërot Agrîpa.

²¹ Nayon aköl yen cï Yërot Agrîpa lueel bï yen mat ke ke, go ruk alethken bäany ku nyuuc thönyde nom ku jieem ke kóc. ²² Ku jöl kóc duöot aa looi ëlä, “Acie raan yen jam, Aciëk.” ²³ Ee teen, Yërot Agrîpa aci atuny Nhialic ben cöl atuany, rin cï yen rot looi bï a yen ye door ku cie Nhialic yen ye door. Nawën ke cuet kãm tö yeyäc yic, ku thou.

²⁴ Wet Nhialic aci ben la tuen ku kóc juëc aaci ben gam.

²⁵ Ku Barnaba kek Thawul aaci luociden ben thöl, ku dhukkë Jeruthalem ke cath kek Joon Marko.

Barnaba ku Thawul aaci loc ku toc ke

13 ¹ Kóc ke cï gam Antiök aake la yiic kóc ke ye käk Nhialic tiŋ, ku jöl aa kóc ë kóc cï gam piöc, ku keek aake ye yï Barnaba ku Thaimon. (Raan col) ku Lukiöth (raan pan Thirene) ku Maneen (ku yen ë ye methë beny cöl Antipäth Yërot) ku Thawul. ² Tewën ye kek rööc thïn tënë Bänyda, ku yekë miith theek ke ye dhël det döör kek Nhialic, go Wëi Nhialic lek ke ëlä, “Pälkë Barnaba ku Thawul ku bik luoi ca löc ke aa looi.”

³ Ku jöl kóc cï gam miëth aa theek ku röökkë ku jolkë Barnaba ku Thawul döc ku jolkë ke cöl ajiël bik luoi cï Nhialic löc ke la luöi Nhialic.

Barnaba ku Thawul aaci keny Thaipruth

⁴ Barnaba ku Thawul aake cï Wëi Nhialic tooc bik la gen cöl Theleukia ku lek teem köu riäi ku lek gen tö gool nom wär ciel yic cöl Thaipruth. ⁵ Na lek yet gen det cöl Thalamith, gokë kóc aa piöc wet Nhialic ten amat kóc Itharel. Ku Joon Marko ë cath ke ke rin bï keek aa kony luoi.

⁶Keek aaci cath ku temkë Thaipruth köu, ku lek gen Papoth yen le kek raan det tiët cöl Bar-Jethu ke ye raan Itharel, yök thïn. Ku ëci rot a nyuöth ciet ye raan koc lek wet Nhialic. ⁷Yen Bar-Jethu ë ye methë benydit cöl Therjiuth Pauluth, beny wun tö gool nom wär ciel yic. Ku yeen ë ye raan pel nyin apei. Beny ëci Barnaba kek Thawul tuöc ku bik ben tënë ye, rin ë wic bi piöc wet Nhialic. ⁸Ku yen luoiden bi kek beny piöc ëci tiët Elimath (aa kek rienke thoŋ Gïrik) duer rac, rin ci yen ye them bi beny rac nom bi wet Nhialic cii gam. ⁹Ke Thawul, ku aŋic aya lön cöl ye Paulo, ëci Wëi Nhialic la yeguöp, go tiët tiŋ ku dot apei, ¹⁰ku lëk ye, “Yin mänh jöŋrac. Yin raan la ater kek käpath ëbën. Yin athiän guöp kärec, ku aye them akölaköl ba yith Nhialic wel bik aa lueth! ¹¹Yin abii Nhialic jak guöp ëmën. Yin abi cöŋ ku yin abi nin nöc ke yi cii piny ben tiŋ.” Nyin yic Elimath, ëci kën macär guo paat nyin piny, ku jöl cath ke wic raan bi ye döm cin bi thel. ¹²Nawën tiŋ benydit kë ci rot looi, go wet Nhialic gam rin yeen ëci gai apeidit käk ci ke ye piöc wet Nhialic.

Barnaba ku Paulo aaci la Antiök tö Pithidia

¹³Paulo ku jöl aa kocken cath kek ye aaci wär teem riäi ke jiël Papoth ku lek Perga, wun cöl Pampilia. Tewën, Joon Marko aci ben puök ke ke ku dhuk Jeruthalem. ¹⁴Ku ben kë jäl Perga ku yeetkë Antiök tö wun cöl Pithidia. Nawën aköl löŋ, aköl cii koc ë luui, go Barnaba ku Paulo la ten amat ku nyuuckë thïn. ¹⁵Nawën ci lööŋ Mothith, ku jöl aa wël koc käk Nhialic tiŋ kueen, go bäny ten amat wet lek Barnaba ku Paulo ëlä, “Wämäthakua wek aa wicku bäk koc jääm nhïim, te le yen wet bi ke rieel puöth bäk lek ke.” ¹⁶Go Paulo rot jöt, ku nyooth yecin bi koc biet. Ku jöl jam ëlä, “Wek methkie pan Itharel, ku jöl aa koc cie koc Itharel Nhialic door, pieŋkë wetdie. ¹⁷Nhialic koc Itharel ëci wärkuan dit loc ku looi ke ke ye kuatdit ril tör tewäär ciëŋ kek ke ye alei wun cöl Ijip. Keek aake ci Nhialic bëei bei Ijip rielde. ¹⁸Ku aci kärec yekë luöi ye guum roor ruöön thiärŋuan. ¹⁹Ku Nhialic aci wuöt kadhorou cuöp wei pan Kanaan. Ku looi kacke bi aa kek la piny, ²⁰tecit run buot kaŋuan ku thiärdhiëc.

“Wën ci kën rot looi, go Nhialic ke yiëk koc mac ke agut te tul raan käk Nhialic tiŋ cöl Thamel. ²¹Nawën thiëckë Nhialic bi ke yiëk benyŋaknom, go Nhialic ke yiëk Thawul raan many Kic, kuat Benjamin yic, ku bi ya beny ruöön thiärŋuan.

²²“Nawën ci Thawul nyaai bääny yic, go Nhialic Debit looi ke ye benyŋaknomden. Ku kën ci Nhialic lueel rienke akïn, ‘Aca yök lön Debit, wën Jethe yen ë raan yen wic. Ku ë yen raan bi käk wicëckë bik röt looi, aa looi.’

²³“Ë ye Jethu raan kuat Debit, yen ci Nhialic looi ke ye raan bi koc Itharel luök, tecit te ci yen ye lueel thïn wäär. ²⁴Wäär këc Jethu luöide jöc, ke Joon ëci koc Itharel kaŋ lek wet Nhialic. Ku ye ke yök bik muöl lui kärec, ku cölkë röt aa muoc nhïim piu. ²⁵Na wäär ci lui Joon thiök kek thök, go koc thiëc ëlä, ‘Yakë tak ya ŋa? Acie ŋen raan tietkë. Raan tietkë abi lök ben yacök. Ku acie ŋen raan lëu ye ba warke däk bei yecök.’

²⁶“Wek wämäthkie Itharel, mith Abaram, ku jöl aa wek koc cie koc Itharel reer ten Nhialic door. Wet bi koc kony bi koc cii la pan mac aci lek yo. ²⁷Ku yeen akëc koc ke ciëŋ Jeruthalem ku bänyken ŋic, lön nadë ke yen raan bi koc ben kony. Ku keek akëc wël deet yiic aya, wël ke ye koc käk Nhialic tiŋ lek ke wäär ye kueen akölaköl, aköl löŋ. Ku keek aaci wël koc käk Nhialic tiŋ cöl aa tiŋ kenhïim, rin ci kek Jethu cöl anak. ²⁸Cök alön cin yen yiny cik yök bi ke ye tem thou, gokë ŋuöt ke thiëc Pilato bi dhiel nöc. ²⁹Ku wën ci kek këriëc ëbën looi, käk ke ci göt athör theer wël Nhialic yic rienke, gokë jat piny tim ci riüu köu ku lek thiök raŋ yic. ³⁰Ku yeen aci Nhialic cöl aben pir. ³¹Ku aaci rot nyuöth koc ke ye cath kek ye kam Galilia ku Jeruthalem nin juëc yiic. Kek kockä, kek aaci käk ci röt looi tiŋ, ku lëkkë ke koc Itharel.

³²⁻³³“Ku yok aaci ben buk we ben lek thoŋ path ci Nhialic yepuöu töŋ ke bi luöi wärkuan dit. Aci luöi yo ëmën yok miethken, rin ci yen Jethu cöl aben pir ke ci thou. Cïmën ci ye göt ëlä waak rou athör theer wël Nhialic yic,

‘Yin ee wëndie, ŋen aci ya Wuur akölë.’

³⁴“Ku yen kënë yen ë kë ci Nhialic lueel, lön bi yen ye cöl aben rot jöt thou yic, ku bi cii kŋ dhiäth raŋ yic, ‘Yin aba yiëk yath, ku yin aba döc cit tewäär, ci ŋen yapuöu taŋ thïn tënë Debit.’

³⁵“Ku ë yic alanden, ëci lueel këlä wet det ci göt yic, ‘Yin acä aluonydu bi puöl bi dhiäth raŋ yic.’

13:17B.bei 1:7; 12:51 13:18Kn 14:34; L.rou 1:31 13:19L.rou 7:1; Joc 14:1 13:20Bäny 2:16; 1Tha 3:21

13:211Tha 8:5; 10:21 13:221Tha 13:14; 16:12; Wk 89:20 13:24Mk 1:4; Lk 3:3

13:25Mt 3:11; Mk 1:7; Lk 3:16; Jn 1:20, 27 13:28Mt 27:22-23; Mk 15:13-14; Lk 23:21-23; Jn 19:15

13:29Mt 27:57-61; Mk 15:42-47; Lk 23:50-56; Jn 19:38-42 13:31Lui 1:3 13:33Wk 2:7 13:34Ith 55:3 13:35Wk 16:10

³⁶“Ku yen Debit ë ye käk Nhialic looi wäär piir yen, ku jol thou ku thiäk te cï wärken dît thiök thin. Ku guäpde aci ben dhiäth rañ yic. ³⁷ Ku kën akëc rot looi tënë raan cï Nhialic jot bei rañ yic.

^{38–39}“Awiëc bäk ñic wek wämäthkie Itharel, lön nadë ke rin Jethu yen abi kärec päl piny tënë koc. Raan bi wetde gam abi adumuöömke päl piny tënë ye. Ku kënë ë këc löñ Mothith looi wäär tënë we. ⁴⁰ Täaukë wenyin piny apath bi kë cï koc käk Nhialic tiñ, cik lek koc ëlä rot cii lui we,

⁴¹ ‘Tienjë wek koc koc dol gup! Gäikë ku wek aabi liu, rin kë luöoi akölë!

Acie kë bäk gam, cok alon bi raandä ye teet yic tënë we!’ ”

⁴² Wën jiël Paulo ku Barnaba ten amat, goke yöök ku bik ben ben aköl deet amat bik wet lööñ Nhialic ben ber yic. ⁴³ Wën cï koc jäl amat yic, ke Paulo ku Barnaba ruec koc juëc Itharel, ku koc juëc cie koc Itharel cï cieëñ koc Itharel gam. Ku jol Paulo kek Barnaba lek ke bik kepuöth deet, ku bik pir ke ñöth piath Nhialic.

⁴⁴ Nawën aköl det amat, ke koc juëc apei bö amat yic aabi ciet koc ëbën geeu kek cï guëer bik ben piñ wet Nhialic. ⁴⁵ Nawën tiñ koc Itharel akut diit kënë ke dom tiel ke. Ku yekë wet lueel Paulo dhöl yic ku yekë lat.

⁴⁶ Ku Paulo kek Barnaba aaci ben jam apei këlä ke cii riöc, “Kën yen bi rot rañ looi tuen, ee lön bi we lek wet Nhialic. Ku na cäk kuc bäk wet Nhialic cii gam, ku yakë röt yök ke we cie koc wic pir akölrüëc ëbën, ke wek aa buk nyään piny ku lok tënë koc kök cie koc Itharel. ⁴⁷ Rin yok aaci Nhialic yöök ëlä, ‘Wek aaca looi ke we cit mermer tënë koc cie koc Itharel, rin bi raan ëbën pinyhom poth la pan mac.’ ”

⁴⁸ Nawën piñ koc cie koc Itharel wet kënë, gokë puöth miet ku leckë wet Nhialic cik piñ. Ku koc ke cï loc bik aa koc pir akölrüëc ëbën aake cï ben gam.

⁴⁹ Wet Nhialic aci ben yet beekë yiic ëbën. ⁵⁰ Go koc Itharel, kocdit baai geu yic ëbën ben rac nhüim agut diäär kocdit cie koc Itharel Nhialic door. Ku aaci Paulo ku Barnaba ben cuop wei panden. ⁵¹ Go atuuc Jethu mël kuëñ ku tenjë kecök rin cï kek puöth riääk tënë ke. Ku jiëlkë ku lek pan col Ikonía. ⁵² Koc ke cï gam Antiök aake cï Wëi Nhialic la kegup, ku keek aake mit puöth apei.

Paulo ku Barnaba aa koc Ikonía lek Wet Puoth Yam

14 ¹ Këcit këwäär cï rot looi tënë Paulo ku Barnaba Antiök acie yic ben ber aya tënë ke Ikonía. Paulo ku Barnaba aake cï la yön ye koc Itharel mat thin, ku jiëmkë arek bi koc juëc Itharel ku koc cie koc Itharel wet Jethu gam. ² Ku koc kök Itharel cï kuc bik wet cii gam, aaci koc Ikonía luöm thook bik kenhüim wel Paulo ku Barnaba. ³ Ku Paulo kek Barnaba aaci rëer Ikonía nin juëc. Ku jiëmkë apei rin Jethu ke cii riöc, ku wet yekë lueel ëbën ë yic, rin cï Jethu ke yiëk riel bik käk jän göi aa looi. ⁴ Ku koc juëc tö geeu aake cï keyiic tek, koc kök aake wël koc Itharel piñ ku gam koc kök wet atuuc Jethu.

⁵ Nawën ke met koc Itharel yic kek kocden dît ku koc Konya bik agaac jock, ku wickë bik ke nöc. ⁶ Nawën la koc piöoc wet cï mat yöc cok, gokë riñ te col Likonía tö geeth Lithtra ku Derbe thin. ⁷ Ku piöockë Wet Puoth Yam Bány Jethu ë geethkä yiic.

Paulo aci duer nöc Lithtra

⁸ Mony cï ruai, cie cath, yecök yöc piiny tewäär dhiëeth ye ë tö gen Lithtra. ⁹ Ku ë ye wël Paulo piñ. Go Paulo tiñ ke cï gam ku peth bi kony. Go dot, ¹⁰ ku lueel, “Jot rot ba köc!” Go rot wuöl nhial ku cieth.

¹¹ Nawën tiñ koc juëc kë cï Paulo looi, gokë jam apei thonjen Likonía, “Aciëek cit koc aaci ben piny nhial tënë yo!” ¹² Ku ciëkkë Barnaba ke col Deuth ku ciëkkë Paulo ke col Yërmith rin ë yen raan ye welken lueel.^b ¹³ Go raandit jöñ col Deuth door, jöñ rëer yienje kal thok miöör la yiëth adir cï cuëc yöök beei. Ku wic kek kocden juëc reer ke ye bik atuuc door ë ke.

¹⁴ Nawën piñ Barnaba ku Paulo ke wickë bik looi, gokë aläthken ret yiic keköth bik nyuöth lön cii kek këcit kënë wic, ku riñkë ciel than awën yic ku lueelkë, ¹⁵ “Yeñö looi wek kënë? Yok aa koc ë path cimëndun. Yok aaci ben buk Wet Puoth Yam Jethu ben lueel, ku buk we nyaai käk yakë doorkä yiic rin cïn kek wetden yic, ku bäk aa door Nhialic tönj pir, cï nhial ku piny ku wër kek kakkith tö thin ëbën cak. ¹⁶ Wätheer Nhialic ëcï koc puöl bik käkken cik tak aa door. ¹⁷ Ku Nhialic ë rot nyuöth akölaköl kapuöth ye looi yiic tënë koc. Ee deñ col atueny ku lok kän ëbën cit teden ye kek luok, ku mitkë puöth.” ¹⁸ Cok awën këc kocä welken lac gam, ka cik ben lëu bik koc dok bik miöör cii näk.

¹⁹ Nawën ke koc Itharel kök bö Antiök gen tö Pithidia, ku bö koc kök Ikonía, ku reckë koc nhüim ku biöökkë Paulo ku yöckë ayeer geeu, ku takkë lön cï yen thou. ²⁰ Nawën la koc cï gam kenhüim kut yelööm, ke jot rot ku dhuk geeu. Nayon nhiäk ke la Derbe kek Barnaba.

^b14:12Aa rin jakken.

Paulo ku Barnaba aaci dhuk gen Antiök tö Thiria

²¹ Paulo ku Barnaba aaci Wet Puoth Yam lëk kóc Derbe ku gam kóc juëc wet Jethu. Nawën ke dhuk Lithtra. Ku lek Ikonia ku jöl a Antiök tö Pithidia. ²² Ku lëkkë kóc cï gam bik gamden muk apath, ku lek tueñ ke nhia Jethu. Ku lëkkë ke piöcden yic ëlä, “Kóc cï gam ëbën aa dhil gum ë pïr kënë yic rin bi kek met bääny Nhialic yic aköldä.” ²³ Ku kuanykë kœcðit akuut kóc cï gam yiic ëbën, ke cï kañ röök tënë Nhialic. Ku thekkë miëth rin bi kek Nhialic kañ door. Ku jolkë ke than Beny Jethu cin, raan cï kek welke gam.

²⁴ Tewën kueny kek Pithidia yic, gokë ben Pampilia. ²⁵ Ku piöcckë Wet Puoth Yam tënë kóc gen Perga ku lek Atalia. ²⁶ Ku teen ke gër, ku dhukkë Antiök, tewäär cï kóc cï gam ke thön Nhialic thïn rin luoiden cïk thöl.

²⁷ Wën cï kek yëët Antiök, ke kuut kóc cï gam nhïim ku lëkkë ke kajuëc cïk looi riel Nhialic, ku nyooth Nhialic lön alëu bi kóc cie kóc Itharel gam aya. ²⁸ Ku rëerkë Antiök pei juëc kek kóc cï gam.

Löñ Mothith

15 ¹ Kóc kök pan Judia aaci ben Antiök, ku piöcckë kóc cï gam ëlä, “Wek aaci Nhialic bi kony te cïi we dhil ñoot, cit te cï löñ Mothith luël ye.” ² Go Paulo kek Barnaba jam apeï rin ë wet kënë kek kóc awën bö Judia. Nawën ke mat yic, bi Paulo ku Barnaba ku kóc kök Antiök la Jeruthalem bik wet kënë la jääm yic kek atuuc Jethu ku kœcðit kök.

³ Go akut kóc cï gam ke jal tooc, ku wën tëëk kek Ponicia ku Thamaria, ee cïk lek kóc lön cï kóc kök cie kóc Itharel wet Nhialic gam. Wet kënë aci kóc cï gam ëbën cöl amit puöth.

⁴ Nawën yëëtkë Jeruthalem ë ke lor akut kóc cï gam, ku atuuc Jethu ku kœcðit, kóc cïk ben lek kajuëc cï Nhialic ke kony bik ke looi. ⁵ Go kóc kök akut Parathï cï gam röt jat nhial ku luelkë, “Keek aa dhil ñoot ku lëk ke bik löñ Mothith dhiel theek.”

⁶ Go atuuc Jethu ku kœcðit kenhiim mat bik wet kënë tak yic. ⁷ Wën cï kek wet jääm yic apeï, ke Pïter jot rot ku lueel, “Wek kackie añieckë lön yen aci Nhialic loc wäär kamkun, ba Wet Puoth Yam lek kóc cie kuat Itharel, rin bi kek wet Beny piñ ku gamkë. ⁸ Ku Nhialic añic kë tö raan ëbën puöu, aci nyuöth lön yeen alëu kóc kök cie kóc Itharel bik gam aya cimën cï yen Weike cöl abö tënë ke, cimën wäär cï yen ye luöi yo aya. ⁹ Aci nyuöth lön yok kóc Itharel ku thäi kök, yok aa thön ëbën, ku nyeei käreç kepuöth rin cï kek gam.

¹⁰ “Na ye këya, ke yeñö looi wek kë cï Nhialic nyuöth we bäk cïi loi, rin wïc wek ye ë path bäk te bi yen puöu riëëk thïn tiñ. Te jot yok kóc cï gam nhïim kërill këc wärkuan ðit ku yo aya, kañ lëu buk yäac? ¹¹ Acie tede! Ayeku gam lön bi yo kony rin piath Beny Jethu, ku abi ya tede aya tënë ke.”

¹² Go akut ëbën biet ku piñkë käk jän göi cï Nhialic cöl aa looi Barnaba ku Paulo ke, kam kóc kök cie kóc Itharel. ¹³ Wën cï kek thök jam, ke Jemith jot rot ku bëer ëlä, “Pieñkë wetdie wek kóc akuötda! ¹⁴ Aci Thaimon tet yo te cï Nhialic ye nyuöth thïn lön ye kóc cie kuat Itharel kacke aya, rin cï yen kóc kök nyaai keyiic bik aa kacke. ¹⁵ Ku wël kóc käk Nhialic tiñ aaci röm kek ë wëlkä alanden. Cimën cï ye göt athör theer wël Nhialic yic ëlä,

¹⁶ ‘Ku lueel Beny, yen abi dhuk,
ku yen abi many Debit cï riääk ben jot nom.

Ku ben kækken cï riääk cök piny bik riel.

¹⁷ Ku këya, kóc ëbën aabi Beny wïc,
kóc cie kóc Itharel ca cöl bik aa kackie.

¹⁸ Yen ee wet cï Beny lueel akan,
Beny yen cï wet kënë cöl añic theer.’

¹⁹ “Ku la Jemith tueñ ku lueel, na ye yen, ke yok aaci kóc cie kóc Itharel cï Nhialic dhuök reem nhïim. ²⁰ Añueen buk ke gät athör ku lëkku ke, bik cïi mith kuat miëth cï ke jakrec door, ku titkë röt bik gup cïi la akör. Ku cïk riem cam ku cïk cuët riñ län këc teem röl bi riem kuër. ²¹ Rin löñ Mothith aci kuen run juëc yiic, yön ye kóc Itharel mat thïn akööl cïi kek ë luui yiic, ku wëlkä aaye piöc geeth yiic ëbën.”

Athör cï gät kóc cie kóc Itharel cï gam

²² Nawën ke atuuc Jethu, ku kœcðit kek kóc akut kóc cï gam ëbën, mat wet yic bik röör abek akut yic kuany, ku bik ke tuöc Antiök kek Paulo ku Barnaba. Gokë Judath cöl Barthabath aya, ku Thilath kóc theek akut rin luoiden, kuany. ²³ Ku gemkë ke athör kënë tënë kóc cï gam Antiök,

“Yok atuuc Jethu ku kœdît, miethakun, yok aaci miãthda tuœc miethakua cie kuat Itharel ciẽj gen Antiœk, ku pan Thiria ku Cilicia. ²⁴ Acuk piŋ lœn cĩ kœc kœk akuœtda yic la ku rœckœ wepuœth kãk yekœ lueel, ku keek aa kœcku ke tooc bik kãkkã aala lueel. ²⁵ Kœya, yok aaci yonhiim mat ku gamku buk kœc kuany ku tucku ke we. Ku aabi la kek wãmãthkuan nhiarku Barnaba ku Paulo, ²⁶ cĩ wœiken gam bik luui rin Jethu Krĩtho. ²⁷ Wek aa tucku Judath ku Thilath, bik we lœk wœl cĩ gœt athœr kœn yic aya. ²⁸ Acĩ Wœi Nhialic tããu yopuœth bĩ cien lœj ril det metku œ lœœj cĩ gãt we kã yiic. ²⁹ Ku wek aa cĩ kãkkã dhil loi, duœkkœ ye mĩth mieth yeke jakrec door, duœkkœ riem cam, duœkkœ cuet riŋ lãn kœc teem rœl bĩ riem kuœr, ku tietkœ rœt bãk gup cĩ la akœr. Na luœikœ kãkkã cĩt œmœn cĩ yok ke lek we, ke luœidun abĩ piath. Yenakan.”

³⁰ Ku toockœ atuuc Antiœk. Nawœn cik yet, ke mat kœc cĩ gam œbœn nhiim ku gemkœ ke athœœr. ³¹ Wœn cĩ kek athœœr kueen œ ke mit puœth rin cĩ wœl cĩ gœt athœœr yic ke deet puœth. ³² Judath ku Thilath, kœc ke jam nyin Nhialic aya, aaci jam apeĩ kek kœc cĩ gam bik ke deet puœth ku rilkœ puœth. ³³ Tewœn cĩ kek nin nœk ke ke lony wãmãthakua dhœl bik dhuk ke puol gup tœnœ kœc ke toc ke. [³⁴ Ku Thilath acie nhom ben waar ku dœj.] ³⁵ Paulo ku Barnaba aake cĩ pei nœk Antiœk, ke piœœc wet Beny kek kœc juœc kœk tœnœ kœc Antiœk.

Paulo ku Barnaba aaci puœk

³⁶ Nawœn cik pei nœk Antiœk, ke Paulo yœœk Barnaba, “Dhukku ciœen geeth wãar yiic cĩ yok Wet Puœth Yam piœœc thiin, buk wãmãthakua la neem, ku buk tiŋ lœn le kek tuej apath kek gamden.” ³⁷ Ku œ wic Barnaba bĩ Joon Marko cath ke ke, ³⁸ ku akœc Paulo tak lœn puœth yen bĩ cath ke ke rin acĩ ben dhuk Pampilia, ku cĩ reer ke ke bik luœiden thããp kedhie. ³⁹ Wet kœnœ acik teer apeĩ nawœn ke puœk. Ku jiœl Barnaba kek Joon Marko ku geerkœ Thaipruth. ⁴⁰ Ku cœl Paulo Thilath bĩ cath kek ye, ku pel miethakœn ke dhœl bĩ Nhialic ke cœl aa cath ke puol gup. ⁴¹ Ku jœlkœ la Thiria ku Cilicia kek Thilath, ke deet kœc cĩ gam puœth bik gamden muk apath.

Timothĩ acĩ cath kek Paulo ku Thilath

16 ¹ Paulo acĩ cath bĩ la Derbe ku Lithra te ciẽj Krĩthian cœl Timothĩ thiin. Man Timothĩ œcĩ gam aya, ku yeen œ ye nyan kuat Itharel, ku wun œ ye Girik. ² Kœc le yok gam tœk œbœn Lithra ku Ikonia, aake ye njec jam rin Timothĩ. ³ Go Paulo Timothĩ cœl aŋot rin wic yen ye bik cath. Ee looi kœya rin aŋic kœc Itharel ke ciẽj Derbe ku Lithra œbœn lœn ye wun Timothĩ Girik, kuat cie ŋoot. ⁴ Tewœn ye kek jãl gen ku lek gen, aake lœœj cĩ atuuc Jethu ku kœdît tœ Jeruthalem guiir tet kœc cĩ gam, ku lœkkœ ke bik aa luui cĩt te wic atuuc Jethu ku kœdît tœ Jeruthalem ye thiin. ⁵ Kœya, kœc akut kœc cĩ gam aaci cœk puœth bik gamden cĩ war, ku kœc cĩ gam aaci rœt aa juak akœlakœl.

Paulo ku Thilath aaci la Troath

⁶ Paulo ku Thilath aaci Prigia ku Galatia bar yic, rin cĩ Wœi Nhialic ye nyuœth ke bik Wet Puœth Yam cĩ piœœc œ beei Athia kã yiic. ⁷ Tewœn cĩ kek aken Mithia dœœt, ke wickœ bik la pan cœl Bithinia, ku keek aaci Wœi Nhialic nyuããth bik cĩ tœk thiin. ⁸ Gokœ Mithia bar yic ku lek Troath. ⁹ Ku œ weer kœnœ Paulo acĩ kœdãŋ tiŋ kœcĩt raan Mathedonia ke kããc yenhom ku leŋ. “Bãar yĩn Paulo Mathedonia ba yo ben kony.” ¹⁰ Wœn cĩ Paulo nyuœth œ kœnœ, goku rœt guiir buk la Mathedonia, rin acuk njic lœn cĩ Nhialic yo cœl buk Wet Puœth Yam la piœœc tœnœ kœc Mathedonia.

Paulo ku Thilath aaci la Pilipi

¹¹ Goku jãl Troath œ riãĩ ku gœrku buk teem Thamodhraki, nayœn nhiãk deet yo la Nipolith. ¹² Ku jiœlku Nipolith ku lok Pilipi gen tuej ye kaŋ thiœk te le kœc Mathedonia, ku yen œ ye gen rœœr kœc Roma thiin. Ku nãkku nin juœc geeu. ¹³ Nawœn akœl cĩ kœc Itharel œ luui ke yo jiœl geeu, ku lok wãryœu te yeku tak lœn ye kœc Itharel kenhĩim mat thiin bik rœœk. Ku nyuucku piiny ku jieemku tœnœ diããr ke cĩ kenhĩim mat thiin aya. ¹⁴ Kam kœc cĩ welkua piŋ œ kœc ke tœ thiin yiic, ee tiŋ gen Thiatira cœl Lidia, ku œ ye yœœc wei aleth mĩthiœœŋ ril yœnyden yic apeĩ. Lidia œ ye Nhialic door, ku œcĩ Nhialic cœk puœu bĩ wet lueel Paulo piŋ. ¹⁵ Wœn cĩ ye gãm lœkwœi kek kœc ciẽj baai kek ye, ke cœl yo ku lœk yo, “Bãk, reerkœ paandie, te cĩ wek ye gam lœn cĩ yen gam ayic.” Ku leŋ yo buk la baai.

Paulo ku Thilath aaci mac Pilipi

¹⁶ Nayœn akãl tœk, tewœn le yok te ye kœc la rœœk thiin, ke yo rãm kek nyan alony la guœp jœŋ ye cœl alœk kœc kœ bĩ rot looi. Ku yeen œcĩ wœœu juœc apeĩ beei tœnœ kœcken cĩ ye loony. ¹⁷ Nawœn ke buœth Paulo ku yo

ëbën ke loi duoat, “Kockä aa lui rin Nhialic Madhol. Aa yin lëk te bi Nhialic yi kuony thin.”¹⁸ Ku looi këya nin juëc, agut bi Paulo puöu riääk, ku wel yenhom ku lëk jöñ tö nya guöp, “Rin Jethu Kritho bäär bei ë nya guöp!” Ee kaam wën, ke jöñrac jiël yeguöp.¹⁹ Nawën le koc ci yeen loony tiñ, ke nyan alony cïn wëü ye ben bæi tënë ke, gokë Paulo dom ku Thilath ku thelkë ke luk yic.²⁰ Ku yethkë ke bäny nhüim ku luelkë, “Röörkä aa koc Itharel, ku keek aa loi aliäap genda.²¹ Aa yook piöoc buk käk liu cieñda ku lööñkua yiic, aa looi. Yok aa kuat Roma. Këya, yok aaci dhil luui käk yekë lek yo buk ke looi.”

²² Ku met than awën kääc luk köu wetden yic ku biekkë ke, ku ret bäny aleth Paulo ku Thilath yiic keköth, ku colkë ke aa that.²³ Wën ci apuruuk Paulo ku Thilath that ku biekkë ke ape, ku riitkë ke yon mec, ku yöök beny apuruuk ë tiit koc ci mac, bi ke der rin bi kek ci kat.²⁴ Nawën piñ apuruuk ë wet kënë, ke riitkë yon tö ciëen ku rekkë kecök, ku meckë ke gurgurdi thiek köu.

²⁵ Nawën tecit weer ciel yic, ke Paulo ku Thilath aake röök ku ketkë waak door kek Nhialic, ku koc kök ke ci mac kek keek aake piñ.²⁶ Kaam awën ke piny yieek rot ape, ku yieek tewën ci yon mec buth thin aya. Nyin yic tewën ke yööt nany kethook, ku dak luöñ werwer kecök.

²⁷ Go beny apuruuk wën tit yot thok rot puur ku tiñ yööt ke nany thook, ku tek lon ci koc ci mac röt kual, go palde miëet bei, ku wic bi rot nöc.²⁸ Go Paulo rel ape, “Duk rot näk! Yok aatö ten ëbën!”

²⁹ Go beny apuruuk mac cool, ku riñ yot ku wiik Paulo ku Thilath cök ke leth.³⁰ Nawën ke wet nhüim ayeer ku thiëc ke, “Wek bäny, yeñö ba looi bi ya kony?”

³¹ Gokë lueel, “Gam wet Beny Jethu, ke yin akony wek kacku.”³² Nawën ke jol wet Beny Jethu piöoc tënë ye ku tënë koc kök tö paande ëbën.³³ Ku ë weer kënë, ke Paulo ku Thilath nyeei beny apuruuk wën ke bi tetöökken la look yiic ku der keyiic, ku muoc nhom nyin yic kek kacke ëbën.³⁴ Ku yeth Paulo ku Thilath paande ku gem ke miëth. Ku jol puöu miet kek kacke rin ci yen wet Nhialic jal gam.

³⁵ Nayon nhiäk ke bäny geeu toc bäny apuruuk, “Lak, lëkkë beny apuruuk tit yon mec bi Paulo ku Thilath lony.”

³⁶ Go beny apuruuk tit lëk Paulo, “Bäny aaci wet tooc rienkun bi we lony. Këya, wek aaci puöl bäk jäl ke cïn awuoc yik we.”

³⁷ Go Paulo lueel tënë beny apuruuk, “Yok aa kec yäth luk yic, ku yok aaci bäny col atthat thei nhom ku mac yo, ku yok aa koc Roma! Ku emën, awickë buk jäl yo ci njic? Acie tede! Kek bäny nhüim, aa dhil ben ten bik yo ben luöny bei.”

³⁸ Go bäny apuruuk wet ci Paulo ku Thilath lek ke la kuany yic tënë bäny geeu. Nawën piñkë lon ye Paulo ku Thilath koc Roma, gokë riöoc.³⁹ Ku lek bik ke la löñ, bik wet päl piny tënë ke, ku büikë ke bei yon mec ku lëkkë ke bik jäl geeu.⁴⁰ Go Paulo ku Thilath jäl ku lek pan Lidia. Ku matkë kenhüim thin kek koc ci gam, ku jieemkë tënë ke wël deet kek kepuöth ku jielkë.

Koc Thethalonika aaci wet Paulo maan

17¹ Paulo ku Thilath aaci tääk geeth karou yiic, gen Ampipoli ku Apolonia, ku jolkë ben Thethalonika te rëer ten ye koc Itharel kenhüim mat thin bik röök.² Go Paulo, cimenden theer, la te ye koc Itharel kenhüim mat thin, ku akööl yiic kadiäk, akööl ci koc Itharel ye luui, ke Paulo jol käk ci göt athör theer wël Nhialic yic aa teer kek koc.³ Ku nyuth ke kë ci göt athör theer wël Nhialic yic, ee lon bi Jethu Kritho raan ci Nhialic tooc abi dhiel gum, ku jot rot thou yic. Ku lueel Paulo ëlä, “Jethu jieem yen rienke tënë we emën, yen aci Nhialic koc ku dooc.”⁴ Go koc kök käk ci Paulo lueel yok ke ye yith, ku metkë röt Paulo ku Thilath, ku yen lan koc juëc Girik Nhialic door aya, ku diäär kök kocdit.

⁵ Ku koc Itharel aake ci tieel dom rin ci koc juëc wet Paulo gam, ku kuutkë koc aliäap dhöl yiic, ku matkë keyiic ku loikë duoat, ku mekkë pan Jathon ku wickë Paulo ku Thilath yööt yiic bik ke bæi ayeer tënë koc.⁶ Nawën cik ke yok, gokë Jathon ku koc kök ci gam thel tënë kocdit geeu ke loi duoat ëlä, “Röörkä aaci liäap looi geeth juëc yiic, ku emën aaci ben genda.⁷ Ku aaci Jathon nyuöoc paande. Keek aaci lööñ benyñaknhom Roma dhöl yiic, ku luelkë ka la benyñaknhom det yam col Jethu.”⁸ Ku wëlken kä, aaci thändit geu ku bäny liäap nhüim.⁹ Ku jol bäny Jathon ku wämäth kök awën col aa teeu wëü piny bik röt waar, ku pälkë ke bik jäl.

Paulo ku Thilath aaci la Beria

¹⁰ Tewën ci piny cuol, ke koc ci gam col Paulo ku Thilath aa la Beria. Nawën cik yet, ke la te ye koc Itharel mat thin.¹¹ Aye koc Itharel tö Beria nhiaar bik wet Paulo piñ tënë koc Thethalonika. Ku aake wël Nhialic kueen akölaköl, bik tiñ lon ye käk ye Paulo lueel yith.¹² Koc juëc aaci wet Jethu ye Paulo lek koc ben gam. Ku diäär juëc kocdit Girik, ku röör juëc Girik aaci wet ye Paulo lueel ben gam aya.

¹³ Nawën le koc Itharel tö Thethalonika piñ lon ci Paulo wet Nhialic la piöoc Beria aya, gokë ben ku kuutkë koc thook bik aliäap looi.¹⁴ Tewën nyin yic, ke koc ci gam col Paulo ajiël kek koc kök bik la wath thok, ku

döŋ Thilath ku Timothï Beria. ¹⁵ Ku kóc awën rucc Paulo aaci ben ger kek ye, bik yet Athen. Ku dhukkë Beria kek athön Paulo tënë Thilath ku Timothï, bik röt lac mät ye.

Paulo aci la Athen

¹⁶ Tewën tiit Paulo Thilath ku Timothï Athen, ee kęc puöu la yum wën tiŋ yen geu ke ci thiäŋ yïk ye kek jakken door thïn. ¹⁷ Go jäl a teer kek kóc Itharel, ku kóc wuöt kök Nhialic door te ye kóc Itharel mat thïn kek thän det guëer te ye kóc kenhïim mat thïn geuu, bik wëlkä ben piŋ. ¹⁸ Go kóc kök piöoc Epikuria ku Ithtok jam kek ye aya. Ku lueel kóc kök, “Yeŋö wïc raan kënë kęc piöc, bi lueel?” Ku ben kóc kök lueel, “Yen ë ciët jam rin jak kucku.” Ee luelkë këya rin Paulo ë piöoc rin Jethu, ku lön ye kóc röt jöt thou yic.^c ¹⁹ Gokë Paulo cöl amat yic, amat ë röm gön cöl Ariöpakuth nom ku luelkë, “Awïcku buk piöocdun yam ye lueel kënë ŋic. ²⁰ Kök yeku piŋ ke ye lueel, aaci thöŋ kek käk cuk kaŋ piŋ, ku awïcku buk wetden yic, ŋic.” ²¹ (Rin anhiëer kóc ke dhiëth Athen, ku thäi kök la rëer thïn, bik kóc aa lek wël yam cik piŋ, ku piŋkë käk yam tënë kóc kök aya.)

²² Go Paulo rot jöt ku kęc amat Ariöpakuth nom ku lueel. “Kóc Athen! Aya tiŋ kajuëc yiic lön ye wek jak juëc theek. ²³ Rin te ciëth yen gendun yic, ku daai kakkun yakë door, yen ë yïk yök aya ke ci göt nom këlä, ‘Tënë Nhialic kuc.’ Yen kë yakë door kënë, yen ë kënë ya lek we, ku acäk ye ŋic. ²⁴ Nhialic ci piny cak ku käk tō thïn ëbën, yen ë Beny nhial ku piny. Ku acie ceŋ luëk ci buth yiic bi ye aa door thïn. ²⁵ Ku yeen aya, acie wïc kök bi luöi ye, rin ë yen atō piir yecin, ku ë yen këriëc ëbën wïc raan, gäm raan. ²⁶ Nhialic aci raan tök kaŋ cak tueŋ, ku raan töŋ kënë yen abi thäi bei thïn ëbën, ku jöl ke aa thië piny nom ëbën bi kek ceŋ thïn. Ku tueŋ kęc yen ke cak, ëci guir, ye nen, ku ye tenen bi kek ciëŋ thïn. ²⁷ Aci cak rin bi kek ye wïc bik ŋic, tedë abik yök te wïc kek ye. Ku ë yic Nhialic aci mec kek yo. ²⁸ Cïmën ci raan det ye lueel ëlä theer, ‘Yen acöl yo aa piir, ku ciëŋku cïmën kënë!’ Ku aci kockun wak lueel aya ëlä, ‘Yök aa miethke aya.’

²⁹ “Cïmën ye yok mieth Nhialic, acuk dhil tak lön Nhialic acit milän, ayi alet ci atët guaŋ bi thöŋ Nhialic. ³⁰ Akęc Nhialic kuëc nom, bi kóc tem awuöc wäär kęc ye ŋic, ku ëmën ë kóc lek piny nom ëbën, bik kärecc yekë looi puöl. ³¹ Rin aci guir bi la aköl töŋ bi raan ci löc luk looi tënë kuat raan ëbën piny nom. Ku yen aci nyuöth raan ëbën lön bi yen kënë looi, jön ci yen raan bi luk looi jöt raŋ yic!”

³² Tewën piŋ kek Paulo ke jam jön rot thou yic, ke bui kóc kök, ku lueel kóc kök ëlä, “Awïcku, ba kënë ben ber yic, buk piŋ.” ³³ Go Paulo jäl amat yic. ³⁴ Ku met röör kök röt ye, ku gamkë wet ci lueel, kam ë röörkä ë ye raan kóc amat cöl Diönithiöth, ku tiŋ cöl Damarith, ku kóc kök ke ci gam aake tō thïn aya.

Paulo aci la Korinth

18 ¹ Wën ci Paulo jam amat yic, ke jiël Athen ku ler Korinth. ² Ku rem thïn kek mony Itharel cöl Akuila, dhiëth Pontuth, ke puoc ben Italia kek Prithkila tieŋde, rin ci Klaudiöth, Benyŋaknom kóc Itharel cuop wei Roma. Go Paulo la bi ke la neem. ³ Ku rëer ku luui ke ke, wën ci yen ke yök ke ye cuëc aleth dhil ye guöt piny cit duel, ku Ƴockë ke cïmën yen aya. ⁴ Ku ë ye jam apeï te ye kóc Itharel mat thïn akööl ciï kóc ye luui yiic, bi ke lek yith, rin bi kóc Itharel ku kóc Giriik wet Nhialic gam aya.

⁵ Nawën la Thilath ku Timothï ben Mathedonia, ke Paulo päl kakkën ke ye looi ku yïk yenhom piöoc wet Jethu, ku tët kóc Itharel lön Jethu yen aluaŋ bi Nhialic tuöc piny nom. ⁶ Nawën ke jönykë ku luelkë kärecc rienke, go yecök teŋ ku lek ke, “Na cäk määb bak Nhialic kuc, ka wek aabi röt gök ë röt! Acin raan bak gök. Eëmën wek aba puöl ku la wet Jethu piöoc tënë kóc cie kóc Itharel.” ⁷ Goke jal nyääŋ piny, ku ler pan raan cie raan Itharel Nhialic door cöl Titiöth Juthtuth bi la rëer thïn. Ku pan Titiöth ë thiääk kek ten amat kóc Itharel. ⁸ Raandit ten amat cöl Krithputh ëci wet Nhialic gam, yeen ku kacke ëbën ku kóc kök Korinth aake ci wet Jethu piŋ ku gamkë, ku muoc Paulo kenhïim.

⁹ Naŋon weer tök, ke Paulo tiŋ këdän këcit nyuöth, ku lek Nhialic ye ëlä, “Duk riöc ë kockä, loor tueŋ yi jam tënë ke, ku duk dhör kë loi yic, ¹⁰ rin yen arëer kek yi. Acin raan bi ye lëu bi yiëk tetök, rin kóc juëc rëer ë ten aa kackie.” ¹¹ Go Paulo rëer geuu ruöön tök ku abak, ke piöoc kóc wet bö tënë Nhialic.

¹² Nawën ci Galio benyŋaknom Roma, jal looi bi ya benydit pan Giriik, ke kóc Itharel mat keyiic ku dömkë Paulo ku Ƴethkë luk yic tënë Galio. ¹³ Ku luelkë tënë ye, “Mony kënë, awic kóc bik Nhialic aa door dhöl ci thääny kek löŋda.”

¹⁴ Tewën wïc Paulo ye bi jam, ke luel Galio tënë kóc Itharel ëlä, “Na ye awuöc yen ci looi, nuöt yen acä yic päl piny ku piëŋ wetdun. ¹⁵ Ku ëmën nek ater we ë path wet rin ku wël ku lööŋkun, wek aa dhil këdun

^c17:18Aa kóc akut ë keŋ lueel pan Giriik.

lueel wepec. Yen acie beny kāk cīt kākā.”¹⁶ Ku cōl ke aa nyeei luk yic. ¹⁷ Gokē Thothenth, raandit ten amat dōm ku biekkē luk yic. Ku kēnē akēc Galio kuēc nom.

Paulo aci dhuk Antiök

¹⁸ Paulo eci nin juēc nōk Korinth kek kōc cī gam, nawēn ē ke tōōj ke, ku ler riāi yic kek Prithkila ku Akuila, riān la Thiria. Ku wēn kēc kek guō la wīir bik ger, ee cī kuēēj Kankēria tēnē Nhialic, ku cōl rot amut nom. ¹⁹ Nawēn ē ke yet Epethuth, te cī Paulo Prithkila ku Akuila ben nyāān thīn. Ku ler ten amat kōc Itharel, ku jieem apeī ke ke. ²⁰ Ku pēēn kōc amat bī lōk reer kek ke, go cīi gam. ²¹ Ku lēk ke ēlā wēn jiēl yen, “Na ye yen kē wīc Nhialic, ke yen abī dhuk tēnē we.” Ku ler riāi yic ku jiēlkē Epethuth.

²² Wēn le yen yēēt Cetharia, ke la Jeruthalem ku muōth akut kōc cī gam, ku jōl la Antiök. ²³ Nawēn cī nin nōk Antiök ke jiēl ku ler wuōt Galatia ku Prigia ku deet kōc cī gam thīn ēbēn puōth.

Apolo ē kōc Epethuth ku Korinth piōōc

²⁴ Go raan Itharel cōl Apolo, dhiēth Alekdhāndria pan Ijip, ben Epethuth. Yen ē njic wēl theer cī gōt athōr theer wēl Nhialic yic, ku ē njic jam apeī. ²⁵ Ku eci piōōc dhēl Beny ku nhiēer ke ku jieem ku piōōc kōc yith rin Jethu. Ku kākā aake pēk thook miōc nom wāār ye Joon looi. ²⁶ Ee ye kēriēēc ēbēn njic teet yiic apath ten amat ke cīi riōc. Tewēn piņ Prithkila ku Akuila wēlkā, gokē yāth panden ku tētkē dhōl cī Nhialic nyooth tēnē kōc.

²⁷ Ku jōl Apolo tak bī la pan Gīrik, go kōc cī gam Epethuth kony ku getkē athōōr tēnē kōc cī gam tō pan Gīrik, ku lēkkē ke bik njic lor apath te yet yen. Ku yeen aci ben aa raan cī kōc cī Nhialic kuony dheenje bik gam, ben kony apeī wēn yet yen. ²⁸ Rin wēlken ril cī lueel aci yen kōc Itharel thōl nhīim amat yic, ku nyuth ke yith wēl theer Nhialic cī gōt yiic lōn Jethu yen ē raan cī lōc ku dōc.

Paulo aci la Epethuth

19¹ Tewēn rēer Apolo Korinth, ke Paulo jōl cath bī wuōt kuany yiic ku yet Epethuth. Teen, aci kōc kōk abiōth yōk thīn ² ku thiēēc ke, “Cī Wēi Nhialic lōony wegup wēn cī wek gam?” Gokē dhuōk ye, “Akēcku cak piņ lōn tō Wēi Nhialic thīn.”

³ Go Paulo ke thiēēc, “Na ye kēya, ye miōc nom nō cak yōk?” Gokē beer, “Ee miōc nom ye Joon gām kōc.”

⁴ Go Paulo lēk ke, “Miōc ye Joon kōc muōc nhīim aye looi tēnē kōc cī kepuōth wel wei kārec yiic. Ku lēk kōc Itharel wek aa dhil Jethu raan bī lōk ben yacōk gam.”

⁵ Wēn piņ kek ē wet kēnē, ke muōc nhīim bik jāl aa kōc buōth Jethu. ⁶ Ku tēu Paulo yecin kenhīim, ku bō Wēi Nhialic kegup, ku jieemkē thok kōk, ku jōlkē wet cī ben tēnē Nhialic aa lueel. ⁷ Ku rōōr aake cīt thiāār ku rou ēbēn.

⁸ Ku ten pei kadiāk, Paulo ē ye la te ye kōc Itharel mat thīn, ku jieem ke ke apeī lōn ye wet ye lueel rin bāāny Nhialic yic. ⁹ Go kōc kōk nhīim riel keyiic ku cik gem, ku luelkē kārec apeī kōc nhīim rin dhēl pīr cī Beny nyooth. Go Paulo ke nyāān piny ku jiēl kek kōc cī gam, ku jōlkē wet aa jaam yic akōlakōl, yōndit ye mony cōl Tiranuth jam thīn tēnē kōc juēc. ¹⁰ Ku la Paulo tueņ run karou ke loi kēnē, abī kōc ke reer wun Athia, kōc Itharel ku kōc cie kōc Itharel, wet Beny piņ.

Aye weet Ithkiba them bik jakrec cuōp wei

¹¹ Nhialic eci Paulo cōl aloi kāk kōc gōi kēc rōt kaņ looi. ¹² Alanh yen tuc wuony, ku alanh ye ceņ ten luoi, aake ye yāth tēnē kōc tuany. Ku te cī ke yāth, aa tuaany cōl ajiēl ku jiēl jakrec kegup aya. ¹³ Eci kōc kōk Itharel kēc gam baai kuany yic ke ye jakrec cuōp wei kōc gup, aa them aya bik rin Beny Jethu aa lueel, ku yekē jam tēnē jakrec ēlā, “Yīn ayōōk rin Jethu, ye Paulo jam rienke.” ¹⁴ Weet raandit kāk Nhialic cōl Ithkiba kadhorou kek aake ye kēnē looi.

¹⁵ Go jōņrac lueel tēnē ke, “Yen anjic Jethu, ku yen aci wet Paulo piņ ku week yakē tak ye wek yī ŋa?”

¹⁶ Go raan tō jōņrac yeguōp thueet kegup ku yīk ke tetōōk, ku ret alāthken yiic kekōth. Nawēn ke kat paande kecīn kōth aleth, ke kuēr gup aya. ¹⁷ Kōc Itharel ēbēn ku kōc cie kōc Itharel ke ciēj Epethuth, aake cī kē cī raan la guōp jōņrac looi piņ, gokē riōōc apeī, ku jōl rin Beny Jethu aa leec apeī. ¹⁸ Go kōc juēc cī gam ben ku lekkē kākken rec cik looi kōc nhīim.

¹⁹Go acör juëc luui ë kakkä athörken bæei ku cuänykë ke ke dæi raan ëbën. Ku matkë wëëu ke yoc athör yiic gokë aa wëëu juëc apeï. ²⁰Käjuëc ril cï röt lookä aaci koc cök puöth apeï, ku jol wet Beny la tuej ke thiëi piny, ku gem koc juëc.

Koc Epethuth aacä aliäap looi

²¹Wën cï kakkä röt looi, ke bö Paulo puöu bi la Jeruthalem ke tæk Mathedonia ku Girik, ku lueel, “Te cï yen la ë bæikä yiic ke yen abi dhiel la Roma aya.” ²²Go Timothï ku Eratuth kocken ye kony tuoc Mathedonia, ku lök reer Athia.

²³Tewën rëer yen Athia yen ëci aliäm düt rot looi Epethuth rin dhël piir cï Beny nyooth. ²⁴Mony thöth milöönj col Demetriöth ë tö thin. Ku yeen ë ye kån thöth milånj këcit luëk kor ye ke jån tik col Artemith door thin. Ku kocken luoi aake wëëu juëc yök ë luoiden këne yic. ²⁵Go kocken luoi col ëbën, ku col koc kök milöönj thöth këcit luëk Artemith cümenden aya, ku lëk ke, “Week, anjäckë lön ye yok wëëukuan piir yok yök ë luoi këne yic. ²⁶Ayakë piñ ku tienkë yen kë looi raan col Paulo. Aye lueel lön kæk ye thöth aacie Nhialic acin, ku yeen aci koc juëc wel nhïim Epethuth ë ten, ku jol a Athia ëbën. ²⁷Kërac abi rot looi rin koc aaci bi njec aa jam ë luoidan këne. Ku acie këya rot, acin koc bi ye ben aa tak lön ye luån jån dan col Artemith kë thiek yic. Ku acin koc bi jån dan col Artemith ben aa theek, jån dan ye raan ëbën Athia ku pinynhom, door!”

²⁸Wën piñ thån awën cï kenhïim mat kë cï Demetriöth lueel, ke tuuc kegup ku riëkkë puöth apeï, ku loikë wuoc ku yekë lueel ëlä, “Artemith Epethuth adit apeï alanden!” ²⁹Ku jol koc juëc geu yic ëbën, duot looi. Ku dom thån awën Gaiöth ku Arithtarkuth, koc pan Mathedonia ke cath kek Paulo, ku riinkë ke te ye koc geeu kenhïim mat thin. ³⁰Go Paulo wic bi la jam kek koc wën cï kenhïim mat. Go koc cï gam pëen bi cï la. ³¹Ku koc kök njec kek ye koc düt geeu yiic aake cï wet tooc aya bik lek, bi cï bö bi ben jam koc nhïim. ³²Tewën koc ke cï ben amat yic aake loi duot. Ku ye koc kök jam wël cï thönj kek wël koc kök, rin koc juëc keyiic aake cök këne met koc kenhïim kuc. ³³Go koc kök tak lön ë yen Alekdhänder yen cï këne looi, rin cï koc Itharel ye col ala koc nhïim tuej. Go Alekdhänder yecin jot bi koc col abit, ku bi tet ke lön cï kek cök tö ë wet këne yic. ³⁴Nawën lek Alekdhänder njic lön ë yen raan Itharel, ë ke not ke loi duot ku not yekë kiit yic, “Artemith Epethuth aril apeï alanden.”

³⁵Nawën ke jol raandit beny geeu lëu bi koc duöm thook piny ku lueel, “Koc Epethuth anjic raan ëbën, lön yen gen Epethuth yen ala riel bi luån Artemith tiit, ku jol a kuör yath cï löny nhial. ³⁶Acin raan dhäl ë kakkä. Këya, pälkë röt piny, ku duökkë lui luoi mith. ³⁷Wek aaci röörkä bæei ë ten, cök alon cin yen kë yaath cï nyaai luëk, ku lön cin yen kërec cik lueel jån da guöp aya. ³⁸Na la Dimitriöth kek kocken luoi raan yekë gaany, ka akööl ye koc luk aatö thin ku bany aa rëer thin, alëukë bik raan wickë la gaany akölë. ³⁹Ku na le këdeet not wieckë, ka bi luk amat düt yic. ⁴⁰Rin alëu bany Roma kuan mac yo bik lueel lön cï yok aliäap looi rin kë cï rot looi akölë, rin acin raan lëu ye bi lueel, lön ala wet puöth looi aliäap, ku acin wet yic lëuku buk lueel aya rin aliäm këne.” ⁴¹Wën cï yen wet këne lueel, ke däk amat nom.

Paulo aci la keny Mathedonia ku pan Girik

20¹Tewën cï koc ke wic Paulo bik nöc röt päl piny, go Paulo koc cï gam col ku met ke ke, ku lëk ke wël deet yen kepuöth ku jol ke töönj, ku jiël bi la Mathedonia. ²Ku jol cath wuöt juëc yiic ku lëk koc cï gam wël juëc deet yen kepuöth bæei cï ke tëek yiic. Ku jol la wun Girik. ³Ku rëer thin pei kadiäk. Tewën guiir yen rot bi la Thiria, go njic lön cï koc Itharel ye thien dhël yic bik nöc. Go tak ku dhuk ciëen bi la tëek Mathedonia bi jäl la Thiria. ⁴Koc cï yen ben ruac aayi Thopater, wën Piruth, raan pan Beria, ku Arithtarkuth, ku Thekunduth koc Thethalonika, ku Gaiöth, raan Derbe, ku Tikikuth ku Tropimuth, koc wun Athia, ku jol aa Timothï. ⁵Keek aaci la tuej ku lek ya tiit yok koc kök ke cath kek ya Troath. ⁶Ku yok aaci cath riäi jäl Pilipi ke yo cï Yan Ayum cin yic luou kan cam. Nawën nin kadhiëc cök, goku ke jal la dööt Troath, ku ë yen te cï yok nin kadhorou ben nöc thin.

Paulo aci dhuk Troath

⁷Nayon thëei aköl nin dätem, ke yok aa yo cï yonhïim kut ku buk ayup bany yic ku camku yok koc cï gam. Ku jol Paulo jam, ku le tuej ke jiëem koc nhïim yet weer ciel yic, rin ë bi jäl yon nhiäk. ⁸Ku mec juëc aake dep yon nhial tewën met yok thin. ⁹Ku mony riënythii col Eyutikuth ëci nyuc aluüt nyin. Nawën cï jam Paulo kou ber apeï, go nin nöc abi nin, ku lööny piny aluüt nyin ayeer. Ku yöt ëci buth ke cöoc nom arak diäk. Nawën lek jot ke yökkë ke cï thou. ¹⁰Go Paulo ben ku cuet rot yekou ku peet yic. Ku lëk koc, “Duökkë rioc, anjot piir!” ¹¹Ku dhuk nhial, ku le röök ku banykë ayup ku camkë. Nawën cï jam ke ke apeï agut bi piny bak, ke jiël. ¹²Ku yethkë riënythii wën baai ke piir, ke cï puöth miet apeï.

Paulo aci jäl Troath ku ler Miletuth

¹³ Yok aaci la tueñ buk la riäi yic, ku ger yo buk la Athoth ten yen bi Paulo la met riäi yic thin. Ku eci lek yo ku buk looi këya, rin ë wic bi la Athoth yecök. ¹⁴ Nawën le röm ke yo Athoth, go cath kek yo riäi ku lokku Mitilene. ¹⁵ Ku tēmku ë riäi ku yeetku Kayoth yon nhiäk det. Na aköl deet ke yo la Thamoth, nawën ben bak goku yet Miletuth. ¹⁶ Ku eci Paulo tak ku bi Epethuth waan thok, rin ci yen ye wic bi gääu wun Athia. Ku ë ban yekou rin ë wic bi them apeï bi yet Jeruthalem aköl looi Yan Ayum cin yic luou.

Paulo aci kocdit Epethuth töñj

¹⁷ Tewën ci Paulo yet Miletuth go thok tuoc tēnē koc Epethuth, ku bi kocdit kek bāny koc ci gam röm kek ye. ¹⁸ Tewën ci kek yēet go lek ke, “Wek aa ñic luoidie, ku te ci yen cieñ thin kek we aköl töñj yon yēet yen wun Athia. ¹⁹ Yen akēc rot looi ke ya ye raan nhiam. Ku yen ya loi luoi ya ya aluañ Nhialic. Ku yen ya ye rēer ke ya dhiau puou wet pir ril yic ye koc Itharel ye wic bik yen nöc. ²⁰ Yen acin kë ca muöny we, kēn yen bi we kony tewäär ye yen koc lek, ku ya koc piöc wet Nhialic agut bääikun yiic. ²¹ Koc Itharel ku koc cie koc Itharel, aa ca ke aa lek alanden ku bik kepuöth dhuök ciēen ku gamkē wet Bānyda Jethu. ²² Ku emēn, rin theek yen wet ci Wēi Nhialic lek ya, ke yen adhuk Jeruthalem, ku akuoc yeñö bi rot la looi tēnē ya tetui. ²³ Kēn yen ñic ë kë ci Wēi Nhialic thōn yen geeth ca tēek yiic ë lon bi ya mac, ku karec bi luoi ya geeth yiic ebēn aatit ya. ²⁴ Ku pierdie acā ye kueec nom lon ye yen kēpath tēnē yen, ku ë rin wic yen ye ku ba luoi yen ci Beny Jethu yiiek ya ba thöl, yen lon bi yen ye aa lek koc, yen thoñ path tenhieer Nhialic koc thin.

²⁵ “Yen aci cath kamkun, ke ya jam wet bāāny Nhialic. Ku añiec emēn lon cin yen raan det kamkun bā ben tiñ. ²⁶ Kēn yen alek we ku bāk muk wenhiim akölē, te le yen raan bi dhel ca nyooth lök puöl bi mää, ka cii yen bi gök. ²⁷ Rin acin kēdet ca moony kec lek we ye kë wic Nhialic ebēn ku bi looi. ²⁸ Tietkē röt apath ku tietkē koc ci Wēi Nhialic we looi bāk aa koc mec ke. Calkē röt aaye abiök koc ci wet Nhialic gam, koc ci looi bik aa kacke thon Wēnde. ²⁹ Añiec na la jäl ke koc ater Nhialic, cit gal ci wāth aabi ben kamkun, ku keek acin raan tök kam koc ci gam bik puöl. ³⁰ Ninkui bi ben koc kök akuötdun yic aabi lueth aa lueel na lēükē ka wēñ koc ci gam. ³¹ Tietkē wenhiim, ku duökkē nhiim mär, añiec wek aca piöc piu nyin aköl ku weer ten run kadiäk.

³² “Ku emēn wek aca päl Nhialic bi we tiit dhēenjen nhieer yen we. Yen ala riel bi we döc bāk kēpath yök, kēpuöth kek ye yiiek kacken ci loc. ³³ Acin kēpuöth raan det cimēn luñ thith, ku milāj töc, ku aleth ca tuöör nyin. ³⁴ Añieckē wepec lon ke luoi ca looi, ci yen ke wēu juēc yök thin aa kek ci yen kākkie ku kāk koc reer kek yen yoc. ³⁵ Aca nyuöth we kajuēc yiic ebēn, lon nadē raan luui apeï yen ë koc niop kony, ku wēl ci Beny Jethu lueel aake muök yanhom yon ci yen ye lueel älā, ‘Raan koc muoc ë yen puou miet apeï tēn lon bi raan det ye muoc!’ ”

³⁶ Tewën ci Paulo thök jam, gokē kenhiol guöt piny ku röökkē Nhialic. ³⁷ Keek aaci dhiau tewën ye kek Paulo paat yic, ku yekē ciem ke tōñkē. ³⁸ Keek aake rec puöth wet ci yen ye lueel älā, wek aaci ya bi ben tiñ. Ku jolkē ruac riäi yic.

Paulo aci la Jeruthalem

21 ¹ Yok aaci koc ci gam ke bö Epethuth töñj ku jiëlku. Tewën ci yok wär teem riäi, goku yet te col Koth. Nayon aköl deetē ke yo yet pan col Rodeth, ku jiëlku thin ku lokku te col Patara. ² Ee teen yok aaci riän la Ponicia ben yök thin, goku keec thin ku ger yo. ³ Yok aaci ben yet te ye yok Thaipruth tiñ thin, ku jol riäi cath ke Thaipruth tö köñ cam ke yo la Thiria. Yok aaci ben la piny riäi yic Tire, ku ë yen ten bi kāk ke tö riäi yic la jat piny thin. ⁴ Yok aaci koc kök ci gam ben yök Tire, goku rēer ke ke nin kadhrou. Keek koc Tire aake ci Wēi Nhialic yöök ku bik Paulo lek ku bi cii la Jeruthalem. ⁵ Na la ninkuan ke buk nöc ke ke Tire thök, goku jäl. Keek ebēn agut diäär ku miethken aaci yo ben ruac. Nawën yeetku wath thok ke yo gut yonhiol piny agör thok ku röökku Nhialic. ⁶ Ku tōñku ke ku lok riäi yic ku dhukkē baai.

⁷ Yok aaci ger jäl Tire agut Ptolimiath, te yen ci yok kockuan ci gam ben la muöth thin ku rēerku ke ke nien tök. ⁸ Na aköl deetē ke yo jiël ku yeetku Cetharia. Teenē, yok aaci ben la pan Pilipo raan koc piöc Wet Puöth Yam Nhialic, ku rēerku kek ye. Yeen ë ye raan tōñ koc kadhrou ke ci kuany Jeruthalem. ⁹ Yeen ë la nyiir kañuan këc thiaak ku keek aake cit koc kāk Nhialic tiñ. ¹⁰ Tewën ci yok nin nöc paande ke raan kāk Nhialic tiñ col Agabuth bö wun Judia, ¹¹ bi yo ben tiñ. Ku lööm gom ye Paulo yeyic duut, ku duut yecök ku yecin ku lueel, kë ci Wēi Nhialic lek ya akın, raan la gom kēnē abi koc Itharel la der Jeruthalem cit emēn ci yen ye nyuöth, ku abik thōn koc cie koc Itharel.

¹²Tewën piñ yok ë wet kënë, yook ku jol aa koc ë pan wën, goku Paulo lõñ bi cii la Jeruthalem. ¹³Go dhuök yo ëlä, “Yeñö luoikë ëmën dhieeu wek këlä, bäk ya col aköc puöu? Acie lon bi yen la der Jeruthalem yetök yen ca gam, awiëc aya ku ba la thou thin rin Beny Jethu.”

¹⁴Ee këcku lëu buk dök, goku puöl, ku jolku lueel, “Pelku Nhialic ku bi kë ci tak looi.”

¹⁵Tewën ci yok nin ë teen, ke yo jol röt guir ku jielku buk la Jeruthalem. ¹⁶Koc kök kam abiöth Cetharia aaci yo ben ruac, ku yethkë yo pan raan bi yok la reër thin col Menthon, raan Thaipruth, ku ë ye raan töön kam koc tuej ke koj wet Jethu gam.

Paulo aci Jemith la tiñ

¹⁷Nawën yeetku Jeruthalem go koc ci gam yo lor ke mit puöth. ¹⁸Na la aköl deetë ben, goku la yok Paulo buk la jam kek Jemith, ku kocdit käk Nhialic aake tö thin. ¹⁹Keek aaci Paulo jal muöth ku jolke kueny yic käk ci looi ëbën tënë koc cie koc Itharel riel ci Nhialic yiëk ye. ²⁰Nawën cik käk ci Paulo kuany yiic piñ, gokë Nhialic leec. Ku jolkë lek ye, “Alëu ba tiñ ëmën yin wämääthda. Koc juëc apeidit ke ye koc Itharel aaci gam, ku keek aa thek lõñ Mothith apeidit. ²¹Ku acik piñ lon ye yin koc Itharel tö wuöt kök yiic piöc ku bik Lõñ Mothith puöl. Ku aca aa lek ke bik miethken cii ye noot ku pälkë tecit te ye koc Itharel cieñ thin. ²²Abik dhiel piñ yen lon ci yin yett. Yeñö buk looi ëmën? ²³Añueen ba kë buk lek yi looi. Ala koc kañuan ë ten ci kuëñ. ²⁴Cath ke ke, ku mät rot koc bi kegup wuöñny wei, bäk röt koc ë tök ku täau weuken piny, wëu käk kek bi kek röt köc, ku keek aabi kenhim muut. Këya, abik jal ñic ëbën lon wël ci lek ke rienku aa lueth, ku yinhom yin adhil ceñ tecit te ye lõñ Mothith ye lueel thin. ²⁵Ku koc cie koc Itharel ci gam, aa cuk tuöc athöör buk lek ke bik müith ci ke jakrec door cii ben ya cam, ku jol aa riem ku län det ci dec, ku titkë röt bik gup cii la akor.”

²⁶Go Paulo rot mät röör wën, nayon nhiäk ke koc rot ke ke. Ku jol la luañ Nhialic, ku lëk koc te bi nin koc thök, ten yen bi koc jal a looi tënë raan tök keyiic ëbën.

Paulo aci thel ayeer luañ Nhialic

²⁷Nawën ci nin kadhrou thiök ke thök, go koc kök Itharel ke bö wun Athia Paulo tiñ luañ Nhialic. Gokë koc rac nhim ëbën ku dömkë Paulo. ²⁸Ku luelkë ke ci keröt jot, “Koc Itharel! Kuonykë yo! Yen raan kën, ee yen piny kuany yic ke piöc koc ku ye lueel koc Itharel aa koc rec, ku ë lõñ Mothith, ku jol a luañ Nhialic kënë yöñ yiic. Ku ëmën aci koc cie koc Itharel bæi luañ Nhialic aya, ku bik ben yiëk yic buööl yen ten atheek Nhialic!” ²⁹(Ee luelkë yen kën, wet ci kek Tropimuth raan Epethuth tiñ ke cath kek Paulo geeu, gokë tak lon ci Paulo ben kek ye luañ Nhialic.)

³⁰Go aliäap thië kal yic ëbën, ku jol koc kat ku lek Paulo döm, ku thelkë ayeer luañ Nhialic. Ku thiökkë kal thok nyin yic. ³¹Tewën wic kek ye bik Paulo nöc, ke thok ëci tuöc tënë beny apuruuk Roma lon nadë ke koc ëbën Jeruthalem aa loi ariëer. ³²Go beny apuruuk lööny dhöl nyin yic kek bäny kök apuruuk ku apuruuk, ku riñkë ten tö yöm thin. Nawën tiñ thän awën wic Paulo bik nöc apuruuk, gokë puöl.

³³Go bäny apuruuk la tënë Paulo ku dömkë, ku yöökkë apuruuk bik der cin arëk karou. Ku jolkë thiëc, “Yeña yen monyë, ku yeñö ci looi?” ³⁴Go koc ke tö yöm yic wël cii thöñ aa lueel. Ku jol aliäap rot looi agut bi bäny apuruuk cien kë detkë, kë ci rot looi yic. Gokë apuruuk yöök bik Paulo kuaath teden reër kek thin. ³⁵Nawën cik jal cath ku reëtkë tethöny, ke yööm juak rot apeï, go apuruuk Paulo jot. ³⁶Gokë buöth ku yekë kiu ëlä, “Bäk, dhilku nöc.”

Paulo aci rot kony

³⁷Tewën dööt kek te ye apuruuk reër thin, go Paulo lek beny apuruuk, “Ci ya päl ku ba yi lek wet diëne?”

Go beny apuruuk jal thiëc, “Ye jam thoñ Girik? ³⁸Ku yin, cii ye raan Ijip wäär ci raan tim kañuan muk dhej wat nhim roor, ku wic ba thör kek koc mac baai?”

³⁹Go Paulo dhuk nom, “Yen ë raan Itharel, dhiëth pan col Tarthuth wun Cilicia, yen ë raan gen diit ñic. Päl ya ku ba jam tënë koc.” ⁴⁰Ke yeen aci beny apuruuk ben puöl ku bi koc jääm nhim, ku jol Paulo keec nhial tethöny ku nyooth yecin bi koc biet. Nawën cik biet, go Paulo jam tënë ke thuonjen.

22 ¹“Kockien dit ku wek wämäthkie ku wek wärkua, piñkë apath yen acin këreec ca looi nek ya.” ²Nawën piñkë ke jam thuonjen, gokë biet, abi piny la dil ku jol Paulo la tuej ke jam, ³“Yen ë raan Itharel, dhiëth Tarthuth wun Cilicia, ku yen ya dit Jeruthalem ten ku ë Gamaliel yen acä piöc. Yen aci piöc te bi yen löönj wärkuan dit theek thin, cimëndun wek koc tö ten akölë. ⁴Yen aci koc ke buöth dhël kën yic col agum. Yen aci röör ku diäär col amac. ⁵Raandit käk Nhialic ku koc akut luk ëbën alëukë ku bik lueel lon

nadë ke yic yen kë ya lueel. Keek aacä yiëk athör ku ba ke la yiëk köckuan Itharel tö Damathkuth. Ke yen aci köc cï gam ben la ðom ku rek kecin, ku kueth ke ciëen Jeruthalem rin bi ke ben tem awuöc.”

Paulo aci te cï yen a raan cï gam teet yic

⁶“Yön aköl ciel yic ke ya cath, ya cï thiök kek Damathkuth, ke këcüt mac la biliny nhial ku go ya guo gööl piny. ⁷Ku wiesek piny ku piñ röl raan ke jam ku lëk ya, ‘Thawul! Thawul! È rin nõ cöl yin ya agum?’ ⁸Guo thiëc, ‘Ye yin ña Beny?’ Go lek ya, ‘Ee yen Jethu raan Nadharet, è rin nõ cöl yin ya agum.’ ⁹Köc ke cath kek ya aake cï mac tiñ, ku aa këc röl jam tënë ya piñ. ¹⁰Guo thiëc, ‘Yeñö ba looi, Beny?’ Ku aci Beny ben lek ya, ‘Jöt rot ku löör Damathkuth, ku yin abi la lek këriëec ebën yen cï Nhialic tak ku ba looi tënë ye.’ ¹¹Yen ya cï many cä bir nyin cöör, go köc ke cath kek yen ya thel ku yethkë ya Damathkuth.

¹²“Ku mony cöl Ananiath è tö Damathkuth, ku è ye raan Nhialic door ku è thek löñ köc Itharel, ku yeen è thekkë apei. ¹³Yeen ëci ben tënë ya, ku keec yalööm ku lueel, ‘Wämäath Paulo, ba pial ba ben daai!’ Nyin yic nyiendie aci rot ben liep ku tiñ piny. ¹⁴Ku lueel, ‘Nhialic ye wärkuan dit door aci löc ku ba kë wic ba looi tënë ye ñic, ku tiñ Aluandeen puöth kakkä looi, ku piñ rölde ke jam. ¹⁵Ku yin abi ya raan ñic è wet këne, ku ba raan ebën lek kë ca tiñ ku käk ca piñ. ¹⁶Ku emën, yeñö ñuöt tit? Jöt rot ku bi yi muöc nhom, ku cöl adumuömkku aa löök wei, ku ba Nhialic ya röök.’

Nhialic aci Paulo yöök bi köc cie köc Itharel piöc

¹⁷“Ku jal dhuk Jeruthalem, ku wën cï yen la ba la röök luan Nhialic, ke ya tiñ kecüt nyuöth, ¹⁸ku tiñ Jethu ke lëk ya, ‘Jäl emën Jeruthalem ku ban yiköu, rin köc tö ten, aaci welkun ba ya lueel rienkie bi gam.’ ¹⁹Guo dhuk nhom, ‘Beny, anickë apath lön cï yen a la yön amat Itharel yiic, ku dam köc cï gam ku cal ke aa that. ²⁰Ku è ca gam wäär ku bi Ithipin nöc raan ye köc piöc wetdu, ku è yen ya cä aleth köc ke nek ye lök tiit.’ ²¹Go Jethu lek ya, ‘Löör, rin yin aba tuöc temec tënë köc cie köc Itharel.’ ”

²²Go köc wën wël Paulo piñ, agut lön lueel yen wet bi ye tuöc tënë köc cie köc Itharel. Gökë duöot ben looi, “Nyaakë raan cit kë è pinyhom! Näkkë! Acie raan path bi pir!” ²³Ku jolkë aa kiu, ke ya alethken pier nhial ku yekë liet weer nhial. ²⁴Go beny apuruuk Roma apuruuk yöök bik Paulo yäth yöt te ye apuruuk tüit thün, ku lëkkë ke ku bik that, rin bi Paulo wet ye köc Itharel ye jääm guöp lek. ²⁵Ku wën cï kek ye der ku bik that, go Paulo lek beny apuruuk wën kääc kelöm elä, “Ye löñ lueel lön nadë ke raan Roma that è path ke këc yäth luk yic, bi la awuöc yök yeguöp?”

²⁶Nawën piñ beny apuruuk wet cï Paulo lek ye, go la tënë benydit apuruuk ku thiëc, “Yeñö loi? Yen mony è raan köc pan Roma.”

²⁷Go benydit apuruuk la tënë Paulo ku thiëc, “Lek ya, ye raan Roma?” Go Paulo beer, “Ee yic.”

²⁸Go benydit apuruuk lueel, “Yen è raan köc pan Roma rin cï yen wëu juëc täau piny tënë köc mac baai.” Go Paulo beer, “Yen è raan pan Roma rin ye köc ke dhiëth ya köc pan Roma.”

²⁹Go köc kök ke bi Paulo ben thiëc, dhuk ciëen ku nyiëñkë thün, ku benydit apuruuk ëci riöc wën cï yen ye ñic lön ye Paulo raan köc Roma, ku rin cï yen ye cöl ader aya.

Paulo aci yäth luk yic

³⁰Na aköl deet, wën wic beny apuruuk Roma ye bi awuöc ye köc Itharel Paulo gaany ñic, go Paulo cöl adek apuruuk cin, tewën cï ye rek ku yöök köcüt käk Nhialic ku köc amat ebën bik röm. Ku bi Paulo kenhim.

23 ¹Go Paulo köc amat dot ku lueel, “Kackie, acin käk tö yapuöu, ba ke thiëc rin pierdie, ya deei Nhialic agut cit akölë.” ²Ee teen, ke raandit käk Nhialic cöl Ananiath yöök köc wën kääc tethiök kek Paulo bik buöök thok. ³Go Paulo lëk ye, “Nhialic abi dhiel buöök aya, yin kë cie guöp ye yär! Yin aci nyuc ba luk looi tënë ya cit te ye löñ ye lueel thün, ku yin ajet yi cii löñ dhoñ köu rin cï yin köc yöök bik ya biäk!”

⁴Go köc thiäak kek Paulo lëk ye, “Yin alat raandit käk Nhialic!”

⁵Go Paulo beer, “Acä ñic, kackie lön ye yen raandit käk Nhialic. Aye athör theer wël Nhialic lueel, ‘Yin aci kërac dhil lueel beny mac kaku guöp.’ ”

⁶Nawën tiñ Paulo, ke köc kök aa köc akut Thaduthi ku köc kök ke ye köc akut Parathi, ke jam apei röldit tënë köc luk, “Kackie! Yen è raan akut Parathi, köc ke dhiëth ya aake köc akut Parathi. Yen aci beei luk yic rin ye yen ye nõöth lön bi köc cï thou röt jöt aköldä!”

⁷Nyin yic tewën lueel yen wet këne, ka agöth la nhial kam Parathi ku Thaduthi ku tekkë keyiic. ⁸Rin aye Thaduthi lueel lön cii köc röt bi jöt thou yic, ku acin atuuc nhial ayi atip köc cï thou. Ku Parathi aa kakkä

gam ëbën kadiäk. ⁹ Ku juak jam rot apeï kam Parathï ku Thaduthï. Go kœc kœk piöœc lööñ, ke ye kœc akut Parathï, röt jœt ke cï puœth riääk apeï ku luelkë, “Acïn këreec cï yœk ke cï looi! Tedë, ke atuny nhial, yen acï diet jam tënë ye!”

¹⁰ Ku la agœth nhial apeï, nawën ke beny apuruuk riœc ciet ke bi Paulo cak nœk. Go apuruöœkke tooc bik Paulo la nyaai luk yic, ku yethkë teden ye kek rëer thïn.

¹¹ Nayœn akœu ke Beny kääc Paulo löœm ku lueel, “Deet yïpuœu! Aca nyuœœth Jeruthalem, lœn ë yïn raandie, ku yïn adhil këcït ë kënë looi Roma aya.”

Ee wïc kœc Itharel bik Paulo nœk

¹² Nayœn nhiäk ke kœc kœk Itharel mat kenhïim, ku kuëñkë lœn cïi kek kuat miëth bi kañ cam ku dëkkë te këc kek Paulo kañ nœk. ¹³ Kœc ke mat kënë yic, aake thiärñuan ku te kac. ¹⁴ Ku lek tënë kœc käk Nhialic ku kœcdït baai ku luelkë, “Yœk aaci kuëñj apeï yodhie buk cïi mïth, yet te bi yœk Paulo kañ nœk. ¹⁵ Ku ëmën, week ku kœc kœk akut, tuœœckë wet tënë benydit apuruuk raan Roma bi Paulo beei tënë we, ku luelkë lœn wïc wek ye bæk kë cï looi ben deet, ku yœk aabi röt guir buk nœk kë këc yett wenhïim.”

¹⁶ Ku wën nyankën ë Paulo ëcï wet nek ner piñ, go riñ te rëer apuruuk thïn ku le wet lek Paulo. ¹⁷ Go Paulo raan tök kam bány apuruuk cœl ku lëk ye, “Yäth riënythii kënë tënë benydit apuruuk, ala wet wïc bi lek ye.”

¹⁸ Go beny apuruuk riënythii wën yäth tënë benydit apuruuk ku lueel, “Yen acï Paulo, raan mac, cœl ku lëk ya ba riënythii kënë beei tënë yï, rin ala wet bi ben lek yï.”

¹⁹ Go benydit apuruuk dœm cin ku yeth teden röt ku thiëc, “Yeñö wïc ba lek ya?”

²⁰ Go lueel, “Acï kœcdït Itharel mat yic bik yï thiëc bi Paulo yäth luk yic nhiäk, rin wïc kœc luk ye bik käk juëc cï Paulo looi la deet. ²¹ Ku duk wetden piñ, rin abi la raan thiärñuan ku te kac bi ye thien bik nœk. Aaci kuëñj bik cïi mïth ku dëkkë yet te bi kek ye nœk. Ku ëmën aaci röt guir bik looi, ku aa tit wetdu bik piñ.”

²² Go benydit apuruuk lek ye, “Duk ben lek raan det lœn cï yïn ya lek wet kënë.” Ku cœl riënythii ajiël.

Paulo acï yäth tënë benydit Pelik

²³ Nawën ke benydit apuruuk cœl bányken apuruuk karou ku lueel, “Kuanykë apuruuk buœt karou ku jœl aa raan thiärthorou cath mathiän, ku raan buœt karou ke muk tœœñ bik la Cetharia, ku rëerkë ke cï röt guir bik löœny dhœl ëmën akäu. ²⁴ Ku wieckë mïthiœœñ bi Paulo ke cath, ku yäthkë tënë benydit Pelik ke cïn këreec yœk ye dhël yic.” ²⁵ Ku jœl benydit apuruuk athœr göt ëlä,

²⁶ “Yen, Klaudiœth Lithiath yen aget athœr kënë tënë yï benydit Pelik path apeï. Yïn aca muœth. ²⁷ Kœc Itharel aake cï mony kënë dœm ku duërkë nœk. Ku aca piñ lœn ye yen raan Roma, guœ la kek apuruöœkkie bik la kony. ²⁸ Ë wiëc ba awuœc ye kek ye gaany ñic, guœ yäth amat yic tënë ke. ²⁹ Aca yœk lœn acïn awuœc cïi looi bi yœk ye nœk, nadë ke macku. Ayekë gaany käk la thiääk kek löœñken. ³⁰ Nawën la lek ya lœn cï kœc kœk Itharel wet mat yic bik mony kënë nœk, guœ tak ba tuœœc tënë yï. Ku lek kœc awën gœœny ye, week lak tënë Benydan dit bæk awuœc cï monyë looi la lueel yenhom.”

³¹ Go apuruuk këwën cï lëk ke looi. Ku nyëikë Paulo ë weer kënë bik yett Antipatrith. ³² Nawën bak piny, ka apuruuk ke cath kecœk dhuk Jeruthalem, ku nyiëñkë Paulo apuruuk cath mïthiœœñ bik la kek ye. ³³ Ku yethkë Cetharia, ku gemkë athœr tënë beny Pelik ku thœnkë Paulo. ³⁴ Nawën cï benydit Pelik athœr kuen, ke thiëc Paulo, “Ye raan wun nen?” Nawën yœk lœn ë yen raan wun Cilicia ³⁵ ke lueel, “Yen abi wetdu piñ te le kœc gœœny yï yett.” Ku yœœk apuruuk bik Paulo la muk ku titkë pan wäär buth Antipäth Yërot.

Kœc Itharel aaci Paulo gaany

24 ¹ Nawën nin kadhiëc cœk ciëen, ka Ananiath raandït käk Nhialic la Cetharia kek kœcdït kœk ë baai, ku jœl a raan bi wetden ñic la kuany yic luk yic cœl Tertuluth. Ku lek benydit Pelik nhom ku lëkkë wëlken gœœny kek Paulo. ² Go Tertuluth cœl ku jœl Paulo gaany ëlä, “Yïn benydit! Wet ye yïn raan ñic kœc mac ë yen acï yœk rëer run juëc döör yic ke cïn aliääp. Ku kajuëc peth ca looi kek aaci wuœnda yäth tueñ. ³ Käpuœthkã aa nhiarku ke ëbën akœlakœl. Ku yïn acuk leec yœpuœth apeï. ⁴ Acã wïc ku ba jam apeï, ku yïn alän ba wël kuënkü yï piñ. ⁵ Yœk aaci mony kënë yœk ke ye raan rac. Yen acã aliääp a looi kam kœc Itharel pinynhom ëbën. Ku yeen ë beny kœc akut Nadharet. ⁶ Yeen awïc bi luañ Nhialic yiëk yic buœœl. Ku yeen acuk dœm. Acuk them buk tem awuœc teçit te ye löœñ panda ye lueel thïn. ⁷ Ke yeen acï benydit apuruuk Lithiath ben dœm bei yœcin riel ku nyiëi. ⁸ Ku yœœk kœc cï Paulo gaany ku bik ben luk yic yïnhom. Te thiëc yïn ye, ka ba guœ ñic kek käk cï yœk ye gaany.” ⁹ Ku met kœc Itharel thïn aya ku luelkë lœn käk cï Paulo gaany aa yith.

Paulo aci rot kony Pelik nom

¹⁰Go benydit baai Paulo jal yock bi jam, ku jol Paulo lueel ela, “Anjiec lon ye yin raan ci luk luok run juec e wundaan. Ke yen amit puou ku ba rot kony yinhom. ¹¹Te leu yin ye ba yic njic, ke waar tecit nin kathiaar ku rou emen, yen e le yen Jeruthalem ba la rook thin. ¹²Ku koc Itharel acin cik yok ke goth ke yen luaj Nhialic. Ku keek aakec ya yok ke ya ye koc rac nhiim ten amat Itharel. Ku jol aa yon kok yiic aya. ¹³Ku keek acik bi leu bik yi lek ken ye nyuoth lon ye kak cik kuoen yaguop yith. ¹⁴Wet leu ba gam akin. Yen e Nhialic ye warkuan dit door, door aya dhel yen yekel lueel ka cie yic. Ku yen e kerieec eben ci got loon Mothith ku athor koc kak Nhialic tin yiic gam. ¹⁵Yen ala noth cit nthden aya tenel Nhialic lon bi koc eben, koc path ku koc rac rot jot thou yic akolda. ¹⁶Ke yeen aya them ku ba kel la cok looi tenel Nhialic ku koc eben.

¹⁷“Yen aci run nok wei Jeruthalem, ke yen ya ci la weu ba yath tenel kackie ku la rot koc. ¹⁸Ee wen looi yen e kene yen e yok kek ya luaj Nhialic ke ya ca guop wuony wei karec. Ee cin yom rer kek ya, ku e cin aliim ci rot looi. ¹⁹Ku koc Itharel ke bo wun Athia aake rer thin. Ku keek nhiim, nut aaci dhiel ben yinhom ku bik kel ca wuoc ben lueel. ²⁰Na cie keya, ke e roor rer e ten, ka luel awuc cik yok ca looi waar ci ya yath luk yic. ²¹Kel njic e kel ton ca lueel ela ke ya kaac kenhim, ‘Yen aci beei luk yic akol wet ci yen ye gam lon nade ke koc ci thou aabi rot jot bik pir.’ ”

²²Ku e njic Pelik apath yen te ye dhel pir koc Itharel theek thin. Go luk puol ku lek ke ela, “Na la benydit apuruuk Lithiath yet ke luondun aba tin.” ²³Ku lek beny apuruuk rer apuruuk Paulo tiit nhiim ku bi Paulo ci tiit apil yic, ku yekel koc maath kek ye puol bik kakken wic aa beei tenel ye.

Paulo aci jam tenel Pelik ku Druthila

²⁴Na la nin lik thok, ke Pelik bo kek tiejde Druthila, ku e nyan koc Itharel. Ku tuc Paulo bi beei bi wet ye Paulo gam rin Jethu Kritho ben pin. ²⁵Nawen la Paulo tuej ke jam wet path ku lon bi raan rot tiit karec, ku jol a ben akol luondit, go Pelik rioc ku lueel, “Yin aleu ba jal emen. Yin aba ben cool te ci yen nom ben laau.” ²⁶Ku ye noth lon bi Paulo ye riop weu. Ku rin e wet kene aci ben a tuoc akolakol ku jiem kek ye.

²⁷Na la run karou thok, ke Porkioth Pethtuth weer nyin benydit Pelik ke ye beny. Pelik e wic ku bi koc Itharel nhiaar, go Paulo nyaan mec yic.

Paulo aci thiec ku bi tuoc tenel Benyjaknom

25¹Nin kadiak cok ciien wen ci Pethtuth yet Cetharia, ke jiel thin bi la Jeruthalem. ²Tewen ke kocdit kak Nhialic ku jol aa bany Itharel ke goony Paulo la tenel ye, ku lekke wetden. Ku lanke Pethtuth, ³ku bi ke luoi kel wickel kepuoth ku bi Paulo beei Jeruthalem, rin e cik mat yic ku bik Paulo nok dhel yic. ⁴Go Pethtuth beer, “Paulo abi rer ke mac Cetharia, rin yen adhuk e ninka. ⁵Calkel banykun aa la Cetharia kek ya, ku bik jal la kuen guop te le yen awuc ci looi.”

⁶Go Pethtuth nin kabet aduerkel aa thiaar kan nok ke ke, ku jol la Cetharia. Na akol deete ke la luk yic, ku jol apuruuk yock ku bik Paulo kueth yenhom. ⁷Na la Paulo yet, go koc Itharel ke bo Jeruthalem ke kaac, ke cik gom piny, jock bik karec ape luel yeguop, ku acin kel cie nyuoth lon ye kakkä yith. ⁸Go Paulo rot kony ela, “Yen acin kel ca wuoc loon koc Itharel yiic, ku acin aliim ca looi luaj Nhialic, agut Benyjaknom Roma acin wet rer ca luel yeguop.”

⁹Ku wen wic Pethtuth ye bi nyuoth koc Itharel lon nhier yen ke, go Paulo thieec, “Ci leu ba la Jeruthalem ku ba luondu la luk thin lon ye kak ci kuoen yiguop yith?”

¹⁰Go Paulo lueel, “Te keec yen thin e luaj beny yic, ku e yen te leu ye bi luondie tin thin. Acin kerec ca looi tenel koc Itharel, cimel njic yin ye apath. ¹¹Na ca lon dhoj kou, ku le kerec ca looi leu bi ya tem awuc bi ya nok, ka cel leu ku ba thiec bi yen puol. Ku na cin yiny to thin kak ci kuoen yaguop, ka cin raan leu ye ba thon ke bik ya nok. Ke yeen awiec ku bi ya beny yen bi luondie la luk.”

¹²Go Pethtuth wet ci Paulo lueel kan guelk yic kek koc akutden luk, ku jol dhuk nom, “Wet ci yin ye lueel ke Beny Agripa yen abi luondu luk, ke yin abuk tuoc ye.”

Pethtuth aci luaj Paulo tet yic Beny Agripa

¹³Nin lik cok ciien ke Beny Agripa kek Bernike bo Cetharia bik Pethtuth kony, bik la lek ye lon mit kek puoth wet ci yen yet. ¹⁴Tewen ci kek rer nin juec, ke Pethtuth jol wet Paulo kuony yic beny, “Ala raan rer e ten ci Pelik nyaan piny ke mac. ¹⁵Na waar lar Jeruthalem, go raandit kak Nhialic koc Itharel ku banyken, gaany tenel ya ku wickel ba tem awuc. ¹⁶Guo lek ke lon nade koc pan Roma aacie raan ci gaany ye gam, wet

këreec cī looi ke këc kañ tuööm nhom kek kóc cī ye gaany, ku bī rot kony awuöc cī ye gaany. ¹⁷ Na wäär ca ben ë ten, ke yen akëc ben gääu. Yen acī ben la luk yic aköl bī nienkie aa rou ë ten, ku yöök apuruuk ku bīk ë mony kënë beei ba luöñde tiñ. ¹⁸ Kóc aterde aaci röt ben jot, ku acin këreec diit cik ben kuëen yeguöp tecit ten ye yen ye tieñ thin. ¹⁹ Kë ca ben yök ë lon ye kek teer kek ye te ye yen Nhialic duöör thin, ku jöl aa mony deet cöl Jethu cī thou, ku yen ë mony kënë aye Paulo lueel ka pīr. ²⁰ Ee cā dhal ba yic yök rin ë wëlkä, guo Paulo thiëec bī la Jeruthalem ku ba luöñde la looi thin. ²¹ Go Paulo lueel ka wic bī puöl ke tiit apuruuk agut te bī benyñaknhom luöñde tiñ. Guo apuruuk yöök ku bīk tiit agut te bī yen ye tuöoc tënë benyñaknhom.”

²² Go Agrīpa lek Pethtuth, “Luñ ë mony kënë aba luk yen ya nhom.” Go Pethtuth dhuk nhom ëlä, “Abi beei yīnhom nhiäk.”

²³ Nawën bak piny ke Agrīpa ku Bernike bö ku lor ke yai, ku lueñkë yon luk kek bänydit apuruuk ku jöl aa bäny ë geu. Ku yöök Pethtuth apuruuk bīk Paulo kuëeth luk yic alonñ thin. ²⁴ Ku lueel, “Yin beny Agrīpa, ku jöl aa wek kóc reer ten kek yo. Mony yen deei wek kënë ë yen raan cī kóc Itharel reer ë ten ku jöl aa Jeruthalem gaany tënë ya. Ayekë lueel ke loi duöot lon nadë ka cīi päl ke pīr. ²⁵ Ku yeen acin awuöc ca yök cī looi lëu bī ye tem awuöc bī nöck. Ku yeen nhom acī wic bī ya beny yen luk luöñde, guo gam ku ba tuöoc tënë ye. ²⁶ Ku yen acin yiny puöth ca yök ba göt ë rienke tënë beny. Ke yeen aca beei yīnhom, ku ë yin beny Agrīpa, rin ba wetde wic yic, rin ku bī la kë jäl göt. ²⁷ Aya tiñ lon cīi yen path ku bī raan cī mac tooc ke cīn kën wën cī rot deet ye nyuöoth, kek käk cī ye gaany.”

Paulo acī rot kony Agrīpa nhom

26 ¹ Go Agrīpa Paulo yöök, “Yin aca puöl ku ba jam ba rot kony.” Go Paulo yecin nyuöoth bī kóc biet ku jöl jam ëlä bī rot kony.

² “Beny Agrīpa! Yen ë rot yök aköl kënë ke ya mit guöp rin bī yen rot kony yīnhom käk cī kóc Itharel ya gaany ëbën. ³ Kënë adhīl a yic alanden rin yīn añic apath, yen te ye kóc Itharel cieñ thin, ku käk ye kek wääc thin. Yin aba löñ ëmën ku ba yīguöp päl piny ku ba welkie piñ.

⁴ “Kóc Itharel ëbën añickë yen ten piir yen thin teyön koor yen. Añickë te cī yen pierdie jaak thin yon tuen panda ku jöl a Jeruthalem. ⁵ Añickë akölaköl, ku acik bī dhöl lon nadë ke yen acī kañ cieñ ke ya ye raan akut Parathī kóc ke muk löön Nhialic cök apei. ⁶ Ku ëmën yen a kääc luk yic ë ten rin ye yen wet cī Nhialic lek wärkuan dit nõöth, ⁷ kën yen ye kuat kackua kathiäär ku rou nõöth ka bīk yök, te ye kek Nhialic door aköl ku wëer. Ku ë rin nõöth kënë, yin Benydit, yen acī kóc Itharel ya gaany! ⁸ Yenjö ye wek ye yök wek kóc Itharel ke ril yic bāk gam lon ye Nhialic raan cī thou jot bei thou yic?

⁹ “Aca them yen yen ku ba këriëec ëbën looi, käk bī rin Jethu raan Nadharet rac guöp. ¹⁰ Yen ë kën aca looi Jeruthalem. Yen ya ye benydit käk Nhialic yiëk riel ku ba kóc juëc cī wet Jethu gam aa döm ku mac ke. Ku aca ya gam aya, yen lon nek kóc cī tem awuöc bī ke tem thou. ¹¹ Aaca cöl aaye tem awuöc arak juëc yon amat kóc Itharel yiic, ku aca them ba ke cöl abañ bīk wet Jethu puöl, ku riääk puöu apei tënë ke, agut ba ke aa luöop wuöt kök yiic ku cal ke agum apei.

Paulo acī te cī yen a raan cī gam teet yic

(Luoï 9:1-19; 22:6-16)

¹² “Ee rin ë wet kënë yen ë ler yen Damathkuth ke ya cī raandit käk Nhialic yiëk riel. ¹³ Nawën aköl ciel yic, Benydit, ke ya ñoot dhël yic, ke ya tiñ many yer apei, wär aköl, ke ruel nhial ke cā gööm piny kek kóc ke cath kek ya. ¹⁴ Ku wiikku piny ëbën, ku piëñ röl ke ye lek ya thuonñdie, ‘Thawul, Thawul! Yenjö cöl yin ya agum? Yin acī rot bañ, rin ye yin ye wic ku ba këcīt këdhie ye akaja looi, kë ye yen wai ye raan la ye ye yup ke kuëeth, wëc ciëen.’ ¹⁵ Guo thiëec, ‘Ye yin ña Beny?’ Go Beny lueel, ‘Ee yen Jethu, raan ca cöl agum. ¹⁶ Ke yeen jot rot ku kääc cökku. Yen acī rot nyuöth yī, rin yin aca löc ku ba ya aluanñdie, yin abi kóc kök lek kë ca tiñ tënë ya akölë, ku kë ba nyuöth yī aköldä. ¹⁷ Yin aba tiit bī cien këreec yī yök kóc Itharel ku kóc cie kóc Itharel cin, kóc bī yen yī tuöoc thin. ¹⁸ Keek aaba piöoc bīk kañ ñic, ku bīk luoi käreec puöl, ku jiëlkë riel jöñrac yic ku lek tënë Nhialic, rin gäm bī kek wetdie gam, yen aabi käreec cik looi päl piny ku teeu ke kam kóc cī Nhialic löc.’

Paulo acī te cī yen kóc piöoc thin teet yic

¹⁹ “Këya, Beny Agrīpa, yen akëc wet kë ca tiñ nhial cīt nyuöth dhöl yic. ²⁰ Wäär tuenñ Damathkuth ku Jeruthalem, ku jöl aa wuöt kóc Itharel yiic ëbën, ku kam kóc cie kóc Itharel, aake ya lek lon bīk luoi käreec puöl ku dhukkë Nhialic, ku yekë luui kápath ye nyooth lon cī kek muöl käreec. ²¹ Ee rin ë wet kënë, yen aa

dòm kòc Itharel ya ke ya tò kal luaj Nhialic, ku wickë bik ya nõk. ²² Ku agut cì aköl kënë Nhialic acä kony, ku ë wet kën, yen akeec yen ë ten ku ba kë njec lek raan ëbën, kockor ku kòcđit. Käk ya lueel ka bī röt looi aa thõj kek kāk ye kòc kāk Nhialic tñj ku Mothith lueel, ²³ lòn nadë Raan cì lóc ku dóc abī gum, ku ë yen bī rot kañ jõt thou yic, ku ë yen abī kòc Itharel ku kòc cie kòc Itharel lek wet bī kòc kuõny bei käreec yiic.”

²⁴ Tewën jjeem Paulo ke kony rot ë wëlkä, go Pethtuth rël, “Paulo! Yìn acī muöl. Piöc cì yìn piöc acī cöl amuöl!”

²⁵ Go Paulo beer, “Benydīt! Yen akëc muöl. Wël ya lueel aa yith cìn yic muöl. ²⁶ Beny Agrīpa! Aleu ku ba jam tënë yī ke ya cī riöc, rin yìn anjic kākä ëbën. Anjiec alanden lòn nadë ke keek aaca lek yī ëbën rin kënë acie kë cī thiaan, aa kāk njc jāñ ëbën. ²⁷ Beny Agrīpa! Cī wël kòc kāk Nhialic tñj ye gam? Anjiec lòn ye yìn ke gam!”

²⁸ Go Agrīpa lek Paulo, “Ye yök yīpuöu ë kaam thìn lòn bī yìn ya wel ba ya Krīthian?”

²⁹ Go Paulo beer, “Na còk aa kaamkoor ku kaamdīt, röökdie tënë Nhialic ë lòn bī yìn ku kòc kòk piñ kāk lueel ke aköl röt wel bik ciet ya, ku acie rin bī ke mac.”

³⁰ Go beny ku Pethtuth ku Bernike, ku kòc kòk ke cī nyuc luk yic röt jõt, ³¹ ku wën cì kek jāl aaci jal aa jam kamken, ëlä, “Acìn kë cī ë mony kënë looi, kë lëu bī ye cöl anak ku mac aya.” ³² Ku jøl Agrīpa lek Pethtuth, “Yen ë mony kënë nuöt acī lony, ke rin cī yen ye wic ku bī ya Benyñaknhom yen bī luõñde la tñj.”

Paulo ayeth Roma

27 ¹ Tewën cì ye mat ku buk cath riäi buk la Italia, gokë Paulo ku jøl aa kòc kòk cì mac thõn Juliöth, beny akut apuruuk Roma, akut cöl, “Akut Benyñaknhom.” ² Ku lok riän bö Adramitiöm, riän cì guir bī jāl wath thok wun Athia. Arithtarkuth raan pan Mathedonia wun cöl Thethalonika ë cath kek yo. ³ Na aköl deetë ke yo yet Thidon. Juliöth ë ye raan path, ee cì Paulo puöl ku bī kòc mäath kek ye la tñj, rin bik la yiëk kāk wic.

⁴ Yok acī bar, ku rin cī yok yonhīim wel yom, goku riäi geer te bī yen cath thìn apath, ku ë ye alõj ye aköl ben thìn rial pan tò gool nhom wär ciel yic cöl Thaipruth. ⁵ Ku jølku wär teem buk la Cilicia ku Pampilia ku lok Mira pan tò wun cöl Likia. ⁶ Tenë, ke beny apuruuk yök riän jāl Alekdhändria ke la Italia, go yo yäth thìn.

⁷ Ku riäi ë cath amäath rin yom ë dīt apeī. Ku yok aaci nīn juëc ben nõk dhël yic buk jāl yet gen cöl Kniduth. Yom ë këc yo puöl ku buk la dhëldan yen buõthku yic, goku ret wanh cöl Thalmone ten yen bī pan thiin tò gool nhom cöl Kret yook køl ë yom. ⁸ Ku ciethku ke yo göök yom ke yo kuany agör you, ku yok aaci ben yet te cöl Wanh Path ë riel, ku ë ten cī mec kek gen cöl Lathia.

⁹ Ku ciëñku thìn nīn juëc, ku ril yic buk la tueñ yo cath wīir, rin ë nīnkä aköl Yan lòk kòc kegup wīir ëcī bar, ten yen ye yom rut rot jõt apeī. Go Paulo ke lek ëlä, ¹⁰ “Kackie, aya tñj lòn cäthda jäl ë ten abī yic riel, riäi abī riäak ku kāk tò thìn aabī puk wīir, ku kòc aabī mou aya.” ¹¹ Ku beny apuruuk ë wet raan kuath riäi ku raan la riäi yen aye piñ, ku kueec wet cī Paulo lueel. ¹² Ku wath thok te ye riäi mac thìn ëcī path bī kòc mäi thìn. Go kòc juëc keyiic wic ku bik la tueñ bik yet Ponik te lëu yen rot. Yen ë wanh tò Kret, ku ëcie yethok wel lõj bër te ye aköl lööny piny thìn.

Yomdīt acī rot jõt wīir

¹³ Yom thõõj rot ëcī jõt ke bö ciëem te cī raan yenhom wel te ye aköl lööny piny thìn, go kòc ke cath riäi tak lòn nadë ka lëukë bik la tueñ ke cath, gokë riäi lony ku gerkë ke kuënykë agör Kret you. ¹⁴ Ku kaam thìn awën ke yomdīt ril apeī bö cuëëc te cī raan yenhom wel te ler aköl thìn, ben ben ke ye piü apeī. ¹⁵ Ku yiëk riäi bī la bëñbëñ, ku ril yic apeī bī geer tueñ te bī yom thìn, goku puöl buk cöl akueeth yom. ¹⁶ Yok aaci ben lõj wën tëëk yok lõj ye yom rut yenhom wel thìn, pan thiin tò gool nhom cöl Kauda. Teen, acuk ben lëu buk riän koor duööt riändīt cök. ¹⁷ Ku rin diit yom apeī, gokë duööt riändīt kōu rin bī yom tiim cī ke riäi looi cī piir wei, ku jølku duööt piny wīin. Keek aake riöc ciet riänden bī la döt liëet yic wanh Libia thok, gokë aleth ye yom ke riäi kuaath dāk bei, ku còlkë riäi ajøl yom kuaath. ¹⁸ Yomdīt ril awën acī la tueñ ke piü apeī, nawën aköl deetë ke jökkë bik kāk tò riäi yic cuat wīir. ¹⁹ Nawën aköl ye nīn diäk ke cuet abek kāk ger wīir cienken. ²⁰ Ku cuk aköl ku kuel tñj nīn juëc, ku yom acī la tueñ ke piü apeī. Akëcku ben ben nõöth lòn bī yok piir.

²¹ Nawën cī kòc nīn juëc nõk ke cìn miëth cīk cam, go Paulo rot jõt ku keec kenhīim ku lueel, “Kackie, na we cī wetdie piñ wäär bāk riäi cī geer wei Kret nuöt yok aa këc mam këlä. ²² Ku ë mënë wek aa lõj, deetkë wepuõth! Acìn raan tõñ bī thou weyiic, ë riäi yetök yen abī riäak. ²³ Ku wën akōu atuny Nhialic yen ye yen raande, ku yen ya door acī ben tënë ya, ²⁴ ku lueel, ‘Duk riöc, Paulo! Yìn abī yet Benyñaknhom nhom, ku rin

ë wet kënë Nhialic aciï yï pel wei, ku kôc cath kek yï riäi yic aabi piir.’²⁵ Këya, kackie, deetkë wepuöth! Nhialic aca deet puöu, abi këpath looi tecit te ci ye lek ya thin wënaköu.²⁶ Ku yom abi riäi kuaath bi col ala gool nom cok alon bi yen la riäak thin.”

²⁷ Ku nin aake ci ya thiäar ku ñuan, ku yomdit apeï ë kuath riända wärdit Adekdieet yic. Na ye tecit weer ciel yic, ke ye kôc ger riäi yök kepuöth ciet yo ci thiök buk yet agör thok.²⁸ Gokë win ci duöt thok këthiek luaac piny piï yic, ku wën ye kek ye luaac piny emën ku mën, ke yökkë lon thiök wär yic.²⁹ Gokë riöc ciet riäi bi rot deeny kuör tö piï yic, gokë wiin ci duöt thook aleeldit ye riäi dom luaac piny riäi thar ciëen, ku jolkë bak piny ñöth.³⁰ Eci agër kök them ku bik röt kuel bei riäi yic. Ku jötkë riän thiin koor tö riändit yic bei, ku tæukë wiir ke ye kôc ciet ke la wiin ci duöt thook aleel luaac piny riäi nom tuej.³¹ Go Paulo lek beny apuruuk kek apuruökke, “Na cä agër reer riäi yic, ke kôc tö riäi yic aciï bi piir.”³² Go apuruuk wiin ci riäi mac piny teem kööth ku colkë ke aa buok kuëer.

³³ Nawën bak piny, go Paulo ke löj bik mith ku lek ke, “Wek aciï tiit nin thiäar ku ñuan emën, ku keek ë ninkä yic acin kë cak cam.³⁴ Wek ya löj, ku bak la miëth camkë, wek aa wic miëth rin ku bak piir. Acin raan tök weyic la kë bi ye gôot.”³⁵ Tewën ci yen wet kënë lueel, go Paulo ayup lööm, ku röök ke lec Nhialic kenhim ebën, ku beny ayup yic, ku kôj jök bi mith.³⁶ Keek aciï kepuöth ben deet, ku mithkë ebën.³⁷ Yok kôc yo tö riäi yic, yok aa yo ye buot karou ku thiärdhorou ku dätem.³⁸ Nawën ci raan ebën mith, gokë rap ke tö riäi yic dheeth wiir rin bi riäi pial.

Riäi aciï atiaktiak rac

³⁹ Nawën ci piny bak, ke kôc ger riäi aake këc te ci kek yëet thin ñic, keek aciï te ci wär yeköu tot thin, la yic liet tinj, gokë tak bik riäi geer thin bik la mac.⁴⁰ Gokë wiin yeke riäi mac piny teem wei bik diir piny, ku dakkë wiin ci ke alau duöt piny. Ku jötkë alëth nhial ku bi yom riäi kuaath tuej, bi la agör thok.⁴¹ Ku riäi aciï ben la te cääl ku dööt liet yic bi cien te ben yen rot nyoon, ku ci aban ciëen dhoj atiaktiak abi döj ke ya apet.

⁴² Eci apuruuk tak bik kôc ci mac ebën nöc, bi cien raan töönj kuëej ayeer bi kat.⁴³ Ku ë wic beny apuruuk bi Paulo kony bi ciï näk, go apuruuk yöök bik cien kë loikë tënë kôc mac. Ku yöök kôc ñic kuanj bik kan theet wiir tuej ku bik kuëej ayeer,⁴⁴ ku kôc kök aake bi jal lök kuanj, ke ci tiim riäi ci duöony kuök bik ke yäth ayeer. Ku ë yen te ci yok ben kuëej ayeer thin akan ke yo puol gup.

Kë ci rot looi tënë Paulo Malta

28¹ Wën ci yok yet wär alontui yo puol gup, ke jolku ñic lon col pan tö gool nom Malta² ku kôc ke ciëj thin aciï yo lor, ku nyuuckë yo apath. Tewën ke deej tueny ku lir piny apeï, gokë mac took ku colkë yo buk yöc.³ Go Paulo tiim kuar piiny ku tæu ke mæc, tewën ke këpiiny bö bei tiim yic, ku këc cin abi nuet thin.⁴ Ku tinj kôc awën tö thin këpiiny ke ci nuet Paulo cin, ku jiemkë kamken, “Mony kënë ala cin rim. Ku kënë aciï yen bi piir, cok alon ci yen poth wiir ke këc mou.”⁵ Ku ten awën ke Paulo yir këpiiny mæc, ke cin këreec ciï rot looi tënë ye acin.⁶ Ku ë titkë bik tinj ke ci but cin, nadë ke wiewek piny nyin yic ke ci thou. Ku tewën ci kek tiit apeï ku cin kë tinjke ke ci rot looi tënë Paulo, ke war kenhim ku luelkë, “Yeen ala guöp jöjril apeï.”

⁷ Dum raandit baai col Publiöth, aake ci mec kek tewën looi kënë rot thin tënë Paulo. Ku yeen aciï yo ñiec lor aya, ku rëerku yo ye jäälke nin kadiäk.⁸ Wun Publiöth ë reer biöök yic ke ci juäi dom ku yiäny riem. Go Paulo la yöt tënë ye, ku röök ku döc, go pial.⁹ Wën ci kënë rot looi, go kôc juëc ke tuany ben, go Paulo ke döc bik pial.¹⁰ Ku gemkë yo käjuëc, ku wën jiël yok, gokë käk bi yok dhël tæk täau riäi yic.

Paulo aciï jäl Malta bi la Roma

¹¹ Nawën pei kadiäk cok, ke yo jiël riän col, “Jak Acuek,” bö wanh col Alekdhändria ku yen aciï pei ben nöc ke käac Malta rin yom ë dit apeï.¹² Ku yeetku gen col Thirakuthe, ku näkku nin kadiäk thin.¹³ Ku jiëlku thin, ku lok gen col Regium. Nawën bak piny ke wel yom nom, ku yeetku gen col Putöli nin karou cok.¹⁴ Ku yökku kôc ci gam thin, ku thiëckë yo buk rëer ke ke nin kadhorou. Ku jolku jäl ten ku lok Roma yöcök.¹⁵ Wämäthkuan tö Roma aake ci yo piñ lon biï yok, go kôc kök ben gen yöc col Apiöth ye jööl nin thin bik yo lor. Wën tinj Paulo ke, ke lec Nhialic, ku riil kënë puöu.

Paulo aciï yëet Roma

¹⁶ Wën ci yok yëet Roma, Paulo aciï beny mac Roma puol bi rëer ë rot kek apuruk töj tit ye.¹⁷ Nawën nin kadiäk cok, ke Paulo col kocdit Itharel reer Roma bik röm kek ye. Nawën cik kenhim mat, ke lueel tënë ke, “Wämäthkie! Wën cok yen cien këreec ca looi tënë kackua, ayi lon këc yen ciëej wärkuandit dhöl yic, yen

acī mac Jeruthalem ku thön ya apuruuk Roma. ¹⁸ Gokë yen thiëc awuöc ca looi, ku wickë bik ya lony, rin acik yök ke cīn kē ca looi lēu ye bī ya nök. ¹⁹ Nawēn la kōc Itharel kuc wet bī ya lony, guo luōᅇdie cōl ayeth tēnē benyᅇaknhom Roma mac wuōnda aya, cōk a lōn cīn yen kē gōony yen ē kackua. ²⁰ Yen ē kē wic yen we buk rōm, ku jaam kek we, rin yen acath ya mac rin wet raan yen ᅇōōth kōc Itharel.”

²¹ Gokë lueel tēnē ye, “Acīn athör cī yēēt tēnē yo Judia rienku, ku acīn wāmāthdan cī ben kek wet, lōn le yen kēreec ca looi. ²² Anhiarku buk welku piᅇ rin aᅇicku lōn ye kōc juēc akut tō yīn thīn, jāam guōp.”

²³ Kēya, gokë akōl bī kek rōm kek Paulo mat yic, ku kōc juēc aacī ben akōl kēnē tē rēer Paulo thīn. Ku jōl Paulo wet bāāny Nhialic teet yic tēnē ke, jōk riel yet thēēi. Ēcī them bī nyooth tēnē ke lōn kē ye lueel rin Jethu ē yic, ku nyooth lōn thōᅇ lōᅇ Mothith ku kāk kōk cī gōt kōc kāk Nhialic tiᅇ, kek wet ye lueel. ²⁴ Go kōc kōk wet ye lueel gam, ku kuc kōc kōk. ²⁵ Gokë jāl ke tēer kamken, wēn cī Paulo ye lēk ke ēlä, “Ee yic apei, yen te cī Wēi Nhialic raan kāk Nhialic tiᅇ cōl Ithaya lēk thīn bī lueel ēlä tēnē wārkuan dīt. ²⁶ Rin acī lueel ēlä,

‘Lōr luel tēnē kōc Itharel,

Wek aabī weyīth diēl piny apei ku acāk bī deet,

wek aabī wenyīn pāl piny apath, ku acāk bī tiᅇ.

²⁷ Rin kōckā aa ril nhīim,

keek aacī keyīth cuök,

ku keek aacī kenyīn niēen.

ᅇuōt keek aa daai, ku ᅇuōt keek aa piᅇ, ku detkē kāᅇ yiic, ku lueel Nhialic.

Na cī rot looi kēya,

ᅇuōt aacī kepuōth wel yen ku kuony ke.’ ”

²⁸ Ku wit Paulo wetde ēlä, “Aleukē bāk dhiel ᅇic, lōn wet bī kōc kony bī kōc pīr, bō tēnē Nhialic, acī lēk kōc cie kōc Itharel. Ku abik piᅇ.”

[²⁹ Wēn cī Paulo ē wet kēnē lueel, ke kōc Itharel jiēl ke tēer apeidīt kamken.]

³⁰ Ku jōl Paulo rēer run karou pan ye riōp yic, ku ē ye kōc ben bik ye ben tiᅇ lor ku nyuuc ke. ³¹ Ee ye piōōc wet bāāny Nhialic, rin Beny Jethu Krītho, ku jīeem tēnē kuat raan ēbēn ke cīi riōc, ku acīn kēnē ye gēl bī cīi ye piōōc.